

DIBUULUDIIBWA DYÀ NZAMBI



Twǎnjàayi kushaala biimanyine kuulu katanci kakese cyanaana patudi twinyika mitu yetu bwa kusambila apa.

² Mukalenge wetu Wa ngàsà, tudi bushuwa ne kusakidila leelu ewu bwa dyèsè ditudi bapete bwa kудisangishaku pa buloba apa kumpala kwa Dilwa dya Mukalenge. Swaku bwa tukenketeku myoyi yetu leelu ewu, ku Dìyì Dyebe, bwa tumone ní tudi mu Dìtabuuja, bwa twètù kwikala badilongolole, ciine aci, bwa dîbà dya Dimweneka Dyende. Bwa twìkalakù mudi Mufundu mwambe ne netwìkalè amu: “Bangaciibwe muulu pamwe, pamwe ne aba badi balaale tulu, bwa kusangila ne Mukalenge mu mpeepele, ne kwikala Nende kashidi.”

³ Tudi tuKusakidila bwa Nyuma mulelela wa bwena Kilisto uci di pa buloba, munkaci mwa bantu, bu mucidibo anu bakwitabuuje Wèwè ne Dìyì Dyebe. Pa nanku tudi tulomba mabenessa Ebe pambidi peetu leelu ewu, bwa Wèwè kupongolwelaku muntu ne muntu wa kutudi bitudi naabi dijinga, bwa twamona mwa kwikala banyamina màyi kudi Dìyì, bwa twamona mwa kukola ne kushaala byamu bya mudimu mu byanza Byebe, bwa dituku dya ndekeelu edi. Bwalu tudi tulomba nunku mu Dìnà dya Mukalenge Yesu Kilisto, wetu Mulami munene wa mikooko, utudi bindile bwa kumwenekaye. Amen.

Nudi mwa kusòmbaayi.

⁴ Nenku ndi muswe kwamba ne ndi mbala eci bu ne ndyèsè dinene mu dinda emu dya kusanganyiibwa cyakabidi mu mwaba ewu. Kadi ndi ndomba luse bu mutudi katuyi ne nzubu mulenga menemene wa myaba micyankame yàbùngì ya kusòmba. Nenku netwìkalè mwa kuteeta, diloolo edi, mpindyewu bwa kwenza disambila dya babeedi; leelu, bwa mu dinda emu, mbifwanyine kwikala bikole ndambu.

⁵ Nenku—nenku mwana ne cya kukwata Diiyiisha edi leelu ewu pa mukaba wa mēyì. Ndi . . . Bivwa bimweke bu ne Mukalenge mmudimpèèshe, kaa, kukaadi ngondo umwe anyi yibidi, kadi ndileepa. Kadi ncitu mpetà dîbà mu masangisha a pambelu to, bwalu tutu baswe kwenza tusunsa makumi asatu, anyi makumi anaayi a disangisha. Ne pashiishe tudi . . . Bu mudibi bikengela bwa bantu kuyabo ku midimu ne bikwabo, ndi musangane ne mbîmpè bu mēmè mwa kwipidijaku Mayiisha aanyi. Nenku kabavwa ne dîbà pambelu pààpa dya kubikwata pa mikaba ya mēyì to, ki pa nanku mēmè kwela meeji ne ngindile anu mene too ne pâmvwà mwa kulwa ku tabernacle eku nenku ngakwacile mwaba ewu. Kadi ndileepa ndambu, paabi ndi mumanye ne nudi biimane kuulu, nenku nē—nēngiikalè

mwa kulwijakaja anu ne mwanyi mwònsò. Nenku, mpindyewu, kanwakuntacisha to bu nwênù mwa kwikala nushintakajangana myaba ya disòmba, anyi nî ncinyi cikwabo, aci neciikalè—aci neciikalè anu cikumbane menemene bwanyi mêmè bwalu edi ndituku dya pabwadi ditudi twenza anu dikwata dya mikaba ya mèyi eyi.

⁶ Pa nanku tudi bapete milubu minene ya bidi Mukalenge mwenze pambelu mu budimi bwa bwambi, kadi netùbyâmbè byàbûngì diloolo edi patwikala mwa kukufila dîbà dyàbûngì, kwikalaku ne dîbà dyàbûngì dya kufilaku.

⁷ Nenku mpindyewu tudi batwishiibwe ne Mukalenge neabenesheku muntu ne muntu wa kunudi. Ndi mumanye ne myoyi yenu mmyùle tente ne disanka, bu munudi bindile Dilwa dya Mukalenge. Ne wanyi paawu, udi ùtùtuka's, pa kumona maalu enzeka mudiwu enzeka emu. Ne—ne mvita ya mu ditunga, ne ekeleeziya mu ngiikadilu udiye usanganyiibwamu ewu, ne pa kumona bimanyinu bya Dilwa Dyende, ne bya mubidi ne bya nyuma, ne pa kumanya ne cikondo eci cya Dimweneka Dyende cikaadi pabwipi menemene, bidi byuja anu myoyi yetu tente ne disanka dya kumanya ne netwikalè mwa kushintuluka dimwe dya ku matuku adi panshi aa. Netwikalè mwa kushintuluka kuumuka ku bifukiibwa bitudi ebi.

⁸ Mpindyewu, ndi ngeela meeji ne, bu mêmè mwa kuumvwa, mbalungè telefone myaba kampana, mu mushindu wa ne Mukenji ewu udi ubwela too ne mu Phoenix ne mu—ne mu bitupa bishiileshiilangane, ku telefone. Nenku mpindyewu tudi batwishiibwe ne piikalabi ne bidi nanku . . . Ncyênà mumanye; mbafume ku dicingambila anu pânkaavwà pa kubwela apa. Ne—ne bantu bònsò baa pambelu pààpa badi bulelela basanka bwa mubidi tumatuma ne—ne bwa Butumbi bwa Mukalenge pambidi paabo.

⁹ Nenku mpindyewu—mpindyewu netubuulule mu Dìyi dya Mukalenge. Ne citudi twètù bònsò aba bavwile mwab'ewu mbwa kusanka ne kuteya ntema ku bitudi . . . Kacya katùtukù—katùtukù balwe mwab'ewu biikàle . . . Muntu nansha umwe udi mwab'ewu kî mmumanye ne muntu mmufwanyineku kwikala musòmbè mu luuya lwa mushindu ewu, ciine aci anu ne meeji a kwikala apa to. Tudi apa mbwa kiipacila kamwepele, kaa ne, “Iwendu lwa sheemàsheemà ne Nzambi.” Ki cyònsò citudi mwa kwenza, nkwitabuuja ne Mukalenge Yesu udi neetu. Nenku tudi mwaba ewu mbwa—mbwa kwenda Nende lwendu lwa sheemàsheemà.

¹⁰ Mpindyewu luuya elu ndukole ndambu pambidi paanyi. Nkààdikù mwibidilangane ne luuya lûme lwa mu Tucson mwamwa lwalwa, lùdì . . . Citaleela cya mwaba ewu mpindyewu; lwetu luuya lwa kwaka ludi lwa mudilu mukole menemene kupita elu, kadi lwikàle lûme. Cyetu citaleela citu misangu

mikwabo cya bya makumi abidi bya cya pa lukama cimwe, pàmwápa, cintu bu nanku awu, byenze anu bu badi basòmbèle mu ntenta wa mbombone. Kadi apa cidi ne—ne—mutaleela mwómò, ne ciikàle cikwenzeja bu udi udyumvwa “bakukame mâyi ònsò a mu mubidi,” mutuvwa ne ciibidilu cya kucibiikila amu. Pa nanku ludi lunwosha bikole, ndi mumanye nanku, ne nwênù baamaamù badi ne bânà bakese baa mu maboko ne nwênù badi biimane kuulu abu, bakole ne bânà, ne bafinakane mushindu unudi awu. Nenku mpindyewu tudi—tudi tutekemeni ne Nzambi neanufute mu mushindu mubanjike bwa didifila dyenu.

¹¹ Ndi muumvwe ne Mwaneetu Roy Borders udi apa mwaba kampanda. Ngũmvù bamanyisha bwende yêyè, kadi ndi ngeela meeji ne pàmwápa kî mmupete mushindu wa kubwela to. Eyo. Yêyè ki utu mulongolodi wa ndongamu ya masangisha.

¹² Pa nanku mpindyewu tudi baswe kabidi kumanyisha ne kampanda uvwa ne ciibidilu cya kwikala munkaci mwetu wayi bwa kwikala ne Mukalenge mu dinda emu, mmuntu mulume, Mwaneetu Jackson wa mu Sturgis, Michigan. Kakwena muntu mumanye mudiye muye anyi nî ncinyi pa bwalu abu to. Yêyè uvwa anu bîmpè, kadi nyawu wáfumu ku...Ngeela meeji ne mbamusangane mufwe, anyi cintu kampanda. Ncivwa—ncivwa mupete kantu ne kantu pa bwalu abu to. Kadi tudi ne kusakidilaa kwábúngi kudi Nzambi bwa muvwa Mwaneetu Jackson mwena Kilisto. Ncyêna mumumone to kukaadi bidimu mulongolongo, kadi úvwa úsòmba munkaci mwetu ne úvwa umwe wetu. Nzambi ikishisheku musuuka wende wa bukutu awu! Mushindu udiye muye, tudi twitabuuja ne pàmwápa civwa ncintu kampanda, bwa ne divwa ndyende pende díbà dya kuyaye. Mukalenge kavwaku mutudimwije pa bwalu abu to, anyi mumudimwije yêyè mwine to, mmuye pende anu pakàlàkàà. Ki mushindu udibi byenzeke ngwòwò awu. Nenku ndi ne dijinga dya kubiikila mukajende ne lukasa lwònsò, bwa twétù kwabanyanganaku nende dibungama. Ne tudi bònsò baswe kupingajila Nzambi twasakidila bwa nsòmbelu wende wa bukutu wa bwena Kilisto, ne bwa mushinga uwaye naawu pa buloba ebu, ne nangananga bwetu twétù mwaba ewu mu disangisha dya pa kaaba edi.

¹³ Mpindyewu diloolo edi, ndi mumanyishe ne nekwikalè disambila dya babeedi diloolo edi, nenku nêngàakulé byábúngi kabidi pa bidi bitangila babeedi diloolo edi.

¹⁴ Kadi bwa díbà edi, tubwelaayi buludi mu Díyì mpindyewu, bwalu bantu mbapatakane ne kudi luuya lukole. Netuye buludi ku Díyì. Ndi muswe kubala mu bitupa bibidi bya Mifundu mu dinda emu, bileebile, bwa byamonaku mwa kumpa ndambu wa mwaba wa kushindamijilapu bindi njinga kwamba.

¹⁵ Nenku, mpindyewu, ndi njinga ne baalamaku mukaba wa mēyi awu, Mwaneetu Sothmann ne bakwabo, kumpala kwa kuwusumbishabo, kwôkò mushindu, nenku ndi—ndi njinga kwanji kuwuteelejaku kumpala kwa twètù...kumpala kwa kupatukawu kuya kudi bantu bônso.

¹⁶ Mpindyewu mu . . . Ndi muswe kubala mu Filipinooyi, nshapita mwi2, 1 too ne ku 8; ne Kolinto Mwibîdi 3, kuumukila ku 6, kubala too ne mutudi tukabwela mu nshapita mwi4 wa Kolinto Mwibîdi, anu bwa paa kushindamijila bya dyamba. Mpindyewu mu Filipinooyi, nshapita mwi2, ki ûngààbalà kumpala.

Kumpala kwa kubala, tusambilaayi.

¹⁷ Mukalenge Yesu, Dìyi Dyebe didi Bulelela. Ne mu dîbà dya ndululu ditudi ne mwoyi edi, ditunga dilwishangana ne ditunga dikwabo, cikupi, dikanka dya buloba mu myaba yàbûngi, myoyi ya bantu yamba kwimana munda, bwôwà, tudi tumona mufundu ku cimanu. Mpindyewu, abi mmu cipaapu cya bufuki eci, bwa baa pa buloba bujima kumonabo byôbî ebi. Kadi mpindyewu kudi kabidi cipaapu cya nyuma, ne, biikàle tumona bintu binene munkaci mwa kwenzeka, nenku nyewu tujinga kwakula pa byôbî abi leelu ewu.

¹⁸ Bèneshàku Dìyi Dyebe mu myoyi yetu. Tudi bamanye ne kakwena muntu nansha umwe nî mmu Dyulu nî mpa buloba udi mukumbanyine bwa kwangata Mukanda ewu, kukangula Bitampi, anyi, nansha kuWutangila to. Kadi kuvwa Kampanda wâkamwèneka, Mwânà wa mukooko mushipa, ùmata mashi, wâkalwa e kwangata Mukanda awu, ne uvwa mukumbanyine ne mukumbane bwa kuWubuulula. Eyi Mwânà wa mukooko wa Nzambi, kangwilaku myoyi yetu Dìyi Dyebe leelu ewu, bwa busambi. Tudi basadidi Beebe. Utufwileku luse ku mpekaatu yetu, Mukalenge. Ne cintu kana cyônso cididifwanyine kupangisha Dìyi bwa kupatuka ne bukole bunene ne bwenzeji leelu ewu pa myoyi yetu aci, ùcyûmùshè, Mukalenge, cipumbishi kana cyônso, bwa twamona mwa kwikala ne mushindu mu kaabujima wa kufika ku mabenasha ônsò àtù matulaya kupicila ku Dìyi Dyebe. Tudi tulomba nunku mu Dînà dya Yesu. Amen.

¹⁹ Filipinooyi 2:

Nenku piikalaku busambi kampanda mu Kilisto, piikalaku dikankamika kampanda dya dinanga, piikalaku dyumvwangana kampanda dya Nyuma, piikalaku ndondo kampanda wa mwoyi wa luse,

Vwiyaayi disanka dyanyi dikumbàne, bwa nwikalè ne meeji a mwomumwe, biikàle ne dinanga dya mwomumwe, biikàle ne dîyi dimwe, ne—ne meeji amwe.

Kakwenzekiku cintu nansha cimwe ku dikokangana anyi bwa butumbi bwa patupu to; kadi mu didipwekesha

dya mu meeji muntu ne muntu abale mukwabo bu mwîmpè kumutamba yêyè.

Muntu ne muntu katangidi anu ku maalu ende yêyè mwine to, kadi muntu ne muntu atangile kabidi maalu a bakwabo.

Meeji aa ikalè munda mwenu, a bwena avwa kabidi munda mwa Yesu Kilisto:

Yêyè, mwikàle mu mmwenekelu wa Nzambi, kaakeelaku meeji ne ncintu cya kunyenga bwa kwikala mwomumwe ne Nzambi to:

Kadi wakadivwija yêyè mwine bu kayi wa luumu, ne wakadyangacila mmwenekelu wa musadidi, ne wakavwijiibwa mu cimfwanyi cya bantu:

Ne paakasanganyiibwaye mu mushindu wa muntu, wakadipwekesha, ne wakashaala mutumikidi too ne ku lufu, ku lufu mene lwa ku nkuruse.

²⁰ Mpindyewu bu twètù mwa kubuulula mpindyewu mu Kolinto Mwibìdi, nshapita mwi³, netubangile ku mvensa mwi⁶, twenda tubala cyôci eci too ne ku wa 18, ne tupweka too ne ku citupa cya nshapita mwi⁴.

Yêyè udi kabidi mutuvwije bambi bakumbane baa dipungila dipyadipya; kadiyi dya dileeta to, kadi dya nyuma: bwalu dileeta didi dishipa, kadi nyuma udi ufila mwoyi.

Kadi pùikalàbi ne mudimu wa lufu, mufunda ne mutapa pa mabwe, úwva wà butumbi, mu mushindu wa ne bânà baa Izaleela kabavwa mwa kushaala batangile ne kulengameena kwônso mpala wa Mòsà bwa butumbi bwa lukebu lwende; butumbi bwine abu mbuvwa ne cya kuumushiibwa:

Ambaayi tũng mvwabenga mudimu wa nyuma kwikala ne butumbi butambidile?

Bwalu pùikalà mudimu wa dipiila mwikàle wa butumbi, mudimu wa bwakane mmutambidile mu butumbi.

Bwalu nansha ciine cyàkavwijiibwà cya butumbi aci kaciyena ne butumbi bwine mu mushindu ewu to, bwa tubingila twa butumbi bùdì butambidile.

Bwalu pùikalabi ne cìdì cyumushiibwe civwa butumbi, mmudi mwatamba kwikala...cìdì cishaala cya butumbi.

Nanku bu mudibi ne twètù tudi ne ditekemena dya mushindu ewu, tudi ne cya kutamba...didilekelela dya ngaakwilu, kwangata didilekelela dinene dya ngaakwilu.

Nenku kabiyi bu Mòsà to, uwwa uteeka cibwikilu pampala pende, bwa bânà baa Izaleela kabapeci mushindu wa kumona ne kulengameena kwònsò ndekeelu wa civwa cyumushiibwe:

Kadi meeji abo awwa mafofomija: bwalu too ne ku dituku edi cibwikilu cimwecimwe aci cidi cishaala kacyi cyumusha padibo babala dipungila dikulukulu; cyòci cibwikilu aci ncyumushiibwe mu Kilisto.

Kadi nansha too ne ku dituku edi, padibo babala Mòsà, cibwikilu aci cidi pa myoyi yabo.

Nansha nanku piikalawu mukudimunyiibwe kudi Mukalenge, cibwikilu aci necyumushiibwe.

Mpindyewu Mukalenge ki udi Nyuma awu: ne kudi Nyuma wa Mukalenge. . . ki kudi budishikaminyi.

Kadi twètù bònsò, ne mpala kayiyi mibwikila to tudi tutangila byenze bu mu lumwenu butumbi bwa Mukalenge, tudi bakudimuke mu cimfwanyi cimwecimwe aci ku butumbi ne ku butumbi, byenze anu bu ku Nyuma wa Mukalenge.

Ki bwa cinyi bu mutudi ne mudimu wa bwambi ewu, bu mutudi bapete luse, katwena tucina nansha;

Kadi tukaadi balekele bintu bisokome ne bya mu mufindifindi, katuyi twendela mu budimu ne katuyi tukwata dîyi dya Nzambi ne mafi to; kadi ku dimweshiibwa dya bulelela tudi tudileeja twètù biine kudi kondo kaa mwoyi kaa muntu yònsò ku mèsù kwa Nzambi.

Kadi piikalabi ne evanjeeliyo wetu mmusokoka, mmusokoka bwa aba badi bajimine:

²¹ Mukalenge asakidileku mabenasha Ende ku dibala dya Dîyi Dyende!

²² Mpindyewu, cyena-bwalu cyanyi mu dinda emu, ndi mèmè mutwishiibwe ne Nzambi neacibuulule. Nenku musangu wònsò, nwènù badi bangata mikaba ya mèyi ne nuteeleja, ndi ntekemena ne mutwishiibwe—ne nudi bapete dyumvwa dya nyuma dya cidi Nzambi muteete kwambila Ekeleeziya kayi ucymba buludi pa bütòka to. Nwamonu anyi? Ncintu, misangu mikwabo, bikengela twámbe bintu mu mushindu wa bifwanyine kukeepesha bungi, bifwanyine kufikisha bamwe ku dipatuka, bamwe ku dyumuka kuya, ne bakwabo ku—ku—ku dyelangana meeji. Kadi aci cidi cyenjiibwa ne kiipacila. Bidi ne cya kwenjiibwa mushindu awu.

²³ Dîbà adi mbifwanyine kwenzeka bya bamwe bafwanyine kwamba ne: “Udi uswa kwamba ne Nzambi mmufwanyine kwenza cintu bu nanku ku bukole anyi?” S’ncyà bushuwa ne Yèyè utu ukaadi mucyènzè. Uçitu anu ucyenza.

24 Yèyè wakamba dituku dikwabo, pavwaYe ne binunu biMunyungulukile, Yèyè ne: “Nwènù kanuyi badye Munyiinyi wa Mwânà wa Nzambi, anyi wa Mwânà wa muntu, ne kanuyi banwe Mashi Ende to, kanwenaku ne Mwoyi munda mwenu to.”

25 Nudi nwela meeji ne ndiyi dya mushindu kaayi didi ngangabuka anyi munganga, anyi muntu kana yònsò wa mamanya a mu mutu wa maalu mimpè ewu mufwanyine kudyambidila bwa diyi bu nanku awu, bwa Muntu uvwa ne mudimu wa bwambi wa bwena uvwaYe naawu awu? Mona’s, s’mmufwanyine kwamba ne: “Kudya munyiinyi? Aku’s nkwikala mudi wa minyiinyi ya bantu’s! Kunwa mashi a muntu? Awu’s mmukishi munù wa mashi’s! Mu ngaakwilu mukwabo, Yèyè’s mmuswe bwa twètù kwikala badi baa minyiinyi ya bantu ne mikishi minù ya mashi’s.” Ki bateeleji bònsò kuumuka kuMushiyabo.

26 Kadi kuvwa nsangilu wa bambi bavwa Nende, wa bantu makumi mwandamutekete, bàvwà basungudiibwe. Ki Yèyè kubakudimukila, kwambaYe ne: “Nenwèlè meeji bishi panwamona Mwânà wa Muntu ùbànda uya kwakafumaYe?” Mpindyewu, Yèyè kaakumvwijaku aci to. Kaakumvwijaku ne *mbishi* to; Pòlò ngwákacyùmvwija pashiishe. Yèyè wakaCyamba anu cyanaana. Nwamonu anyi? Nenu bwa eci, Wákamba ne: “Nenwàmbè cinyi,” wàmbila biine bambi aba, “panwamona Mwânà wa Muntu ùbànda uya kwakafumaYe?”

27 Kakuyi mpatà to bantu abu baakamba ne: “Mpindyewu, anji indilabi kakese tǔng. Kaa, tudyà Nende. Tulòba Nende. Tulààla Nende. Twètù’s—twètù’s tudi bamanye kutubo baMulelele. S’tutu bamone kalaalu kavwabo baMu—baMuladikile. Kadi mmunyi mùkaadi Muntu ewu . . . Edi diyi s’ndikole.”

28 Ne Bible mmwambe ne: “Kabaakenda kabidi Nende to.” BaakaMushiya.

29 Dìbà adi kushaalaYe ne dikumi ne babidi. Yèyè nguvwa musungule dikumi ne babidi abu, kadi umwe wabo uvwa démon, mwakambaYe. Ki kubakudimukilaYe.

Ne kakuvwa muntu nansha umwe uvwa mufwanyine kuumvwija civwaYe ufuma ku dyamba aci to. “Mmushindu kaayi wàdyàbo Munyiinyi Wende ne kunwa Mashi Ende? Ne mmunyi mudiYe mutuuluke, paabo baMulelele anu pa buloba apa?” Nwamonu anyi? Kabavwa mwa kuCyumvwaku to.

Ki pashiishe kukudimukilaYe bapostolo, ki kwambaYe ne: “Nudi peenu baswe kuya anyi?”

30 Ki pa dìbà adi pàakambà Mupostolo Peetelo cishimbi-diyi aci ne: “Mukalenge, nkudi nganyi kutudi bafwanyine kuya?” Nwamonu anyi? “Bwalu twètù tudi basankishiibwe. Tudi bamanye ne ditwishiibwa dyònsò ne Wèwè, ne anu Wèwè nkaayeebe, ngudi ne Diyì dya Mwoyi dya dìbà edi.” Nwamonu

anyi? “Ne twètù tudi basankishiibwe bwa aci.” Nwamonu’s, kabavwaku mwa kuCyumvwija to. Bòbò. . .

Kwèna mwa kuumvwijaku diitabuuja to. Ncintu kampanda cyùdì witabuuja, ne ncishindame mu mushindu wa kakuyiku cingà cintu cidi mwa kwangata kaaba kaaci to.

Ki bwa cinyi, bòbò bavwa bamanye ne Dìyì dyàkafùndiibwà bwa cikondo civwabo ne mwoyi aci adi, cikondo cya Maasiya aci, Yèyè nguvwa ukumbana mwaba awu anu menemene. Nenku mmunyi muvwabo mwa kwenza ne baalukile mu ekeleeziya ya mashika, ya bintu bya kwìsùkwìsù yikaavwabo bapatuke ayi? Yèyè ne: “Kutudi bafwanyine kuya ki kwèpi?” Nwamonu anyi? “Twètù tudi batwishiibwe menemene ne Wèwè ngudi ne Dìyì dya Mwoyi.” Nwamonu anyi? Nenku kabavwaku—kabavwaku mwa kuCyumvwija to, kadi bavwa baCìtàbùùje. Nwamonu anyi?

³¹ Nenku Yesu wakamba aci bwa kuumusha lupela mu musumbà Wende awu, nwamonu’s, too ne paakafikaaYe ku dikungwija cisumbu aci. Nenku mu biine bantu bònsò abu, bòbò abu, anu dikumi ne umwe mbàakumvwà mu bulelela ne Yèyè uvwa Nganyi. Bààkamanya ne Yèyè uvwa Nzambi, ne Nzambi nkaayende. Mpindyewu, ba. . .

³² Cyena-bwalu cyanyi mu dinda emu mbwa kusokolola, anyi, kubuulula mwine Nzambi awu.

³³ Nzambi misangu yònsò, mu cikondo cyònsò, ùtu anu musokome paanyima paa cibwikilu kampanda, bikondo byònsò, kadi Yèyè utu anu Nzambi dìbà dyònsò. Nwamonu anyi? Kadi Yèyè utu muDilame musokoka baa pa buloba, kadi uDisokolola kudi Basungula Bende, bu kudi bapostolo mu diine dituku adi. Mpindyewu, ùvwa n’Nzambi wakwila munda mwa Kilisto.

³⁴ Mpindyewu, muntu misangu yònsò, citu anu ngiikadilu wa muntu, ùvwa ukeba bwa kumona (mu mubidi ewu) Nzambi awu. Ùtu anu misangu yònsò muswe kuCimona. Muntu ukaadi mwenzenze bifukiibwa bidi bifwanangane Nende. Badi badicinkila. . .Ba-Indiens bavwa bakuukwila dìbà. Nenku—nenku tudi tujandula, mu Afrike, mmwenekelu mishiileshiilangane ya nyama, ne bikwabo. Nenku kùtu. . . mabaya a bimfwanyi mu Alaska, ne—ne mmwenekelu mishiileshiilangane yidibo badicinkila mu yòyì ayi ne ki mudi Nzambi usanganyiibwa. Bu mwàkaakulà Pòlò ku Atena kwaka cikondo aci, pa kakuna kaa Mars, ubambila ne bavwa ne diitabuuja dya majimbu pa bivwa bitangila Nzambi uvwa kayi mumanyike ewu, ne, bavwa bamanye ne Yèyè uvwaku kadi kabayi baMumanye to.

³⁵ Nenku tudi tusangana nansha baalùkìla too ne ku cikondo cya Yobo. Yobo uvwa mumanye ne kuvwa Nzambi kampanda. Ùvwa mucimanye. Ne kakwenaku muntu wetu—wetu—wetu ewu, wa meeji mu òwò, kayi mumanye ne kudiku Cintu

kampanda mu mwaba kampanda to. Nenku, mpindyewu, Yobo uvwa ujinga bwa kuyiikilangana Nende.

Nenku ndi muswe bwa numone mmwenekelu uvwa Nzambi musungule bwa kwakwilamu ne Yobo. Nzambi uvwa mubwikila paakaakulaYe ne Yobo apu. Ûvwa mubwikila mu mvunda, ùpwekela mu mvunda. Nudi nwitabuuja ne Nzambi ucitu ulwila mu mvunda awu udi mwa kulwa byà numona anyi?

³⁶ Kudi bààbûngì basòmbe mwab'ewu, ndambu, bavwa neetu dituku adi pavwaYe mulwile mu mvunda. KutwambilaYe dituku kumpala, Mwaneetu Banks Wood ne bakwabo, paakambaYe ne: "Ambula dibwe edi, ùdyèlè muulu mu lupeepele, wàmbe ne: 'EMU MMUDI MUKALENGE WAMBÀ! Nenucimone dyakamwe.'" Ki mêmè kwangula dibwe adi, ku lusongo lwa mukuna aku, kudyela muulu mu lupeepele, nenku...mu bushuwa bwa bwalu, mu kupweka kwadi, kujuuladi mvunda, nwamonu's, dikoka dyadi dya lupeepele.

³⁷ Bikengela wêwê kwenza cintu kampanda bwa kwenza ne cintu kampanda cilonde. Yesu wakangata cipese cya dyâmpà e kucicibula, pashiishe kucivudijila pa cipese cya dyâmpà aci. KwangataYe mâyi, kuàpòngolwela mu mulondo. Eliya wakangata mukele, kuwela mu kâsù; kukosaye kaamuci, kukeela pa mâyi. Ncintu bwa kufwanyikija's.

Nenku kwangula kwa dibwe adi ne kudyela muulu mu lupeepele, nenku mu kupweka ki kujuuladi mvunda awu.

³⁸ Dituku dyàkalondà, mona's, kuvwa mwambi kampanda mwikàle neetu mu lwendu kampanda lwa ditwa dya buluwà. Ûvwa mwimane lwà pabwîpî naanyi, ki kungambilaye ne: "Mukalenge utu ufila bikeena-kumona paudi mupatuke mushindu ewu anyi, Mwaneetu Branham?"

³⁹ Mêmè ne: "Eyowa, kadi pa ciibidilu pântù mpatuka ndwa kuneeku mbwa kwikisha." Nenku anu piine apu cikeena-kumona kumbà kulwaci.

⁴⁰ Nenku Mwaneetu Borders, ndi ngeela meeji ne ùdi pambelu mpindyewu, ùvwa neetu. Mwaneetu Banks Wood, ngeela meeji, ne, kaa, bààbûngì bàvwakù, mwandamukulu anyi dikumi. Ne Mwaneetu Banks Wood ukeba bwa mukuna ciine eci. Anu pa mukuna menemene apu, bitangilangane, anu menemene, bu mu ntanta wa mètres nkama mwandamukulu nanku awu ne mwaba uvwa Banjelo mwandamutekete bamwenekele awu, cîmvwà mmumukile apa muyiile kwine aku aci, mêmè kwalukila e kwambila... pa bidi bitangila Bitampi mwandamutekete. Anu bu mu ntanta wa mètres nkama mwandamukulu ne mwaba mwine awu.

⁴¹ Nenku pashiishe dituku dyàkalondà, pàvwà bwalu ebu munkaci mwa kwenzeka apu, mona's, kùdì... Mêmè kwambila mwaneetu, mwaneetu ewu, mêmè ne: "Lutatu lwebe ludi ne,

udi ne disunsuma mu dísù dyebe amu. Bangangabuka mbateete kukaadi bidimu bibidi bwa kuciimanyika kadi bapangile. Badi bamba ne wêwê neu-...necikudye dísù dijima.” Ki mêmè kwamba ne: “Kadi kupampakanyi to, Mukalenge Yesu wâtù diitabuuja dyebe mushinga.” Ki kumacishaye cingoma cyende panshi. Ki mêmè kwamba ne: “Mamwêbè,” anu civwaye menemene ne civwa cimutacisha.

Ki yêyè ne: “Aci mbulelela.”

⁴² Mwaneetu Roy Roberson wa mu ekeleeziya emu, ùvwa mwimane mwaba awu, ngeela meeji ne nwênù bônso nudi bamumanye. Bu mûmvwà mumanye ne yêyè uvwa nkolomu, ne bu mûmvwà mumanye civwà mwa kwenzeka, mêmè kumutenteka cyanza pa dikaaya; mêmè ne: “Mwaneetu Roberson, wikalè mudimuke, utabale, cintu kampanda cidi pabwîpi ne kwenzeka.”

⁴³ Mêmè kwalukila cyanyima e kuya mwaba wûmvwà ne cya kwimanyina, ki mu lupepele kupatukamu mvunda, kupwekaye upicila mu lupongo kampanda, ufumina lwà kuulu, ùvwa munene wa dikema mu mushindu wa ne wàkapanda ne mbwebwe, too ne mu ndondo wa centimètres makumi abidi anyi makumi abidi ne itaanu, kuumukila ku lusongo lwa mukuna, uyikupa mu ntanta wa mètres matwe ku nkama yibidi ne kwine aku. Nenku kwelaci kàpatà misangu yisatu mushindu awu, ki Dìyì kupatukamu. Nwamonu anyi?

⁴⁴ Ne bwônso bwabo bavwa biimane mwaba awu. Mwaneetu Banks, udi mwab’ewu mpindyewu ewu, kusemenaye e kwambaye ne: “Ki ciine cyúvwà mungambile makeelela aci anyi?”

Mêmè ne: “Eyowa’s, mukalenge, ki cyôci aci.”

Yêyè ne: “Mpindyewu, Cyămbì cinganyi?”

⁴⁵ Mêmè ne: “Mpindyewu, aci anu mêmè ngudi mwa kucimanya, Mwaneetu Banks, udi umona’s, bwalu civwa... Civwa cifwanyine kukwacisha bantu bwôwà.”

⁴⁶ Kadi Cyôci kutungunuka, kwenzekaci anu ndambu wa... cyase lwendu citangile ku nord. Ndambu, matuku ndambu paanyima Cyôci kudituuata mu mbú, nenku nuvwa bamone civwa cyenzeke mu nyungulukilu wa Fairbanks. Civwa ncimanyinu cya dilumbulwisha. Mpindyewu tudi tusangana ne—ne Nzambi uciidi anu...Nudi numona’s, civwa cifwayine kukwacisha bantu bwôwà. Nenku pashiishe bivwa bikengela bwa bôbò... Bivwa bikengela aci cyenzeke, nwamonu’s. Bidi bikengela anu cyenzeke. Bintu bidì ne cya kwenzeka abi bidi bikengela anu byenzeke, nansha bishi. Nwamonu’s, neciikalè anu mwa kwenzeka, nansha bishi.

⁴⁷ Musangu kampanda Mòsà wakajinga kumona Nzambi, ki Nzambi kumwambila bwa kwimanyinaye pa lubwebwe. Nenku,

pa lubwebwe apu, Mòsà kwimanayepu e kumonaye Nzambi upita mwaba awu, kadi nyima Wende uvwa mufwanangane ne nyima wa muntu. Nzambi uvwa mu mvunda, ne Nzambi. . . pavwa Mòsà mwimanyine pa lubwebwe apu.

⁴⁸ Ngeela meeji ne nwênù bônso nuvwa bamone fôtô pààpa dituku adi, tuvwa biimane pabwîpî ne lubwebwe lumwelumwe alu. S'ki Bukênkè abu mbwôbù ebu, Mwanjelo wa Mukalenge, anu mwaba mwine uvwaCi cituucile kàpatà awu. Biimane. . . Mmulamika anu ku mboodi wa mamanyisha kwaka mpindyewu, cyakabidi.

⁴⁹ Monaayi, Yehowah wa Dipungila Dikulukulu n'Yesu wa Dipungila Dipyadipya. Nwamonu anyi? Yèyè n'Nzambi umwèumwè awu, mwikàle ùshintulula anu mmwenekelu Wende cyanaana.

⁵⁰ Mpindyewu, muntu kampana uvwa wamba dituku adi, mwambi kampana wa—wa—wa ba-Baptistes mu Tucson mwamwa ne: “Mmunyi mùdi mwa kwamba mùdi—mùdi Yesu ne Nzambi bafwanyine kwikala Mupersona umwepele?”

⁵¹ Mémè ne: “Ee, mbipeepele anu peepelee bu wèwè anu mwa kuumushaku anu ngeelelu webe wèwè wa meeji awu, kadi wela meeji mu ngaakwilu wa Bible pa bwalu abu. Badi Kampana umwepele. Nzambi udi Nyuma; Yesu uvwa mubidi uvwaYe mudibwikile. Wamonu anyi?” Mémè ne: “Bu mudi mu dikù dyanyi. Bwa mukajaanyi, mémè ndi bayende. Ne ntu ne mwanaanyi wa bakaji mutekete, Rebekah, mémè ndi tatwëndè. Kadi ndi ne mwikulwanyani wa balume, dyende m'Paul, mémè ndi kakwëndè. Ndi bay'a muntu, taatù, ne kaaku. Nenku mukajaanyi kèna ne bukenji kùndi bu ne ndi taatù anyi kaaku to; ùdi ne bukenji kùndi anu bu bayende. Nenku mwanaanyi wa bakaji kèna ne bukenji kùndi bu ne ndi bayende anyi kakwëndè to; yèyè mmwanaanyi. Wamonu anyi? Kadi nansha nanku bantu basatu bônso aba's badi anu muntu umwepele. Wamonu anyi? Ki Nzambi awu; Taatù, Mwànà, ne Nyuma Mwîmpè, bidi anu mmakenji a bipungu cyanaana.” Nzambi udi umwèumwè awu, Nzambi umwèumwè awu.

⁵² Nzambi uvwa muDishintulule, ùtu ushintulula mmwenekelu Wende. Bu nwênù mwa kumona mwaba ewu mu Filipooyi emu, Yèyè mmwambe ne: “Kayi wela meeji bu cintu cya kunyenga to, kadi wakangata *mmwenekelu* wa muntu.”

⁵³ Mpindyewu, mwaku wa cyena Ngelika mwaba awu bwa *mmwenekelu* awu, ndi muwukebe makeelela awu dituku dijima, nteeta bwa kucinka ne uvwa ncinyi, ndi nsangana, mulwe ne mwaku ewu wa *en morphe*. Badi bawamba ku dileeta ku dileeta ne e-n m-o-r-p-h-e. Pâmvwà ntangila mu cyena Ngelika, bwa kujandula *en morphe* uvwa ncinyi. . . Ndi mwa kuwushindumuna bibi, kadi cidì cyenza ne ngwâmbè ku dileeta ku dileeta, mbwa piikalabo bapatule mukaba wa mèyi, bantu,

bamanyi baa mabàla, baamanya cîndi—cîndi muswe kwamba pa bwalu abu. Yèyè, padi *en morphe* awu, cidi cyumvwija ne WàkaDishintulula. Yèyè, Wàkatùùluka. Mpindyewu, mwaku wa cyena Ngelika awu mwaba awu udi wumvwija, ne: “Cintu kampana cidibo kabayi bafwanyine kumona to, kadi paaci ciikàlepù, kadi pashiishe cishintùlùke ne disù diikàle mwa kucimona.” Nwamonu anyi?

⁵⁴ Byenze muvwa Eliya, mu Dotana. Nwamonu’s, mu—musadidi awu kayi mwa kumona Banjelo bônso bavwa kabanyungulukile kuntu kwônso aku abu to, kadi Nzambi kucishintulula anu cyanaana; kayi mutuulule Banjelo to, kadi Yèyè kushintulula mushindu wa kumona wà musadidi awu. Nenku ki mikuna ayi myûle tente ne Banjelo, ne kapyà, ne tubalu twa kapyà, ne makalu a mvita a kapyà, ku nyungulukilu kwônso kwa muprofeta Wende aku. Nwamonu’s, bôbò, Yèyè ngwâkashintulula mushindu wa kumona. Ci—cintu cikaadiku mwaba awu.

⁵⁵ Pa nanku, cîndi nteeta bwa kwamba ncyà ne, Nzambi uvwakù misangu yônso awu udi mwaba ewu. Cintu cimwepele cyakenzaYe paakalwaYe muntu apu, Wâkashintulula cibwikilu Cyende cya kwîsù. Nwamonu anyi? Yèyè—Yèyè, *en morphe* ewu, Yèyè—Yèyè wakaDishintulula kuumuka ku civwaYe kuya ku cidiYe, anyi cibwikilu Cyende cya kwîsù, dinaya dikwabo.

⁵⁶ Byenze bu mu dinaya dinene. Mûmvwà ngamba mu dinda emu amu, ngambulula mu mushindu kampana pa bidi bitangila Shakespeare. Kukaadi ntanta mule. Kadi paakafunda Shakespeare diine—diine—diine dinaya adi, kùdì . . . bwa Mfumu James wa Angleterre, pavwaye . . . muntu wa mu dinaya Macbeth awu. Nwamonu’s, Shakespeare kavwa witabuuja ne baloji bätukù to; kadi mu dinaya adi, bu muvwa mfumu yèyè witabuuja ne baloji bätukù, nanku bivwa bikengela abwejemu bwalu bwa baloji. Nwamonu anyi? Nenku mpindyewu, bwa kwenza ciine eci, batu bashintulula mudimu wa mu dinaya.

⁵⁷ Becky mwab’ewu, mu *Carmen*, mbanaye dinaya adi mu—mu cilongelu mudiye ufuma ku dijikijila kukaadi mbingu yisatu emu. Mpindyewu, pâmwâpa muntu umwepele uvwa unaya myaba ya bantu babidi anyi basatu. Bwa kenzaye ciine aci, ùvwa—ùvwa ùshintulula cibwikilu cyende cya kwîsù. Misangu mikwabo ùdi ùpâtuka, mwikàle *ewu* muntu; kadi musangu ùdi ùlondà udiye upatuka, ùkaadi muntu mukwabo. Kadi ùdi anu yèyè muntu umwèumwè awu dîbà dyônso.

⁵⁸ Nenku ki Nzambi awu. WàkaDishintulula kuumuka ku—ku Dikunji dya Kapyà, bwa kulwa Muntu. Pashiishe kuDishintulula kuumuka ku aci, kwalukila cyakabidi ku Nyuma, bwa Yèyè kumona mwa kusòmbela munda mwa muntu. Nzambi mwikàle wenzela dinaya mu muntu civwaYe mwikàle bulelela. Yesu Kilisto, civwa n’Nzambi mwikàle wenzela dinaya mu Muntu, mu

Muntu *kampanda*. Mu Muntu *kampanda*, ki civwaYe aci. Ûvwa mushintuluke muumuke ku Dikunji dya Kapyà, nenku dîbà adi ùvwa mubwele; civwà ciikàle cibwikilu mu cipeela, civwà cisokoke Nzambi kudi Izaleela. Mòsà wakamona mbungakeenu wa mubidi Wende, kadi mu bulelela Yèyè uvwa musokoka misangu yònsò paanyima paa Dikunji dya Kapyà, òvwa diikàle Logos uvwa mupatuke mu Nzambi.

⁵⁹ Mpindyewu tudi tusangana apa, mpindyewu kuumukila ku Mpenta, Nzambi kèna wenzela dinaya *mu* muntu, anyi wenzela dinaya . . . mpindyewu Ûdi wenzela dinaya *kupicila ku* muntu. Nwamonu anyi? Ûvwa wenzela dinaya mwine musangu awu *mu* Muntu *kampanda*, Yesu. Mpindyewu Udi wenzela dinaya *kupicila ku* bantu badiYe musungule mu kiine kiipacila aku. Nzambi, mu mmwenekelu wa muntu, WakaDishintulula kuumuka ku mmwenekelu wa—wa . . . wa Nzambi, kulwa ku mmwenekelu wa muntu.

⁶⁰ Mmulwe mu mènà asatu, mènà asatu a mwànà. Mmulwe mu Mwànà . . . dìnà dya Mwànà wa—wa muntu, Mwànà wa Davidi, ne Mwànà wa Nzambi; mènà asatu a mwànà.

⁶¹ Mpindyewu, Wàkalwa musangu wa kumpala mu Mwànà wa Da- . . . Mwànà wa muntu, bwalu Ûvwa Muprofeta. Mpindyewu, Yehowah Yèyè mwine uvwa ubiikila Yehezekele ne baprofeta ne: “Mwànà wa muntu, udi umona cinyi?” Yesu kaakaDiteelaku bu Mwànà wa Nzambi to; WàkaDitèèla bu Mwànà wa muntu, bwalu bwa—bwa Mifundu kayena mwa kunyangakajiibwa nansha.

Kakwenaku cidi mwa kunyangakajiibwa mu Mifundu nansha cimwe to. Dìyì ne Dìyì dyònsò didi ne cya kwikala anu nanku. Mushindu awu ki wùndi mêmè nciitabuuja. Mushindu awu ki udiDi ne cya kwikala, kî mbwalu ndi mêmè nciitabuuja to, mbwalu Dyòdi n’Dìyì dya Nzambi.

⁶² Mpindyewu bu nwênù mwa kumona ku cibangidilu, Dìyì dimwepele, mu dibeki dya kumpala dya Bible, mu Genese 1, tudi tujandula ne kaabujima kaa . . . Masaama ònsò aa, tunyinyinga twònsò etu, masaama ònsò a myoyi aa, ne byònsò bikaadiku byenzekelenzekele bantu ebi, mbilwe bwalu muntu *umwepele* wakabenga kwitabuuja Dìyì *dimwepele*, ki kutwalaci byònsò ebi. Aku ki ku cibangidilu cya Bible. Ku ndekeelu wa Bible, Bwakabuulwibwa 22, Nzambi umwèumwè awu mmwambe ne: “Muntu yònsò wadidinga kuumushila Dìyì dimwepele ku Cyòci eci, anyi wasakidilaKu dìyì dimwepele awu.” Nwamonu’s, cidi ne cya kwikala Dìyì ku Dìyì, anu mudiDi amu.

⁶³ Pa nanku, ki bwa cinyi, nenku angantaayi anu kaacintu kakese mûngìkalà . . . muntu *kampanda* mwikàle misangu yònsò anu untacisha pa bidi bitangila bakaji badi babebula nsuki yabo. Mpindyewu, bwanyi mêmè, padiciye anu wenza ciine aci, nansha yèyè mwikàle wenza maalu ne bunsantu bwa bishi

ne mwikàle ne dimanya bûngì bishi, ùdi anu mupiile. Yêyè uvwala tuputulu ne bilàmà ebi mushindu awu; cidiye wenza nansha ciikàle cinganyi, nansha yêyè mwa kwimba misambu bûngì bishi, nansha yêyè mwa kuyiisha bilenga bya bishi, cyònsò cidiye mufwanyine kwenza aci, nansha mwikàle ne nsòmbelu wa mushindu kaayi, cìdiku ncyà ne Dìyì dimwepele ndinyangakajiibwe. Nwamonu anyi? Nwamonu's, bikengela ciikàle anu Dìyì dyònsò. Kì ncyambilu to; Dìyì, Dìyì dimwepele! Pa nanku, Bible kí ngwa didyumvwijila paa nkaayebe to. Ùdi ne cya kwikala Dìyì ku Dìyì, mushindu udiDi difundiibwe awu. Tudi ne cya kwitabuuja Aci.

⁶⁴ Nenu kí ng'anu kuDìitabuuja nkaayaaku to, kuDileea mu nsòmbelu. Patwikala katuyi tuDileea mu nsòmbelu to, dîbà adi katwena baDìtábùùje to; tudi peetu twamba anu cyanaana mutudi biitábùùje. Bu múmvwà. . . Ngiimanyina pa bingãmbi, bayiidi abu kabavwa ne mushindu wa kuDyumvwija to, kadi bavwa baDìtábùùje, nansha bishi, ne baakenza ditonda dyabo ne baakaleea aci mu nsòmbelu. Paakuumuka bakwabo bònsò e kuDishiyabo, bòbò baakashaala naaDi! Bavwa baDìtábùùje! Mushindu awu kí utudi twenza. Mushindu awu kí ùdi ukengela wêwè kucyenza. Nansha cidi ní nganyi mukwabo wenza, twêtù tudi tuDiitabuuja ne pashiishe twenza maalu bilondeshile Dyòdi adi. Wêwè kuyi ucyenza to, dîbà adi kwèna muDìtábùùje to.

⁶⁵ Mpindyewu monaayi mpindyewu paakalwaYe apu, bivwa bikengela bwa Yêyè kulwa bu Mwânà wa muntu, bwalu Mufundu Munsantu ukaavwa mwambe ne ki mwalwaYe: "Nzambi uvwa mwa kubajuudila Muprofeta." Pa nanku Yêyè kavwa mwa kulwa mwikàle uDibiikila bu Mwânà wa Nzambi to, bwalu kacivwa ng'aci cipungu to. Ùvwa Mwânà wa muntu mwikàle wamba ciprofeta, bwa kuuja, ne ubasokolwela bintu byònsò bivwa byenjiibwe, ne bivwa biikàle cifwanyikijilu cya civwaYe abi. Musangu awu Yêyè uvwa pa buloba bu Mwânà wa muntu.

⁶⁶ Tangilaayi numone mukaji wa beena Syrophénicie wákanyeemena kudiYe awu, wamba ne: "Wêwè Mwânà wa Davidi, ngumvwilèku luse!" Kaakabandululaku nanshà mutu Wende to. Mukaji awu kavwa ne bukenji kudiYe bu Mwânà wa Davidi to. Yêyè uvwa wa baa Bisamba bya bende.

Anu mudibi ne mwanaanyi wa bakaji kèna ne bukenji kùndi bu ne ndi bayende to; anyi, mukajaanyi, bu ne yêyè mmwanaanyi wa bakaji to. Nansha mudibi ne, yêyè mmwanaanyi wa bakaji ne mukajaanyi, mmwanaanyi wa bakaji mu Evanjeeliyo. Kadi, bwa pa buloba ebu, yêyè kèna ne bukenji bwa kumbiikila bu—bu taatù to. Nwamonu anyi?

Mpindyewu monaayi, mukaji wa baa Bisamba bya bende ewu kavwa ne bukenji kudiYe bu Mwânà wa Davidi to. Kadi mpofo Baatimaayo uvwa yêyè naabu, nwamonu's, ùvwa yêyè mwena Yuda. Mpindyewu, Wàkalwa bu Mwânà wa muntu.

67 Bikengela nwikalè bamanye myaku eyi ne bintu ebi. Tangilaayi Hattie Wright musangu awu, wà Nkokelu Mwisàtù awu. Nudi bacivuluke's. Ku byònsò abi, mukaji awu wàkamba cintu civwa cijaalame. Bikengela wêwè kwamba dîyì dijaalame adi, cintu cijaalame aci ucyaambila Nzambi.

68 Monaayi mpindyewu, Wàkalwa musangu wa kumpala bu Muprofeta awu, ki kuMupoopelabo pa nkuruse. Bânà Baabo menemene ki bààkaMupoopelà pa nkuruse. Wàkalwa bu Mwânà wa muntu.

69 Kadi paanyima paa Nyuma Mwîmpè mumane kulwa, Ûvwa dîbà adi Mwânà wa Nzambi. Nzambi n'Nyuma. Ûvwa Nyuma Mwîmpè, Mwânà wa Nzambi. Mmusòmbe mu bikondo bya ekeleeziya bu Mwânà wa Nzambi.

70 Mpindyewu, mu Bukalenge bwa bidimu cinunu, Neikalè Mwânà wa Davidi, musòmbe pa Nkwasa wa butumbi wa tatw'Èndè, Davidi. Yêyè m'Wwânà wa Davidi.

71 Mpindyewu nenku, vulukaayi ne, pankaci paa Mwânà wa Nzambi. . . Mu cikondo cya Laodikiya, mbaMwele pambelu. Kadi mu Luuka, Yêyè mmwambe ne Neabuuludiibwe cyakabidi bu Mwânà wa muntu, Muprofeta, mwikàle uuja bikwabo bya cyôci aci. Nwamonu anyi? Mifundu mmiswikakane pamwe mu mushindu mupwangane. Mwânà wa muntu, Mwânà wa Nzambi, Mwânà wa Davidi. Civwa ncinyi? N'Nzambi umwèumwè awu dîbà dyònsò, mwikàle anu ushintulula mmwenekelu Wende, *en morphe*. CidiYe mmumushintulule cyanaana. Ndinaya dinene Bwende Yêyè. Udi munkaci mwa kudinaya.

72 Wàkalwa bu Mwânà wa muntu, Muprofeta. Mucyènzè anu menemene. Nansha mukaji mutekete awu mu mpekaatu wende yònsò awu, ku ciinà cya mâyì kwaka, wàkaMujingulula. Wàkamba ne: "Twètù tudi bamanye ne Maasiya ulwalwa, udibo babiikila ne Kilisto, cyôci aci ki cyenzaYe." Nwamonu's, wàkajingulula bwalu ùvwa Dimiinu didyànjlila kulongolola. Pa dîbà adi yêyè. . .

Kadi paabi, bakwabo baabo kabaakaCijingululaku to. Kabavwa ne cya kujingululabo naaci to. Bavwa mu mpekaatu, anu kwònsò kwine aku.

73 Bwalu, bwa bitupa bya dinaya Dyende, Yêyè udi ushintulula mmwenekelu Wende. Dîbà adi Wàkalwa mu mmwenekelu wa Mwânà wa muntu.

Bwa cikondo cya balongolodi, Wesley, Luther, too ne kundekeelu, pashiishe tudi tujandula ne baakabibwejakaja bikole, anu mwakenza beena Izaleela, mu mushindu wa ne paavuYe kumweneka mu matuku a ndekeelu, mu cikondo cya beena Mpenta, bu Nyuma Mwîmpè, kuMubengabo. Mbenze cintu cimwecimwe cyakenza Izaleela aci.

Kadi cidiYe wenza ncinyi mpindyewu? Wàlukila bu Mwânà wa muntu. Ne pashiishe, kuumuka ku aci, Mwânà wa Davidi. Nudi numona mushindu utukaadi pabwîpi anyi? Mwânà wa muntu, Mwânà wa Davidi, Mwânà wa Nzambi. Mmubuuludiiibwe mu matuku a ndekeelu bu Mwânà wa muntu, bilondeshile Maalaki 4, biprofeta bikwabo byònsò biikàle bikumbanyina dîbà edi. Kâciyi kabidi ukwata mudimu ne ekeleeziya paanyima paa Yèyè. . . MbaMwele pambelu; pambelu, mwikàle ukookola ku ciibi. Dimiinu kampanda didyànjlila kulongolola muntwamu, dicikàlemù. Ùdi ne cya kufika kudiye.

⁷⁴ Nenu Nzambi, mu muntu, ùkaavwa muDipongolole Yònsò. Yowela 2.28, tudi tujandula ne, Yèyè mmwambe ne: “Mémè nêmpogololè, mu matuku a ndekeelu, Nyuma Wanyi.” Mpindyewu, nwênù bamone mwaku mwaba awu, mwaku wa cyena Ngelika. Bidi mwa kwenzeka ne ngiikàlè mutupakanepu, kadi wùndi mémè mufwanyine kupeta. . .

⁷⁵ Bikengela nwikalaayi nutabaleela myaku. Anglais utu mîngà misangu ne dyumvwija pabidi. Anu mudi mwaku utudi twamba ne, “nzambi” awu. “Nzambi wakafuka mauulu ne buloba,” Genese 1. Kadi mpindyewu, mu Bible, mMwambe ne: “Ku cibangidilu Elohim.” Mpindyewu, Elohim, Anglais udi yèyè ubiikila ne “god,” kadi kacivwa menemene. . . *Elohim*. . . Cintu kana cyònsò eci’s cidi mwa kwikala nzambi, bilondeshile mwaku *god*; s’udi mwa kuvwija lupingu lulwa nzambi; udi mwa kuvwija piano wawa ulwa nzambi; udi mwa kuvwija cintu kana cyònsò eci cilwa nzambi.

⁷⁶ Kadi kabyena nanku mu mwaku *Elohim* to; Wòwò udi wumvwija ne, “Ewu udiku ku Yèyè mwine.” Nwamonu anyi? Piano wawa kèna mwa kwikalaku ku yèyè mwine to, cintu nansha cimwe kaciyena mwa kwikalaku ku cyòci ciine to. Pa nanku, mwaku *Elohim*, udi wumvwija ne, “Ewu utu mwikàlekù misangu yònsò.” *Nzambi* udi mwa kuumvwija cintu kana cyònsò. Nudi numona dishiilangana mu mwaku awu anyi?

⁷⁷ Mpindyewu, padiCi cyambe apa ne Yèyè mmuDisiye *munda mutupu*, anyi *mupongolole*, mpindyewu, tudi bafwanyine kwela meeji nanku ewu, ne Yèyè “mmulùke,” mwaku wa mu Anglais wa *emptied* [mushiye munda mutupu–Muk.], anyi *poured* [mupongolole] mupatule munda Mwende, nwamonu’s, cintu kampanda cipatuke munda Mwende civwà cishiilangane Nende. Kadi mwaku *kenos*, mu cyena Ngelika, kawena wumvwija ne Yèyè uvwa “mulùke” to, anyi ne. . . diboko Dyende ndyumuke, anyi ne dîsù Dyende ndipatuke, muntu mukwabo wa patupu to.

⁷⁸ Mbwena kwamba ne, Yèyè mmuDisiye, Yèyè “muDipongolole mu,” (Amen!), mu cibwikilu cikwabo, mu mmwenekelu mukwabo. Kî nne muntu mukwabo wa patupu mmupatuke mu Yèyè, mwikàle ubiikidiibwa ne Nyuma Mwîmpè to, kadi Civwa n’Yèyè anu Yèyè mwine. Nwacyùmvù anyi?

Yèyè anu Yèyè mwine ngwâkaDipòngolola munda mwa bantu. “Kilisto munda mwenu!” Mushindu mwine udibi bimpè, mushindu mwine udibi bilenga bilaya’s we, pa kwela meeji ne, Nzambi uDipongolola Yèyè mwine munda mwa muntu, munda mwa mwena kwitabuujja. “Kupongolola!” Civwa ncutupa cya dinaya Dyende, kwenza kwa nanku aku.

Nzambi, kaabujima kònsò, Bunzambi bwònsò mu ciikadilu cya mubidi buvwa mu Mupersona ewu, Yesu Kilisto. Yèyè nguvwa Nzambi, ne Nzambi nkaayende. Kayi mupersona mwisâtù anyi mupersona mwibîdì, anyi mupersona wa kumpala to; kadi Mupersona *awu*, Nzambi mubwikila mu mubidi wa buntu.

⁷⁹ Timote wa Kumpala 3.16: “Kakuyi dikokangana to bwalu busokoka bwa difwana dya Nzambi mbunene; bwalu N-z-a-m-b-i, Elohim,” N-z-a-m-b-i ne dileeta dinene, mu Bible. Alukilaayi ku cyôci aci, muntu kana yònsò. Cidi cyamba, mu mfundilu wa ku cibangidilu, nCyambe ne: “Elohim.” “Ku cibangidilu, Elohim.” Nwamonu anyi? “Nenku, Elohim, kakuyi dikokangana to bwalu busokoka bwa Elohim mbunene; bwalu Elohim wakavwijiibwa mubidi, ne twètù twâkaMulenga.” Elohim, mubwikila mu mubidi wa buntu! Yehowah munene uvwa muuje cibwashibwashi cyònsò, bikondo byònsò, ne myaba yònsò awu, wakavwijiibwa muntu. TwâkaMulenga, Elohim. “Ku cibangidilu, Elohim. Ne Elohim wakavwijiibwa mubidi, wâkasòmba munkaci mwetu.”

⁸⁰ Cinyi? Ki mushindu Wende ngwôwò ewu, tutupa twa dinaya. Ki mushindu udibi bikengela Yèyè kudinàya, mushindu Wende wa diDibuulula kutudi byenze bu muntu kampanda mushiilangane. Twètù tudi baa cifwaka, ne Yèyè mmumanye ciine aci. Ne tudi tuumvwa anu bu baa cifwaka. Tudi tumanya anu bu baa cifwaka. Tudi tumanya anu padi byumvwilu byetu bitupa mushindu wa kumanya, kadi bwa bikwabo bidi bikengela bwa twètù kubiitabuujja ku diitabuujja. Bikengela twâmbè ne kudi Nzambi kampanda; nansha twètù baMumone, anyi to, tudi tuciitabuujja, nansha bishi. Nwamonu anyi? Nansha ciikàlekù anyi kaciyiku, tudi anu tuciitabuujja bwalu Nzambi ngudi mucyâmbè.

⁸¹ Bu Abraham, kavwa mwa kumona mwânà wa balume awu to, kakuyi bimanyinu, anyi difu dya—dya Sarah, anyi mene bikondo bya mukaji uya ku mashi anyi nî ncinyi, kadi nansha nanku Nzambi nguvwa mwambe. Ditekemena dyònsò, nansha matrice ende—ende miine akaavwa mafwe, ne mwoyi wa bulume munda mwende ukaavwa mufwe, ne musulu wende wa—wa mwoyi ukaavwa mukame, ne mwoyi wende pende wa—wa bukaji ukaavwa mukame munda mwende. “Kadi nansha nanku kaakatenkakanaku ku mulayi wa Nzambi ku bupidya to, kadi úvwa ne dikanda, úfila butumbi, mumanye ne Nzambi uvwa

ne bukole bwa kwenza cintu kana cyônsò civwaYe mwambe ne Neénzè.”

Ki mushindu udi ukengela twêtù kwitabuujja Dîyì adi leelu ewu ngwôwô awu. Nebiikalè bishi? Ncyèna mumanye. Nzambi ngudi mwambe ne nebiikalè mushindu awu, nenku aci's ncikose bwalu.

⁸² Mupersona munene udi kayi umweneka ewu nganyi? Ewu nganyi Uvwa Abraham mumonemone mu bikeena-kumona? Kadi, kundekeelu menemene, Yèyè kumweshiibwa mu mubidi, kumpala kwa mwânà awu kulwaye. Nzambi Yèyè mwine wakalwa kudi Abraham mu mmwenekelu wa muntu, ku cikondo cya nshiikidilu. Mumweshiibwe! WakaMumona mu kaaBukênkè kakese musangu kampanda; wakaMumona mu bikeena-kimona; wakumvwa Dîyì Dyende; mabuulula àbûngì. Kadi anu kumpala menemene pabwîpì ne mwânà mulaya, wakaMumona mu mmwenekelu wa muntu, ne wakaakula Nende, ne wakaMupa byakudya bya munyiinyi ne byakunwa. Nwamonu anyi? Monaayi, Nzambi Yèyè mwine mubwikila mu mubidi wa buntu.

⁸³ Eci ncitupa cya mushindu Wende awu. Ewu ki mushindu udiYe uDimwenesha kutudi, ùmwènesha Dîyì dya Cyendeleele, Nzambi, Yehowah muvwijiibwe mubidi. Bu mu Yonè Munsantu 1: “Ku cibangidilu kwakadi Dîyì, ne Dîyì dyakadi ne Nzambi, ne . . . Ku cibangidilu kwakadi Elohim, ne Elohim wakadi . . . wàkalwa Dîyì, ne Dîyì dyakadi Elohim. Ne Dîyì dyakavwijiibwa Elohim.” Nwamonu anyi? Cidi ncintu cimwecimwe aci, ciikàle anu cidivungulula cyanaana.

⁸⁴ Bu mudi cyambiibwa, nwamonu's, cidi mu Nzambi. Cyambiibwa mmeji ebe. Nzambi ku cibangidilu, Wa Cyendeleele awu, Yèyè kavwa nansha Nzambi to. Ûvwa Wa Cyendeleele. Yèyè kavwa nansha Nzambi to; *Nzambi* udi “cintu cya dikuukwila,” anyi cintu kampanda. Nwamonu anyi? Pa nanku Yèyè kavwa nansha ciine aci to. Yèyè uvwa Elohim, Wa Cyendeleele. Kadi munda Mwendè muvwa meeji kampanda. Ûvwa muswe kulwa mumweneke. Nenku Wàkenza cinyi? Dìbà adi kwambaYe Dîyì, ki Dîyì kulwadi dimweneke. Ki cimfwanyi mu kaabujima ncyôcì aci, kuumukila ku Genese too ne ku Bwakabuulwibwa. Kamwena cya mafi nansha cimwe to. Ng'Elohim mwikàle ùlwa mumweneke bwa wamona mwa kulengiibwa ne byanza, umvwika ku byanza. Nenku mu Bukalenge bwa bidimu cinunu, ki Elohim udi musòmbè pa Nkwasa wa butumbi wawa, nwamonu's, ncyà bushuwa, ne bantu Bende bônsò baMunyungulukile, bavwaYe mudyanjile kulongolola kumpala kwa difuka dya dyulu ne buloba abu.

⁸⁵ Byenze mudi muntu mwikàle wibaka ngonga ya myadi milondangane anyi ulongolola ngonga ya myadi milondangane, mufwimbi awu. Bikengela bwa ngonga ne ngonga adile

bishiilangane ne mukwabo. Byamu bimwebimwe, kadi cyamu cifiike búngì kampana, cyamu cifiike cipeepele búngì kampana, cyamu cya kabanda búngì kampana, bwa kumupa “mwadi” awu.

⁸⁶ Ki mushindu uvwa Nzambi mwenze. Wákasambakaja ewu ku wawa, ku ewu ne ku wawa, ku ewu ne ku wawa, too ne mwakalwaYe kupeta anu menemene civwaYe ukeba. Mushindu awu ki wakatuulukaYe panshi apa. Nzambi kuDibuulula mu Dikunji dya Kapyá mwikàle upwekela ku baprofeta, pashiishe kubwela mu Mwânà wa Nzambi, uvwa ne, Yêyè uvwa Nzambi. Nwamonu’s, n’Nzambi umwèumwè awu mwikàle upatula anu menemene, kuumuka ku bupwangane kuya ku bupwangane, kuumuka ku butumbi kuya ku butumbi. Mushindu awu ki udi Ekeleeziya wenda uya.

⁸⁷ Monaayi, mu bikondo, mushindu umweumwe awu, ku baprofeta Bende, nkudiYe muDibuulwile. Bôbò abu kabavwa anu menemene baprofeta to, bavwa banzambi. Yêyè ngudi mwambe nanku. Bwalu, civwabo bamba civwa Dîyì dya Nzambi. Bôbò bavwa musunya uvwa Nzambi mudibwikile. Bavwa banzambi. Yesu wakamba, Yêyè mwine, ne: “Mmunyi munudi mwa kuMpiisha Mémè pândi ngamba ne Ndi Mwânà wa Nzambi, pândi mikenji yenu miine yamba ne aba bavwa Dîyì dya Mukalenge dilwa kudibo bavwa banzambi?” Nwamonu anyi?

⁸⁸ Nenu uvwa n’Nzambi mubungakaja mu muntu mwikàle ubiikidiibwa ne mmuprofeta. Nwamonu anyi? Nenu Dîyì dya Mukalenge divwa dilwa kudi mwine muntu ewu, mu mushindu wa ne kacivwa mmuprofeta awu to; muprofeta uvwa ncibwikilu, kadi Dîyì ndivwà Nzambi. Dîyì dya yêyè muntu awu kadyakwenza bwalu mushindu awu to. Nudi numona cîndi muswe kwamba anyi? Kadyena mwa kwenza bwalu mushindu awu to. Kadi mu mushindu mashaadile civwa n’Nzambi. Nwamonu’s, Yêyè uvwa Dîyì dya Nzambi mu mmwenekelu wa muntu, ubiikidiibwa ne “muntu.”

Monaayi, kacyakacya Yêyè katuku mushintulule ngiikadilu Wende to, anu mmwenekelu Wende. Ebelu 13.8, mmwambe ne: “Yêyè udi umwèumwè awu makeelela, leelu, too ne kashidi.” Pa nanku Yêyè kaakashintulula ngiikadilu Wende paakalwaYe to. Yêyè udi anu Muprofeta awu misangu yônsò, mu cikondo cyônsò, cintu cimwecimwe aci: Dîyì, Dîyì, Dîyì, Dîyì. Nwamonu anyi? Yêyè kêna mwa kushintulula ngiikadilu Wende to, kadi Wákashintulula mmwenekelu Wende. Ebelu 13.8, mmwambe ne: “Yêyè udi umwèumwè awu makeelela, leelu, too ne kashidi.” Wákashintulula anu cibwikilu Cyende cya kwîsù.

⁸⁹ Anu mûndi mushintuluke kuumuka ku bu bay’a muntu, pààkalediibwà mwanaanyi, díbà adi nkaadi taatù. Paalu mwikulwanyì kulediibwa, nkaadi kaaku. Nwamonu anyi? Kadi, ncyêna nshintuluka to; nshidi anu—anu mémè awu.

Nwamonu anyi? (Nenku ki Nzambi nyawu.) Mbyenze anu ne ndi mushintulule wanyi. . . Nwamonu's, kudi anu kushintulula kwa mmwenekelu webe cyanaana. Nwamonu anyi?

Monaayi. Nenku bufuki budi bumushintulula kuumuka ku bunsonga kuya ku muntu mushindame, too ne ku muntu mukulakaji. Kadi's ki bwalu mbwôbù abu, nwamonu's, wêwê udi ushintulula anu mmwenekelu webe cyanaana.

⁹⁰ Mpindyewu, kwêna mufwanyine kwamba nsongalume mutekete mwimane mwab'ewu, wa bidimu dikumi ne bisambombo, kwamba ne nkaaku to. Kî mmufwanyine kwikala aci to. Bikengela mmwenekelu wende ashintuluke. Ndambu wa bidimu udi umushintulula, dîbà adi udi ulwa kaaku. Nudi numona cîndi muswe kwamba aci anyi?

⁹¹ Kadi m'Mupersona umwèumwè awu dîbà dyônsò, Mupersona umwèumwè awu, Nzambi dîbà dyônsò. Mu mushindu ewu ngudiYe uDibuulula kudi bantu Bende, mu kwenza kwa cyôci eci. Monaayi, mu cikondo cyônsò cya Dikunji dya Kapyà aci, WàkaDibuulula kudi bantu Bende. Mu cikondo cya—cya Yesu, WàkaDibuulula kudi bantu Bende. Mu cikondo cya Nyuma Mwîmpè, bu Mwânà wa Nzambi. Mwânà wa Davidi. . . Yèyè utu anu uDibuulula misangu yônsò mu mushindu awu kudi bantu Bende, wenza ne bantu baMumanye. Yèyè mmubwikila paanyima paa cintu kampanda, monaayi, mu mushindu umweumwe awu, anyi mu ngiikadilu umwèumwè awu, musangu wônsò.

⁹² Nzambi mubwikila mu Yesu, bwa kwenza mudimu wa bupikudi ku nkuruse. Nzambi kavwa mwa kufwa to, bu Nyuma. Yèyè ngwa Cyendelelee. Kadi bivwa bikengela bwa Yèyè kuvwala cibwikilu cya kwîsù bwa kwenza citupa cya dinaya cya lufu. Wàkafwà anu cya bushuwa, kadi Kavwa mwa kucyenza mu mmwenekelu Wende wa Nzambi to. Bivwa bikengela bwa Yèyè kucyenza mu mmwenekelu wa Mwânà, bu Mwânà wa muntu, pa buloba. Nwamonu anyi? Bivwa bikengela Yèyè kwikala mu mmwenekelu wa Mwânà. Pashiishe paakaalukilaYe dya Mpenta, Ûvwa cyakabidi Mwânà wa Nzambi. Nudi numona cîndi muswe kwamba anyi? Nudi bumvwe mmwenenu awu anyi? Yèyè uvwa . . .

⁹³ Bivwa bikengela Yèyè kulwa mu mubidi wa buntu, bwa. . . nenku muntu nansha umwe, kakuyi dijinga dya disangila dya mulume ne mukaji to. Bwalu aci cidi cijaadika cyakabidi dîyì dyetu ditudi bambe pa dimiinu dya nyoka, nwamonu's, "disangila dya mulume ne mukaji," kakuyi mpatà to anu disangila dya mulume ne mukaji. Kaciyi bimuma bya pommès to; disangila dya mulume ne mukaji! Ncya bushuwa. Bivwa bikengela kwikalaci cyôci aci. Monaayi mwab'ewu, nwamonu's, bwalu muntu mwîmpè kana yônsò ewu. . . Tangilaayi baprofeta baa kale abu, kadi bivwa bikengela Yèyè kwikala mutambe

muprofeta. Nwamonu anyi? Bwa kwenza ciine aci, bivwa bikengela Yèyè kuvwila ku dilediibwa dya kudi virgo, bileeja ne dilediibwa dya kudi virgo adi divwa dijaadika. . . Bivwa bikengela Yèyè kulediibwa kudi virgo, bwa kuumusha mulawu, Ncipaja-mulungù awu. Nudi numona cìndì muswe kwamba aci anyi? Pa nanku, bivwa bikengela ciikàle disangila dya mulume ne mukaji. Yèyè wakacijaadika ku dilwa Dyende Yèyè mwine; Yèyè kaakalwa ku dijinga dya disangila dya mulume ne mukaji to, kadi ku dilediibwa dya kudi virgo. Nenku Wakashintulula cibwikilu Cyende cya kwìsù kuumuka ku Yehowah kuya ku Yesu, bwa kwangata mudimu wa bupikudi mu dinaya divwaYe munkaci mwa kunaya adi, mu Nzambi ku nkuruse.

⁹⁴ Beena Ngelika baakaswa bwa kuMumona. Mu Yone Munsantu 12.20, bààbûngì baa kunudi bakaadi bangumvumvwe nyiisha pa cyôci aci ngamba ne: “Bakalenge, tudi tujinga kumona Yesu.” Nuvwa bamone aci anyi?

⁹⁵ Mpindyewu, beena Ngelika abu bavwa bamanyi baa mabàla, bavwa bantu banene. Kabidi bavwa ne—bavwa ne—dijinga dinene bwa Nzambi, muvwa Pòlò ubayiisha pa kakuna kaa Mars apu. Kabidi bôbò, bôbò—bôbò mbavwa baleeji baa dikàsà—baleeji baa dikàsà bwa buloba bujima mu maalù a mamanya ne—ne a bulongeshanganyi, bavwa bantu banene. Kadi bavwa bakuukwila ne biitabuuja miyiiki mikwatakaja ne bintu bya nanku awu, mikanda ya dyenza dya mpingu ne bimfwanyi ne mpingu ne bimfwanyi biine abi bya bikoka ntema, ne bikwabo.

⁹⁶ Kadi baa—baa—baakalwa bajuukile kuulu bwa Muntu ewu Uvwa mwa kwondopa babeedi ne kudyanjila kwamba maalù àvwà ènzekà, pyòpyopyò. Ki bôbò kulwa bajuukile kuulu, pa nanku kulwabo bwa kuMumona. Mpindyewu, tangilaayi ne ntema mpindyewu, eci kacinupiciku to. Nwamonu anyi? Ke kulwabo ne kwambilabo Filipino, uvwa wa mu Beteseda awu ne: “Mukalenge, tudi tujinga kumona Yesu.” Ki Filipino ne muyiidi mukwabo kuyabo nende kudi Yesu, bwa kumona Yesu.

⁹⁷ Mpindyewu monaayaaku mèyì mene akabandamuna naawu Yesu, bwalu bôbò bavwa balwe kumona ne Yèyè uvwa Nganyi, kadi kabaakapeta mushindu wa kuMumona to. Baakamona mmwenekelu, kadi Yèyè uvwa mu ntempelu Wende. Nzambi uvwa mu ntempelu Wende, mubwikila mu mubidi wa buntu. Monaayi mèyì akambaYe: “Lutete lwa blé lwôlò kaluyi lumate mu buloba, nwamonu’s, ne kaluyi lufwe to, ludi lushaala nkaayaalu.” Nwamonu anyi? “Dìbà dyamanyi kulwa, nedilwe kataataka dyatumbishiibwa Mwànà wa muntu, nwamonu’s, nenku Ûdi ne cya kuumuka pa buloba ebu. Nenku diine dìbà adi kadiyi dilwe to, kanwakupetaku mushindu wa kuCimona to.” Nwamonu anyi?

⁹⁸ Mwab’ewu, bwa cinyi kabavwa mwa kumona Yesu? Ûvwa mujike cibwikile kwìsù. Nzambi uvwa mujike cibwikilu kwìsù.

Beena Ngelika bavwa bakebaku Nzambi kampana, s’ki Yêyè ewu, kadi kabavwa mwa kuMumona to bwa cibwikilu. Nenku ncintu cimwecimwe aci leelu ewu, kabeena mwa kuMumona to bwa cibwikilu. Cidi pa mpala yabo. Beena Ngelika aba bavwa bababwikile kwîsù, anyi Yesu nguvwa mubwikila kwîsù bwa beena Ngelika aba.

⁹⁹ Monaayi, Wàkabàmbila ne: “Lutete lwa blé elu lwôlò kaluyi lumate mu buloba to, ludi lushaala nkaayaalu.”

¹⁰⁰ Bôbò, kabavwa mwa kuumvwa ne mmunyi, ne mbwa cinyi kabavwa mwa kuMumona to. Muntu nyawu uvwa mwimane mwaba awu. Bôbò bavwa balwe bwa kumona Nzambi, kadi kumonabo muntu. Nwamonu anyi? Kabavwa mwa kumona Nzambi to bwalu Nzambi uvwa mubwikila bwabo bôbò. Mpindyewu shalaayi bakwàtea aci mu lungenyi, Nzambi uvwa mubwikila mu muntu. Bavwa mwa kwamba ne: “Muntu nansha umwe kî mmufwanyineku kwenza ebi byenzedi to anu mwikàle Nzambi. Muntu nansha umwe kèna mwa kucyenza to, kadi muntu’s nyêyè ewu mwimane apa kadi nansha nanku byenzedi bya Nzambi bimweneshiibwa kudiYe!” Nwamonu’s, kabavwa mwa kuumvwa ne Nzambi uvwa mubwikila to.

¹⁰¹ Yêyè mmubwikila mu muntu, anu muvwaYe mubwikila misangu yônsò amu. Kadi, Ûvwa mubwikila bwabo bôbò, Ûvwa mu ntempelu Wende wa buntu. Nzambi uvwa mu ntempelu wa buntu. Mpindyewu, nwikalè badimuke bikole, mpindyewu Yêyè udi umwèumwè awu makeelela, leelu, too ne kashidi. Nwamonu anyi? Nzambi mubwikila, usokoma Yêyè mwine baa pa buloba, mubwikila mu muntu. Nwamonu anyi? S’ki Nzambi ewu uvwa mwaba awu! Beena Ngelika abu bamba ne: “Tudi tujinga kuMumona.”

¹⁰² Ki Yesu kwamba ne: “Bikengela lutete lwa blé lumate ne lufwe.” Bikengela ufwe ku mmwenenu yebe yônsò ayi. Bikengela upatuke mu meeji ebe wêwè awu awu.

Mushindu uvwa bayiidi abu, kabavwa mwa kuumvwija pa bivwa bitangila kudya kwa mubidi Wende ne—ne kunwa kwa mashi Ende to, kadi, nwamonu’s, bakaavwa bôbò bamane kufwa ku bintu abi. Bavwa bafwe ku Dìyì dikulu kampana, bavwa bafwe bwa Kilsto. Nansha ciikàle cinyi, anyi muvwi bimweka bu ne Yêyè uvwa mucimunyiibwe amu, bôbò bavwa anu baCîtàbùùje nansha bya munyi. Nwamonu anyi? Bavwa mwa kumona munda mwa Muntu awu; Muntu mwikàle udyà, unwa, uloba, ulaala, ne bikwabo byônsò, mulediibwe pa buloba apa, ne wèndakana naabo, ùyiikila naabo, ùvwàla bilàmbà anu mudi bantu bônsò amu, kadi mwikàle Nzambi.

¹⁰³ Pa nanku beena Ngelika abu kabavwa mwa kuMumona to, bwalu Ûvwa musokome ku mèsù kwabo, mu muntu. Monaayi Dìyì Dyende kudibo: “Lutete lwa blé elu lwôlò kaluyi lumate mu buloba to.”

104 Nzambi mubwikila mu mmwenekelu wa muntu, muDisokoke ku dimona dyabo. Bavwa mwa kumona anu muntu. Kadi Badyànjila kulongolola abu baakamona bôbô Nzambi. Ewu umona muntu, mukwabo yêyè umona Nzambi. Nwamonu anyi? Nenku ùvwa n'Nzambi mubwikila mu muntu, mwikàle wenza ne bônso babidi abu biikàle babinge, kadi diitabuuja dyebe mu cyûdi kuyi umona aci. Udi uciitabuuja, nansha bya munyi. Nzambi mubwikila mu muntu. Ûvwa mu mubidi awu, ne mubidi awu nguvwa cibwikilu Cyende. Cilàmbà cikudika cyakapandika, nwamonu's, bwa Nzambi wamona mwa kumweneshiibwa.

105 Mu Dipungila Dikulukulu, Nzambi uvwa musokoka pavwaYe pa nkwaswa Wende wa ngàsà; pa nkwaswa wa ngàsà, kùdi cilàmbà cikudika. Mu Dipungila Dikulukulu, Nzambi uvwa mu ntempelu Wende. Kadi bantu bavwa balwamu ne bakuukwila mushindu ewu, kadi, vulukaayi ne, kuvwa cilàmbà cikudika (amen) civwà cisokokà Nzambi. Bavwa bamanye ne Nzambi uvwa muntwamu. Kabavwa mwa kuMumona to. Dikunji dya Kapyà adi kadyakamwenekaku kabidi muntwamu to. Nukaavwaku bamone anyi? Kakwena musangu nansha umwe mu Mifundu, kubangila musangu wakabwela Dikunji dya Kapyà adi paanyima paa cilàmbà cikudika aci awu, ukaavwaDi dimwenekeku cyakabidi to, too ne paakalwaDi difumine kudi Yesu Kilisto apu. Nzambi uvwa mubwikila!

106 PaakiimanaYe pa buloba, Wàkamba ne: "Ndi mufume ku Nzambi ne Ndi nya ku Nzambi."

107 Pashiisha Pòlò, (paanyima paa lufu Lwende, dijiikiibwa, ne dibiika dya ku lufu), wenda uya mu njila wa ku Damaseke, ki Dikunji dya Kapyà adi cyakabidi. Divwa cinyi? Dipatuke paanyima paa cibwikilu! Butumbi kudi Nzambi's we!

108 Ûvwa munda amu paanyima paa cilàmbà cikudika. Mpindyewu Ûvwa paanyima paa cinyi? Paa cilàmbà cikudika cya biseba. Nwamonu's, "biseba bya tusengelanshimba," paanyima paa cilàmbà cikudika. Kadi pàakapandikà cilàmbà cikudika aci dituku dya dipoopediibwa dya pa nkuruse, cibwikilu civwaYe mukuciibwemu cyakapandika mu dituku dya dipoopediibwa dya pa nkuruse adi, nkwaswa wa ngàsà mu kaabujima wakashaala mumweneke patooke.

109 Mpindyewu, beena Yuda kabavwa bafwanyine kuumvwa ne mmunyi mudi Nzambi mufwanyine kuleeja luse kudi cisamba cibiipe, cikooyike bu twètù aba to. Kadi kabavwa mwa kumona Yêyè mwine Ûvwa uleeja luse ewu to, bwalu Ûvwa musokoka. Ûvwa paanyima paa nkwaswa wa ngàsà, lwà munda, ne biseba bya tusengelanshimba bilembelele, biMubwikile. Kumpala . . .

110 Kumpala, muntu nî nganyi nî nganyi mudidinge mubwele paanyima paa cilàmbà cikudika aci, civwa ndufu lwa cikadi. Amen. Kaa, netwikalè mwa kupeta dileesona mwab'ewu mu

katanci aka, nwamonu's, bu nwênù mwa—bu nwênù mwa kuCyakidila. Kubwela paanyima paa biseba abi...Nansha mùvwà umwe wa ku bânà baa balume baa mwakwidi wâkateeta kucyenza musangu kampanda, s'wàkafwa. "Kanuyi paanyima paa cilàmbà cikudika aci to." Muntu uvwa uya paanyima paa...Bwa cinyi? Kakuvwa kwanji kwikala bupikudi to, mu cyôci aci. Buvwaku mu mushindu mushaadile. Buvwaku anu mu mushindu mushaadile. Ne cintu cyônsò cya *mu mushindu mushaadile* kî ncyanji kwikala cintu cya menemene to, nwamonu's, cidi anu mu mushindu mushaadile. Buvwa mbupikudi...Mpekaatu uvwa mubwikila, kayi muumusha to...mulekelediibwe's we, eyo, kayi mulekelediibwe to. *Mulekelediibwe* mbwena kwamba ne "kushipa dibaka kadi kwipata." Nenku mashi a mikooko ne a mbuji kaàvwaku mwa kwenza aci to, pa nanku Yehowah uvwa musokoka paanyima paa cilàmbà cikudika. Mpindyewu, paanyima paa cilàmbà cikudika eci pavwaYe musokoka apu, kubwelamu, muntu uvwa udishinda ufwa cikàdi, bwa kuteeta kubwelaMu.

¹¹¹ Kadi kubangila anu dya Mpenta, kubangila anu pa Dipoopediibwa dya pa nkuruse, pààkapandikà cilàmbà cikudika aci kuumukila kuulu too ne kwinshi, bwa lukongo alu... Yesu nguvwa Nzambi awu, mubwikila. Kadi paakafwaYe ku Kalvariyo, Nzambi kutuma kapyà ne mukenyi, ne wakapanda cilàmbà cikudika aci kuumukila kuulu too ne kwinshi, bwa nkwasà wa ngàsà yônsò ashaale mumweneke patooke. Kadi bôbò bavwa batambe kufofoma bya kabayi mwa kuCimona. Bu mwakamba Mòsà mwab'ewu, nansha nanku, anyi...Pòlò ngwàkamba, bwa dibala dya Mòsà ne: "Padibo babala Mòsà, too ne mpindyewu, cilàmbà cikudika aci ciciidi anu pa myoyi yabo." Kaa, mwaneetu wa balume, mwaneetu wa bakaji, s'ki cyakenza beena Yuda pààkapandikà cilàmbà cikudika aci ne kushiya Nzambi mumweneke patooke, mukudika ku nkuruse. Yèyè's wakashaala mumweneke patooke, kadi bôbò kabayiku mwa kuCimona.

¹¹² Mbifwanyine kwenzeka ne baa Bisamba bya bende biikàle benze cintu cimwecimwe aci anyi? Éyì Nzambi wa yaaya! Padibo bapete bikondo bya ekeleeziya, bya Mwànà wa Nzambi abi; kadi padi mpindyewu cibwikilu cya mangumba ne bikwabo ebi, cibwikilu cya bilele citudi naaci kacya ku Mpenta eci, padi bilele bya ekeleeziya bipandiibwe, bintu bivwa bantu bamba ne: "Matuku a bishima akaadi mapite, ne bintu ebi," kadi Nzambi ùmushì cibwikilu pa Cyôci aci, ne wăCishiyi cimweneke patooke, kadi bôbò badi pabwipi ne kuCipoopela cyakabidi pa nkuruse, bifwanangane anu menemene.

¹¹³ Nzambi mubuulula awu, mumweneke patooke, bôbò's bivwa bikengela kwikalabo baMumone mwimane pààpa's. Kadi Úvwa mutambe kwikala wa patupu, Úvwa muntu wa ciibidilu. Kabavwa mwa kuCimonaku to. Nwamonu's, ki

muntu nyawu uvwa mwimane pààpa. “Ee,” mwakambabo, “mulumyana mwine ewu, mMupatukile mu cilongelu kaayi’s?” Kadi, vulukaayi ne, pààkatùbulà difuma adi mubidi Wende, Nyuma awu wakaMushiya, ntempelu. . . mishiki ya milambu ayi yakapumuka, ki mukenyi kwelawu mu ntempelu ne kupandawu cilàmbà cikudika. Civwa ncinyi aci? S’ki Nzambi wabo wawa mukudika ku Kalvariyo, kadi bôbò batambe kufofoma mu mushindu wa kabayi mwa kucimonaku to.

¹¹⁴ NciMushiye mumweneke patooke, kadi kabayi anu baCimona to! Mbafofomijiibwe. Nzambi, mubwikila mu muntu!

¹¹⁵ Nudi bavuluke ne, Yêyè wakaalukila pashiishe kudi Pôlò paanyima paa ciine aci, ne kudi Peetelo mu buloko, bu Dikunji dya Kapyà. Nudi bavuluke aci anyi?

¹¹⁶ Kadi mu matuku a ndekeelu Yêyè udi ne cya kwalukila cyakabidi, kadi Dikunji dya Kapyà didi ne cya kwalukila cyakabidi bwa kumwenesha Mwânà wa muntu, nwamonu’s, bwa kuleeja Dîyì, Bukènkè abu. Bilele, bikaavwàku abi, nebyumushiibwe. Kakwakwikalaku cintu nansha cimwe cìikalà mwa kuCipangisha to; necyenjiibwe, nansha bya munyi. Nzambi udi anu upanda mangumba awu ne bilele abi.

N’Nyuma wa mushindu kaayi WênzaYè nende ciine aci? Anu mwakenzaYe musangu wa kumpala amu. Tangilaayi numone cyakenzaYe mu matuku a Eliya, mu matuku a Yone. “Kanwikadi nwadyambidila munda mwenu amu ne nudi ‘ne Abraham bu taatù’ to, bwalu Nzambi udi ne bukole bwa ku mabwe aa kujuudila Abraham bânà.” Nwamonu anyi? Kanwikadi nwadyambidila ne: “Bwalu, ndi wa mu *cikampanda* ne ndi wa mu *cikansanga*” to. Nwamonu anyi? Nzambi munkaci mwa kupanda cibwikilu, nwamonu’s, bwa kuleeja ne Yêyè udi Nganyi. Nwamonu’s, tangilaayi cibwikilu paadici cipandika mwab’ewu mpindyewu, tudi tujandula mpindyewu.

¹¹⁷ Mpindyewu, cikondo kampanda, bu muntu mwa kuya dyamwamwa dya cilàmbà cikudika aci, civwa ndufu lwa cikàdi. Mpindyewu ndufu bwa kubenga kuya dyamwamwa dya Cyôcì aci! Amen. Pawikala kuyi mwa kupanda cibwikilu cya bilele aci, kupanda kuya dyamwamwa dya cimanu cya dingumba aci, bwa kumona Nzambi mu bukole Bwende, ndufu. Mu cikondo kampanda pavwabi ne ndufu bwa kubwelamu, mpindyewu ndufu bwa kushaala pambelu. Nkwasa wa Ngàsà mu kaabujima kende mmushaale mumweneke patooke, muntu kana yônsò ewu udi mwa kuMumona, cibwikilu ncipandike. Butumbi kudi Nzambi’s we! Nkwasa wa ngàsà mu kaabujima mmulwe mumweneke patooke.

¹¹⁸ Mushindu mwine udi Nzambi mufwanyine kuleeja luse kudi bangènzàmpèkààtù bakooyike bu mudi twètù aba’s we, pavwaYe muDisokoke apu, s’civwa bwalu busokoka. Kadi mpindyewu Cikaadi cimweneke patooke, anyi patooke tòò, cibuulula kudi

Dìyì Dyende. Cidi misangu yònsò anu Dìyì, ku musangu ne ku musangu, didi diikàle Nzambi. Dìyì ndidi dicikàngulà dicishiyà patooke. Bu bantu abu mwa kwikalapù bamanye Dìyì dya Nzambi mu dituku adi paakafwa Yesu apu, nunku's mbamone Nkwasa wa Ngàsà awu, nunku's mbamone ne Yèyè uvwa Nganyi.

¹¹⁹ “Nenku mwine Awu uvwa nganyi? Cilàmbà cikudika cyakapandika bwa cinyi?” Vulukaayi ne, civwa ndufu bwa kubwelaMu. Muntu nansha umwe kavwa mwa kuCimonaku nansha. Mòsà wakaCimona mu mmwenekelu kampanda, Civwa mvund- . . . civwa—nyima wa Muntu. Ee, s'ki Cyòci eci, nyima utuuka mashi, Muntu umwèumwè awu! Civwa ncinyi Aci? Nzambi uvwa muswe kubaleeja Nkwasa wa Ngàsà. Nzambi uvwa muswe kubaleeja ne Yèyè uvwa Nganyi. Pa nanku cilàmbà cikudika mu ntempelu, ku cyanza cya Nzambi, kuulu, cyakapandika kubangila anu kuulu too ne kwinsi, ki kuleejaci Nzambi mushaale mumweneke patooke. Úvwa n'Yesu Kilisto mukudika ku nkuruse, Nkwasa wa Ngàsà awu. Kadi civwa ncinyi? Bantu bavwa batambe kufofoma mu mushindu wa kabayi mwa kuCimonaku to.

¹²⁰ Mpindyewu ncyenzeke cyakabidi, bilele byabo abi! Mushindu uvwabi ne, cikondo aci, mu Dituku dya Mpenta adi, Dìyì dilwe ne diikàle mu mmwenekelu wa “Mwànà wa Nzambi.” Kadi kubangabo kucivwija bulongolodi ku Nicée, Loomo. Nenku, katanci aka, kuyabi kudi ba-Méthodistes, ba-Baptistes, ba-Presbytériens, beena Mpenta, ne bikwabo. Ncilele civwijibwe bulongolodi mu mushindu wa muntu kaciyiku mwa kumanya padiye mwimanyine to.

Kadi, butumbi kudi Nzambi, Yèyè wakalaya civwaYe mwa kwenza mu matuku a ndekeelu. Úvwa mwa kuleeja Dìyì Dyende dimweneke patooke, kukangula kumpala kwetu cyakabidi, nwamonu's, kukangula ne kushiya Dyòdi adi patooke.

¹²¹ Bìikalapù nanshà bamanye Dìyì, nunku's mbamanye ne Yesu uvwa Nganyi. Muntu wikalapu nanshà mumanye Dìyì dya Nzambi, nunku's mmumanye dībà ditudi ne mwoyi ne cidi munkaci mwa kwenzeka. Bòbò badi anu babenga kuteeleja Dìyì adi. Bilele byabo! Cyàkafikishà beena Yuda abu ku dimonabo mushindu awu ncinyi? Cinyi? Paabi's bivwa bimweke anu bu ne bavwa bulelela mwa kwikala bamone, bwalu's cintu aci cyakapandiibwa ne kukangudiibwa. Cyakapandiibwa ne kukangudiibwa bwa kiipacila kampanda.

¹²² Ditabuluja edi nditungunuke mpindyewu bwa cinyi? Mmunyi mudidi difwanyine kutuuta dyakalenga? Mmunyi mudidi difwanyine kubeneshiibwa? Nansha dyòdi dipeta ditentula bûngi kaayi, anyi ní ncinyi cikwabo cyònsò, aci kaacyena. . . Pààkapatukà Mòsà, kuvwa musumbà wa bantu basopakane bàakapatukà nende. Kadi mbyenjiibwe nanku bwa cinyi? Yehowah nkaayende ngudi munkaci mwa kuumusha

cibwikilu pa Nzambi, bwa kuleeja dishiilangana pankaci paa bulelela ne mashimi. Ki banganyi, ki ba-Méthodistes anyi, ki ba-Baptistes anyi, anyi ki ba-Presbytériens, badi mu bulelela? Dìyì dya Nzambi ndidi dilelela! “Dìyì dya muntu yònsò diikalè mashimi, kadi Dyanyi diikalè Bulelela.” Nzambi kèna dijinga ne muumvwiji to. Yèyè udi wenza dyumvwija Dyende Yèyè mwine. Ûdi uCimwenesha, ne umwen- . . . aci cifila dyumvwija. Nzambi mwikàle uDibuulula. Kaa, ekelekele! Anu munkaci kwetu mene, tudi tumona cyanza Cyende cinene munkaci mwa kwamba maalu aa, cyenza maalu aa.

123 Ndi ne cintu kampanda pa bwine bwalu abu diloolo edi, nwamonu’s, mushindu wa kutangila cyanza cya Nzambi, cidiCi cyenza, mudiCi cidivungulula. Nwamonu anyi?

124 Kadi bantu badi bamba ne: “Kaa, Aci’s ndukutukutu. Aci’s ndikolesha dya maalu mwaba awu. Kakwena bwa nsongo mu Cyòci aci to. Aci’s ndukutukutu. Aci’s m’Beezebula. Aci’s ndémon. S’ndubuku. Aci’s *ncikampanda*.” Nwamonu’s, cintu cimwecimwe cyakambabo Bwende Yèyè aci’s.

125 Éyì ekeleeziya, mukaba wa mēyì ewu wòwò mupatuke, kanwenaku mwa kumona anyi, nwènù bambi baa Evanjeeliyo, mwaba unukaadi ne mwoyi? Kanwenaku mwa kumona ne mmu dîbà kaayi mutukaadi anyi? Nzambi, uDileeja, uteeka ku luseke. . . Tangilaayi, Yèyè’s ngwákangata cilàmbà cikudika cya mu ntempele aci e kucipanda bipese, bwa kumonabo Nzambi mumweneke patooke, kadi bôbò bavwa batambe kwikala bampofo bya kabayiku mwa kuCimona to. Ne Yèyè mmwenze cintu cimwecimwe aci leelu, muzanjike Dìyì Dyende kumpala, ciine cyakalayaYe aci. Mulayi wònsò mu Dìyì, muteekiibwe anu kumpala kwetu menemene, patooke tòdò!

126 Nudi bamanye cidi ekeleeziya wa baa Bisamba bya bende wenza anyi? Cintu cimwecimwe cyàkenzà ekeleeziya wa beena Yuda aci, batambe kufofoma bya kabayiku mwa kuCimona to. Kwajiki. Neciikalè pa myoyi yabo anu muvwabi mu dituku adi amu.

127 Monaayi, ndufu, bwa kushaala kule ne Cyòci aci mpindyewu. Udi ne cya kubwelaMu kuya dyamwamwa dya cibwikilu eci, bwa cyanaana kwakwangula mpasu to. Mushindu mwine uvwa Nzambi mwa kubaleeja luse, kadi vulukaayi ne civwa ncinyi, Nzambi awu ngudi munkaci mwa kumwenesha civwa paanyima paa cibwikilu aci. Tangilaayi numone civwa paanyima paa cibwikilu aci, Dìyì! Civwa cibwikile cinyi? Dìyì! Civwa ncinyi? Cidi mu musheete wa cipungidi. Civwa n’Dìyì divwa cibwikilu aci cisokoke. Nwamonu anyi? Kadi Yesu nguvwa diine Dìyì adi, ne Yèyè udi Dìyì adi, nenku cibwikilu cya mubidi Wende ncivwa ciDisokoke.

128 Ne leelu ewu cibwikilu cya bilele cidi cisokoka cyakabidi Dìyì, cyamba ne: “KaDyena nanku to.” Kadi’s Didi nanku!

Nzambi ngudi ufidila Dyôdi adi bujaadiki, utuuta Yêyè mwine dikubakuba mwikàle ne dibàlakana bu dya dibà, kumpala kwa muntu ne muntu, kadi bôbò bapanga kuCimona. Nzambi, ikalaku neetu luse.

¹²⁹ Mu cifwanyikijilu, Môsà ufumina mu Bwikadi bwa Nzambi, ne Dîyì dya Nzambi bwa cikondo aci. Mpindyewu tangilaayi, tudi mpindyewu mu Ekesoode 19. Eci mpindyewu kacinupiciku to. Ekesoode 19, Môsà udi ufumina mu Bwikadi bwa Nzambi, anyi 20 ne 21, 19.20 ne 21. Môsà udi ufumina mu Bwikadi bwa Nzambi. Ûvwa mubwele mu Dîyì. Dîyì dyamanyi kufundiibwa. Kadi yêyè, mu Bwikadi bwa Nzambi, mwikàle ne Dîyì, ùvwa ne Dîyì bwa cikondo aci. Kudi Dîyì bwa cikondo cyônsò. Nenku Môsà upatuka, mpala wende uvwa ùbàlakana bikole be! Nwamonu anyi? Dîyì divwa munda mwende, pabwîpi ne kumweneshiibwa, kufidiibwa kudi bantu.

¹³⁰ Dîyì dilelela, Nzambi nguvwa muDifunde, kadi Divwa kudi Môsà. Monaayi, Divwa kudi Môsà ne diikàle pabwîpi ne kumweneshiibwa. Yêyè nguvwa Dîyì bwabo bôbò, ùvwa Dîyì didi ne mwoyi, disokoka. Ûvwa mudibwikile yêyè mwine, bivwa bikengela bwa Môsà ateeke cibwikilu pa mpala pende yêyè. Bwa cinyi? Yêyè nguvwa Dîyì adi. Amen. Too ne pavwa Dîyì adi mwa kumanyishiibwa, bivwa bikengela Môsà adibwikile. Amen!

Nudiku nuCimona anyi? Mwaba wônsò udi Dîyì, nDibwikila.

¹³¹ Môsà nguvwa ne Dîyì. Mpindyewu vulukaayi ne, paanyima paa Dîyì dimane kumweneshiibwa, Môsà uvwa cyakabidi Môsà. Nwamonu anyi? Kadi dibà divwa Dîyì adi munda mwende bwa kufidiibwa adi, yêyè uvwa Nzambi; ee, yêyè kacivwa kabidi Môsà to. Ûvwa ne Dîyì dya Mukalenge bwa cikondo aci. Cintu nansha cimwe kacivwaku mwa kumulenga to too ne pavwa aci mwa kujika; yêyè nguvwa ne Dîyì adi. Pa nanku, ki bwa cinyi, pavwaye ulwa, bantu bavwa batuma mpala ku luseke; kabavwa mwa kuumvwa to. Bakaavwa bashintuluke. Yêyè ukaavwa muntu mushiilangane. Ûvwa ulwa ne Dîyì adi. “Nenku ùvwa uteeka cibwikilu,” mudi Bible mwambe, “pa mpala pende,” bwalu ùvwa ne Dîyì. Ne yêyè uvwa Dîyì bwabo bôbò.

¹³² Mpindyewu tangilaayi, piikala Môsà...Éyì mwaneetu, mwab'ewu nepiikalè cipendu's. Kadi piikala Môsà...Bu mudi Pôlò mwambe mwab'ewu mu Kolinto Mwibidi, nshapita mwi3. Piikalabi ne byakakengela bwa Môsà kwikalaye ubwikila mpala wende ne Butumbi bwa mushindu awu pa mpala pende...nwamonu's, bwalu abu buvwa mbutumbi bwa mubidi, ayi yivwa mmikenji ya mubidi. Kadi piikala Môsà, mumanye ne mikenji ayi yivwa ne cya kubutuka, kadi Butumbi abu buvwa bunene menemene mu mushindu wa ne bwakafofomija bantu, mu mushindu wa bikengela kuteekabo cibwikilu pa mpala pende, kadi neButambe kwikala munyi? Bantu bafofomija mu nyuma

naanyi's we! Uh-huh. Butumbi abu buvwa ne cya kujimina, kadi ebu Butumbi bwôbò kabwakujiminaku to. Nwamonu anyi? Mòsà uvwa ne mikenji ya musunya, dipiishangana, kakuyi ngàsà to, cintu nansha cimwe; yivwa yôyì anu yikupiisha. Kadi Eyi yitudi twamba ebu. . . Yôyì ayi kayivwaku ne difwilangana dya luse to, yivwa yikwambila anu cyúvwà. Eyi yidi yikupa njila wa dipatukila.

¹³³ Nenku padi Dîyì adi dibuuludiibwa, kaa, ekelekele, neDìikalè mpala wa mushindu kaayi? Nebikengele kwikalaDi dibwikila's. Bikengela Dìikalè dibwikila. Mpindyewu monaayi. Pa nanku Nyuma mmubwikila mu ntempelu wa buntu, nwamonu's, bwa Yêyè kwakula wamba mēyì a mubidi ne cibwikilu cya mubidi.

¹³⁴ Mpindyewu, Pòlò udi wakula mwab'ewu mpindyewu, ne mu mushindu ewu—ewu, Dîyì-Nyuma ne: "Tudi bambi, kabayi baa dileeta, baa mikenji to; kadi bambi bakumbane baa Nyuma," mu mushindu wa ne Nyuma udi wangata dileeta ne uCimweneshe.

¹³⁵ Aci civwa anu mikenji pa yôyì, bivwa bikengela wêwè kuya kutapaku dîsù, kwamba ne: "Kwendi masandi. Kwibi. Kushimi. Kwenji *cikampanda*, *cikansanga*, anyi *cikankenga*." Nwamonu anyi? Bivwa bikukengela kwikala kutapaku dîsù.

¹³⁶ Kadi eci n'Nyuma udi ulwa pa Dîyì dilaya bwa cikondo *eci*, mwikàle upatula ne umwenesha, kacìyi bipese bibidi bya mabwe to, kadi Bwikadi bwa Nzambi udi ne mwoyi. Kacìyi meeji mafwikakaja adi muntu kampanda mukwatakaje, anyi Houdini kampanda, diyèlè kampanda nansha; kadi mulayi mwine wa Nzambi mubuulula ne mumweneshiibwe anu kumpala kwetu mene. Mpaanyima paa cibwikilu cya mushindu kaayi piikala cyôci aci? Kadi ku—kujimija aci. . .

¹³⁷ Nwamonu's, aci civwa cinene bikole mu mushindu wa nansha bantu biine kwambabo, kwambabo paakamonabo Yehowah upweka mu Dikunji dya Kapyà edi, ne ubanga kukankisha buloba, ne—ne bintu byakenzaYe abi, ne mukuna mukwate kapyà. Nenku nansha bu ne muntu nansha yêyè nganyi muteete kuya ku mukuna awu, uvwa ufwa. Civwa cinene bikole mu mushindu wa ne nansha Mòsà mwine wakakwacika bwôwà bwa dikanka dya buloba. Nenku, piikalabi ne musangu awu Yêyè wakakankisha anu mukuna nkaayaawu, ewu musangu Yêyè neakankishe maulu ne buloba.

¹³⁸ Kadi bishi bwa Ebu Butumbi? Piikalabi ne bwabwa buvwa bubwikila ne cibwikilu cya mubidi, ebu bwôbù budi. . . bubwikila ne cibwikilu cya nyuma. Pa nanku kanwikadi nukeba bwa kutangila ku cya mubidi to; bwelaayi mu Nyuma numone ne nudi penyi, numone ne mmu dîbà kaayi mutudi ne mwoyi emu.

¹³⁹ Cidi cyumvwika cya meeji kunudi anyi? Nwamonu's, cibwikilu cya nyuma ncidi pa bantu, bamba ne: "Mémè ndi Méthodiste. Ndi mwîmpè anu mudi nî nganyi yònsò amu. Mémè

ndi Baptiste. Ne mêmè ndi mwena Mpenta.” Kanwenaayiku nufika ku dyumvwa ne, cintu aci ncibwikilu cya bilele anyi? S’cidi cinusokoka Nzambi. S’ki bintu bidi binupangisha bwa kusankila byônsò. . .

Kaa, wêwè udi wamba ne: “Mêmè’s ntu ngeela ne mbila ntupika nya muulu.”

¹⁴⁰ Yêyè mmwambe ne: “Dîyì dyônsò!” Eva uvwa mwitabuuje Dîyì dyônsò pa kuumusha dimwepele. Nwamonu anyi? N’Dîyì dyônsò dya Nzambi mu kaabujima, mulayi wa dîbà edi mumweneshiibwe. Nwamonu anyi?

¹⁴¹ Monaayaaku mpindyewu patudi tutungunuka apa. Ndi ne byàbûngî be mwab’ewu bya dyamba, kadi ndi ne mabeji matwe ku makumi abidi, kadi bidi. . . a—a bîndî mufunde, kadi ncyà—ncyakwakula pa byônsò abi to. Nwamonu’s, nêndwîjakajê.

¹⁴² Yêyè mmubwikila ne cibwikilu cya mubidi kumpala kwa kwambilaye bantu Dîyì adi. Mpindyewu, bidi bikengela bwa Nzambi aDibwikile, bu mutuYe mulaye, mu mubidi wa buntu. Nzambi! Nudi nuCyumvwa anyi? Bikengela Nzambi aDibwikile mu mubidi wa buntu, ne ateeke cibwikilu cya nyuma pa mpala paabo, (bamba ne: “Ee, ndi *cikampanda* ne ndi *cikansanga*”), bwa kwakula ne bantu. Padi cibwikilu aci, ciikàle cibwikilu cya bilele, padici cipandiibwa, dîbà adi. . . cidibo bamba ne: “Mona’s, matuku a bishima’s akaadi mapite.”

¹⁴³ Mulumyana kampanda kungambilaye dituku dikwabo, muyiishi kampanda—kampanda mutekete wa ba-Baptistes kuntu kwaka, kulwaye kûndî, Mwaneetu Green, kwambaye ne: “Mwaneetu Branham, cintu cimwepele cîndi nciyi mpetangana neebe ncyôci eci.” Yêyè ne: “Wêwè udi ukeba kufikisha bantu. . .” Kuvwa nku Ramada Inn kwaka, patuvwa ne disangisha kwôkò aku. Yêyè ne: “Udi ukeba kufikisha bantu ku diitabuujia cikondo cya bapostolo, bwa kwikalabo ne nsòmbelu leelu ewu byenze bu uvwabo nende mu cikondo cya bapostolo.” Yêyè ne: “Cikondo cya bapostolo’s cyakajika ne bapostolo.”

Mêmè ne: “Cyakajika?”

“Eyowa’s.”

Mêmè ne: “Mwakudi wa mu cikondo cya bapostolo uvwa nganyi?”

Yêyè ne: “Bapostolo dikumi ne babidi mu nzubu wa kuulu.”

¹⁴⁴ Mêmè ne: “Nanku’s Pôlò uvwa muumushiibwemu.” Mêmè ne: “Mwakudi uvwa m’Peetelo. Kadi Peetelo wakamba, mu Dituku dya Mpenta, paakamonabo byônsò ebi byenzeka, ne Nyuma Mwîmpè ukwata mudimu, wâkamba ne: ‘Mulayi udi kunudi nwênù, ne kudi bânà beenu balela, ne kudi aba badi kule, mu bûngî bwônsò bwabiikila Mukalenge Nzambi wetu abu.’ PiikalaYe uciidi ubiikila, nanku’s Cintu cimwecimwe aci cidi mwab’ewu. Cikondo cya bapostolo ncijike dîbà kaayi

mwaba awu? Cikondo cya bapostolo's cidi cijika padi Nzambi ujikija kubiikila.” Kî mmwambe bwalu nansha bumwe to kadi mmwenze wambula anu cifulu cyende nyêye uyaaya wawa.

145 Bikengela Dîyì bwa kucyenza. N'Dîyì. Yesu wakambila Sataana ne: “Baakafunda ne.” Nwamonu anyi? Ki cyôci aci: “Baakafunda ne.”

146 Mêmè ne: “Peetelo ngwâkamba ne kacadyakujikaku to. Bûngî bwônsò buvwa Mukalenge mubiikile abu, Dibenasha edi divwa bwabo bôbò. Mpindyewu udi wêwè wamba ne: ‘Dyakiimana.’ Dîbà kaayi?”

“Kakwena bubi bwenza to?”

Mêmè ne: “To, mukalenge, nansha kakese. Ndaaku kûyaaya.” Uh-huh. Anu mwaba awu. Nwamonu anyi?

147 Peeteleo wakamba ne civwa mbwa muntu yônsò uvwa Nzambi mwa kubiikila awu, ùvwa mwa kupeta Dibenasha dimwedimwe dya bapostolo adi. Ki—ki Dîyì dya Mukalenge ndyôdi adi. Nwamonu anyi?

148 Mpindyewu cibwikilu cya mubidi. Nzambi, Dîyì, mubwikila mu mubidi wa buntu. Civwa ncinyi? Nzambi uvwa mubwikila mu Môsà. Nzambi uvwa mu Môsà, mubwikila, ne Bwikadi bwa Nzambi buvwa munda mwende. Ùvwa mupwangane anu menemene ne Dîyì adi munda mwende mushindu awu, mu mushindu wa ne byakakengela kubwikilaye mpala wende. Kabidi ùvwa mmuprofeta mushindika wâkavungulula Dîyì e kubambila ne: “Kwenji cikampanda! Wènzè cikansanga! Ne kwenji cikankenga!” Nwamonu anyi?

149 Bwa kufila Dîyì Dyende kudi lukongo alu, Yêye wakaDibwikila mu muntu, cyanaana Dîyì nunku ndifomije ne babiikidiibwe bwa kupatuka biine. Nwamonu anyi? Nansha mene bantu bavwa kuntu aku abu, kabavwaku mwa kutwala bwa kumona ciine aci to. Mu—mu Ekesoode tudi tusangana ne, baakamba ne: “Môsà akule yêye, bwa Nzambi to.” Nudi numona bwa cinyi Dikunji dya Kapya kaditu ditamba kumweneka anyi? Nwamonu anyi?

150 Nzambi kwambaYe ne: “Nê—Nê—Nêngenzè aci. Nêmbàjuudilè Muprofeta.” Amen! “Nêmbàjuudilèye.” Ki kulwaYe anu menemene. “Nênjuulè, ne Yêye neikalè ne, neikalè Dîyì.”

151 Yêye ne: “Paaswabo kumona ne Dîyì didi cinyi...” Yêye ne: “Mpindyewu, Môsà, Mvwa mukumwenekele kuntu kwaka mu cipuka cilakuka kapya.” Yêye ne: “Nêntuulukè nteemeshe mukuna awu kapya.” Yêye ne: “Nebamone ne udi mwambe bulelela. Nêmmwenekè mwab'ewu mu—mu—mushindu umweumwe wa ulakuka kapya awu. Nêmmwenekè mwab'ewu ne nênjaadikilè bantu, Mêmè nênsindikè mudimu

webe wa bwambi.” Ki cyakambilaYe Mòsà mwab’ewu, mu mēyi macincika.

¹⁵² Monaayi, Yèyè ne: “Mpindyewu Nê—Nênkutumbishè kumpala kwa bantu.” Yèyè ne: “Mpindyewu, udi mubāmbile ne Ndi mutuutakeene neebe kuntu kwaka mu cipuka cilakuka kapyā; mpindyewu Nēntuulukè, Kapyā kamwekamwe aku, ne Nēndeejè bantu ne kwakabadinga bwa Cyôci aci to.” Nwēnū nudi mwa kuCijaadika ku maalu a mamanya, nansha mene, panwikala baswe. Nwamonu anyi? “Nēntuulukè buludi ne Nēmbāleejè.”

¹⁵³ Kadi paakabangaYe kukungula, paakabanga Yehowah kukungula, bantu kwambabo ne: “To! To! To! Yehowah kaakulu to; ne—netufwe.”

¹⁵⁴ Nwamonu’s, bivwa bikengela kwikalaYe mubwikila, pa nanku ki Nzambi kuDibwikila mu Mòsà ne kupa Mòsà Dìyì. Ki Mòsà kutuuluka e kwamba Dìyì dya Mukalenge, mu cibwikilu pa mpala pende. Mmwômò anyi? Yehowah mubwikila mu mmwenekelu wa muprofeta, bwalu bivwa cya bushuwa mwa...Ki Nzambi kwamba ne Kavwa kabidi mwa kwakula naabo mu mushindu awu to. Ûvwa mwa kwakwila naabo anu ku muprofeta. Awu ki mushindu umwepele uvwaYe mwa kwakulaku naabo kubangila piine apu. Ki mushindu umwepele ukaadiYeku mwakulaakule. Ncya bushuwa. Kacya kî mmu mushindu kampanda mukwabo to. Yèyè katu ushima nansha.

¹⁵⁵ Monaayi, anu Mòsà nguvwa ne Dìyì. Mpindyewu, kakuvwa ci—cisumbu cya bantu cituuluke to, kakuvwa nansha Bafaalesa, anyi Basadoka, anyi kacivwa kasumbusumbu kampanda—kampanda anyi kaacyôtà kampanda to. Civwa Mòsà! Yèyè wakangata muntu umwepele. Kēna mwa kwangata meeki abidi anyi asatu mashiilangane to. Ûtu wangata muntu umwepele. Mòsà nguvwa ne Dìyì, anu Mòsà nkaayende. Nansha Yoshuwa mwine kavwaku naaDi to. Muntu mukwabo nansha umwe kavwa naaDi to. Amen! Yoshuwa uvwa ka—kalààlà kaa masalaayi; Yoshuwa uvwa kāmàndà kaa cilwilu; Yoshuwa uvwa mwena kwitabuuja, mwena Kilisto. Kadi Mòsà yèyè uvwa muprofeta! Dìyì kadyena mwa kulwa kudi Yoshuwa nansha; bikengela Dilwe kudi Mòsà. Yèyè nguvwa muprofeta munene wa dîbà adi. Monaayi, Dìyì kacya kadyakalwaku kudi Yoshuwa to too ne pàākayà Mòsà. To, mukalenge. Nzambi utu ukwata mudimu ne muntu umwepele musangu umwe. Nzambi udi umwepele. Nwamonu anyi? Mpindyewu, anu Mòsà nguvwa ne Dìyì, kî ncisumbu to.

¹⁵⁶ Tangilaayi, Nzambi wakadimwija bantu nansha babamba ne mbanganyi bwa kabadidingi baalonda Mòsà bwa kubwela mu cibwikilu aci to; batentudi. Nwamonu anyi? Mukaji, mulume, mwakwidi, nansha yèyè nganyi, nansha wa difwana dya Nzambi dya bishi, nansha muntu mulume wa bishi, nansha wa luumu

lwa luyiila ne panshi, nansha mwikàle bishi; Wàkadimwija ne: “Mòsà alwe nkaayende! Kadi muntu nansha yêyè nganyi, nansha nyama mene, mulengeku, udi ne cya kushipiibwa anu mwaba awu.” Kudidingi wapita wâya kumpala kwa cibwikilu aci to. Cibwikilu aci ncya muntu anu umwepele. Mukenji awu ngumwepele. Nwamonu anyi? Mu ntempelu, muntu umwepele nguvwa ubwelamu musangu umwe ku cidimu, mwela maanyi ne mulongolola bwa kubwelamu; kacyi bwa kupatula Dîyi to, kadi bwa kulambula mashi. Bwa kubwelamu mene kumpala kwa Cyôcì aci, anu umwepele. Muntu mukwabo kana yônsò uvwa ufwa. Nwamonu anyi?

¹⁵⁷ Ki kufwabo mu nyuma eku patudi twakulangana apa. Eci ncibwikilu cya nyuma. Nwamonu anyi? Aci civwa cibwikilu cya mubidi. Eci ncibwikilu cya nyuma. Nwamonu anyi? Mbatungunuke anu ne kubwelamu paanyima apu, udi mwa kubambila. “Kaa, ndi mumanye! Ndi mumanye aci, kadi ndi . . .”

Mêmè ne: “Tungunukaayi, bidi anu bîmpè, cidi cyamba anu . . .” Nudi bavuluke ne, cipupu cya ndekeelu mu Ejipitu civwa ndufu’s, kumpala kwa cimwangi. Cipupu cya ndekeelu pa buloba ndufu lwa mu nyuma, kumpala kwa cimwangi. Pashiishe nebooshiibwe bashaale anu butu ne nebaalukile ku lupwishi, ne baakane nebapatuke benda bendela pa butu bwabo. Kadi cintu cya ndekeelu ndufu lwa mu nyuma, babenga Dîyi.

¹⁵⁸ Mpindyewu monaayi, Nzambi wakadimwija bantu nansha babamba ne mbanganyi bwa kabadidingi baalonda Mòsà bwa kubwela mu cibwikilu cya Kapyà aci to. Bivwa bikengela bwa Mòsà kwikalaye mubwikila, bivwa bikengela kumùpatukayè. Mòsà uvwa ubwelamu bu Mòsà, ùbwela mu Dikunji dya Kapyà edi; kadi pavwaye ùmùpatuka, ùvwa mubwikila. Bwalu, ùvwa ùbwelaMù, mupatuke mu bilele byende, bilele bya bakulu. Yêyè ukaavwa *mumone* Dikunji dya Kapyà, kadi mpindyewu ùdi ùbwela *mu* Dikunji dya Kapyà adi. Nwamonu anyi? Amen! Kadi ùvwa ùmùpatuka, mubwikila. Dîyi dya Nzambi munda mwa muntu, dibwikila! Ki yêyè ukààdi wenda upatuka ewu, kaa, ekelekele, mêmè’s ndi mwa kucimona’s. Wàkadimwija bwa muntu mukwabo nansha umwe kateeciku aci to, muntu nansha umwe kèna mwa kudentula Aci to. Mbîmpè kudidingiku to. Nwamonu anyi? Nansha mwakwidi anyi muntu wa cijila, nansha yêyè nganyi, kardinale, mwepiskopo, anyi cinyi cikwabo, ùteeta kubwela mu cibwikilu aci, ùvwa ùfwa. Nzambi wakabadimwija. Katwakwikalaku ne bintu bitentula to.

¹⁵⁹ Dîyi Dyende ndibuulwila muntu umwepele. Ki mutubi nanku misangu yônsò, muprofeta nguvwa ulwa ne Dîyi dya Mukalenge, cikondo cyônsò, musangu wônsò, eku ne eku kwa Mifundu. Dîyi dilwalwa kudi umwepele. Mu cikondo cyônsò, bya mwomumwe, nansha mu bikondo bya ekeleziya, kubangila anu ku cya kumpala ciine too ne ku cya ndekeelu. Bakwabo badi

ne yabo myaba, ncyá bushuwa, monaayi, kadi wêwè shaala kule ne Dikunji dya Kapyá adi. Nwamonu anyi? Edi's ndileesona dya tulonga mwab'ewu's! Nwamonu's, muntu yônsò ukeba anu bwa kwikala Mòsà, ne muntu yônsò . . .

¹⁶⁰ Nudi bavuluke cyàkambà Daatana ne bakwabo abu kuntu kwaka anyi? Baakamba ne: “Mpindyewu, Mòsà, anji indilabi kakese mwab'ewu! Wadyängàcìdì wêwè nkaayeebe bipitepite bûngì be, wamonu's. Mpindyewu, s'kudi bantu bakwabo mwab'ewu badi Nzambi mubiikile.”

¹⁶¹ Aci ncyá bushuwa. Bôbò abu, muntu ne muntu, bavwa benda balonda anu bilenga pavwabo benda baya apu, kadi paakateeta muntu kampanda kwambula dikàsà bwa kwangata kaaba kaa Nzambi kavwaYe mupeeshe Mòsà aku, yèyè uvwa mudyànjlila kulongolola ne kuteekiibwa pa mudimu awu, paakateetaye bwa kukangata, kapyá kaakatuuluka e kukangula buloba ne kubaminamu dyakamwe. Nwamonu anyi? Nwamonu anyi? Watapa ntaala wadimuka. Nwamonu anyi? Ikala wêwè anu mwena Kilisto mwimpè wa Nzambi, wa difwana dya Nzambi, mwikàle witabuuja Díyì. Nwamonu anyi? Shaala kule ne Dikunji adi. Dileesona kaayipu's we!

¹⁶² Nzambi wakamwenekela Mòsà musangu wa kumpala mu cipuka cilakuka kapyá, Nzambi uvwa mubwikila mu Dikunji dya Kapyá. Mpindyewu teejejaayi ne ntema menemene mpindyewu bwa katanci kakese. Nzambi, wakalwa dyambedi kudi Mòsà, Úvwa mubwikila. Nzambi uvwa mu Dikunji dya Kapyá, musokome mu cipuka, nwamonu's; byenze bu paanyima paa biseba, nwamonu's, paanyima paa nkwasá wa ngàsà ku cyoshelu. Nwamonu anyi? Úvwa mubwikila. Yèyè utu misangu yônsò anu mubwikila. Nenu paakalwaYe kudi Mòsà, Úvwa mu Dikunji dya Kapyá, mubwikila mu Dikunji dya Kapyá. Kadi apa, kumpala kwa bantu eku, Nzambi wakamushindika ku Dikunji dya Kapyá dimwedimwe adi. Nwamonu anyi? Mòsà kwamba . . .

¹⁶³ Mpindyewu tangilaayi. Nudi munkaci mwa kuubala anyi? Nudi balekele meeji enu alaluka apatuka anyi? Nudiku mwa? Nudi mwa . . . “Ewu udi ne maci, ùmvwè.” Nwamonu anyi?

¹⁶⁴ Paakamwenekela Nzambi Mòsà, muvwa mmu Dikunji dya Kapyá, paakamubiikilaYe ku mudimu wende wa bwambi apu. Ki Mòsà kulwa e kwambilaye bantu bwalu abu. Bôbò kabavwa mwa kuciitabuuja to, kadi pende's wakenza bishima ne bikwabo bintu. Kadi, bwa musangu ewu, Yèyè kumweneka, kumweneka bilondeshile maalu a mamanya ne kushindika mudimu wa bwambi wa Mòsà bu Nzambi umwèumwè uvwa mwakule nende awu, bwalu Wàkamwènèka mu mmwenekelu wa Dikunji dya Kapyá ne mukuna kukwatawu kapyá. Ne Dyakalwa kudi Mòsà mu cipuka, dyakule nende. Eyo.

165 Dimweneka dya kumpala dya Nzambi, kudi Mòsà, mu cipuka cilakuka kapyà, cibwikilu. Kumpala kwa bantu, Nzambi kubwikilaYe kabidi Mòsà ne kumushindikaYe, ku cibwikilu, pa kuDibwikila ne Kapyà kamwekamwe aku, Dikunji dya Kapyà dimwedimwe dyàkapwekà adi. Kubangila—kubangila pa dîbà. . . Kubangila pa bôbò abu, bwa kumonabo anu mwa kuumvwa Dîyì dya Nzambi. Nudi bacyũmvwè anyi? Anu Dîyì, bavwa bumvwa Dîyì Dyende. Bwalu, Mòsà bwabo bôbò, ùvwa Dîyì didi ne mwoyi. Mòsà! Nwamonu's, Nzambi ukaavwa mutambe kujaadikila Dîyì adi bikole ku Mòsà! Nwamonu's, Mòsà wakamba. . . Nzambi wakambila Mòsà ne: “Tuuluka ndaaku kuntu kwaka. Mémè nêngũikalè neebe. Yèyè udi. . . Kakwakwikala cyàkukàndameenà nansha cimwe to. NDI EWU ÛNDÌ.”

166 Mòsà wakatuuluka, e kwambaye ne: “Nudi bafwanyine kubenga kwitabuuja eci, pàmwàpa, kadi Nzambi ngudi mummwenekele mu Dikunji dya Kapyà ne Yèyè ngudi mungambile maaluu aa.”

167 “Kaa, tudi ne bintu bya mishindu yònsò bifwanangane naabi biikàle byenzeka's.” Pâlò kwambaye ne: “Mona's!” Mpaasata Pâlò kwambaye ne: “Ee, wèwè's udi ne diyelè dikese be dya beena majimbu. Mona's, mémè ndi ne beena majimbu apa badi mwa kwandamuna nyoka ne kulwaye. . . dikombo—dikombo kulwadi nyoka. Lwàyi apa, nwènù beena majimbu.” Ki kulwabo mwaba awu e kwenzabo cintu cimwecimwe aci.

168 Mòsà uvwa mumanye. Kakuvwa cintu nansha cimwe cyàkamutacishà to. Batentudi bùngì bwònsò buvwabo naabo abu, kabyakafila dishiilangana nansha dya kànà to. Mòsà yèyè wakashaala anu mupuwe. Katanci aka, yòyi kudikoka eku ne eku ndambu, kadi, dyakamwe, nyoka wa Mòsà kuminaye anu mikwabo ayi. Nwamonu anyi? Bwa cinyi? Anu bu bapostolo abu, kabavwa mwa kuCyumvwija. Mòsà kavwa mumanye ne Nzambi neàcyènzè bishi to, kadi Yèyè's uvwa ne cyà kucyenza.

169 Nwavulukaayi ne, Yèyè utu mwambe ne Yane ne Yambele nebaalukile mu matuku a ndekeelu, nwamonu's, bintu bitentula. “Ne mbafwanyine kuseeswisha ne Basungula mene bu ne bivwa mwa kwenzeka,” Maataayi 24.24. Nwamonu anyi? Anu bintu bimwebimwe abi menemene, benza bishima ne bikwabo bintu bya mushindu umweumwe awu. Tabaleelaayi Dîyì adi! Tabaleelaayi Dîyì adi! Muntu wamba ne ùdi wenza bishima kadi mucikàle anu muswe kwitabuuja ne kudi Nzambi yisatu, ne kudi byònsò bya mushindu ewu ebi; seemenaayi kule ne wa mushindu awu. Tudi bamanye ne aci ncya—aci ncya mashimi, nwamonu's, bwa cya nanku to. Nwamonu anyi? Dîyì, Dîyì dyònsò, Dîyì dyònsò didi dipatuka mukana mwa Nzambi! Genese, Dîyì dimwepele! Apa, mbambe, ne: “Kuumushidi anyi kusakididi dîyì dimwe.” Nwamonu's, Didi ne cya kwikala Dîyì dimwedimwe adi. Nwamonu anyi?

¹⁷⁰ Monaayi ne, bantu baakamona cintu kampanda cìwà cyenzèke. Mòsà uvwa mubwikila bu... Ùvwa muprofeta, ne Nzambi uvwa mushindike Dìyì Dyende mpindyewu, mutuuluke mwaba awu. Ne wàkamòna bimanyinu ne maalu a kukema. Ne pashiishe, eyo, bantu aba kuditapululabo anu pa bôbò, ekeleeziya. Nwamonu's, *ekeleeziya* mbwena kwamba ne "babiikidiibwe bwa kupatuka." Nwamonu anyi? Paanyima paa bamane kubiikidiibwa bwa kupatuka mu baa pa buloba ne kushaalabo cisamba, nwamonu's, ki Nzambi kuDimanyisha muvwaYe Dikunji dya Kapyà adi. KujaadikaYe mukenji wa Mòsà. Nwamonu anyi? Yèyè uvwa Dikunji dya Kapyà. Bavwa bafwanyine kwikala baDikwate ne fòtò, ngeela meeji, bu bôbò ne byamu bya fòtò, bwalu mukuna mujima uvwa anu mukwate Kapyà. Kadi bôbò—bôbò baakajaadika aci, Nzambi ujaadika ne Mukenji uvwa ngwa cya bushuwa. Mukenji ukaavwa pabwìpì, kantu ne kantu, bavwa ne cya kutumiibwa mu cimwangi dîbà adi. KubwikilaYe muprofeta Wende kùdì cisamba cya beena cimwangi eci.

¹⁷¹ Bantu abu, elaayi meeji, baakamona ne cintu kampanda civwa cimwenzekele. Yèyè ukaavwa mpindyewu mushiilangane ne bakwabo baa beena Izaleela abu. Ùkaavwa mushiilangane, mukenji wende uvwa mushiilangane, yèyè uvwa mushiilangane ne baakwidi, ùvwa mushiilangane ne cintu kana cyònsò. Nwamonu's, ùkaavwa muntu mushiilangane. Bantu kumonabo ne cintu kampanda civwa cyenzeke. Nzambi uvwa muDibwikile mu muprofeta Wende, bwa kubambilaYe Mèyì Ende. Ki civwaYe mwenze ncyòcì aci. Mòsà uvwa Dìyì didì ne mwoyi adi kudi cisamba, dibwikila kudi Dikunji dya Kapyà, diikàle dyamba civwa mwa kulwa kubwikidiibwa pashiishe paanyima paa biseba bya tusengelanshimba. Nwamonu anyi?

¹⁷² Bivwa bikengela Dìyì difumine kudi Mòsà, dyambedi. Nwamonu anyi? Mòsà nguvwa ne Dìyì. Avwa mafundiibwe kudi Nzambi, muntu nansha umwe kavwa mwa kuWumvwija to, bivwa bikengela Mòsà bwa kuWumvwija, dyambedi. Ki bwa cinyi ùvwa ubwikila mpala wende, bwalu ùvwa... Nudi nuCimona anyi? Nwamonu anyi?

Ki Dyòdì *edi*. Tudi bafwanyine kuDyambula, kwenda naaDi, ne bikwabo byònsò mwab'awu, kadi bikengela Dibuuuludiibwe. Bwa kubuulula, bivwa bikengela Mòsà kulwaye Nzambi bwa cisamba.

Wèwè udi wamba ne: "Aci's ndukutukutu."

¹⁷³ Mona's, Yèyè's wakambila, wambila nansha Mòsà, Yèyè mwine ne: "Wèwè newikalè Nzambi, ne Alona neikalè muprofeta webe!...?..." Nwamonu anyi? Pa nanku ki Yèyè kulwa, nwamonu's, bivwa bikengela bwa Yèyè kuDibwikila, bwalu Nzambi utu misangu yònsò anu paanyima paa cibwikilu. Kaa,

ekelekele! Nudi nuCimona anyi? [Disangisha didi dyamba ne: “Amen.”—Muf.] Nzambi mmusokome bantu batwilangane.

174 Yèyè wakamba ne: “Taatù, Ndi nKusakidila, Udi muCisokoke beena lungenyi ne batalame, kadi muCibuulwile bânà, badi baswe kuyiila abu.” Nwamonu anyi?

175 Nzambi musokoka paanyima paa cibwikilu. Mòsà uvwa mubwikile mpala wende. Nanku Mòsà uvwa Dîyì didì ne mwoyi dibwikila. Bantu baakamona Dikunji dya Kapyà adi, kwambabo ne: “Bwa mpindyewu tudi batwishibwe.” Nwamonu anyi? “Mòsà akule yèyè.” Nwamonu anyi? “Nzambi kaakulu to, bwa katulu kufwa.” Mòsà wakabwela buludi mu Dikunji dya Kapyà adi. Nwamonu anyi?

176 Ki kwamba mpindyewu, Yèyè kwamba ne: “Mpindyewu Mêmè—Mêmè ncyakwakulaku kabidi naabo mushindu ewu to. Nêmbàpè muprofeta.” Nwamonu anyi? Nanku ki mushindu ukaavwaYe misangu yònsò wenza ngwòwò awu. Nwamonu anyi? KwambaYe ne: “Mpindyewu babande baye.” Kadi bikengela muprofeta ewu ikalè ne Dîyì edi. Yèyè mwikàle mubwikila ne bilele, Nzambi kî ngudiku mumutume to. Yèyè mwikàle mubwikila ne Dîyì, Nzambi neashindike Dyòdì adi. Nzambi utu uDyumvwijila Dîyì Dyende. Mòsà uvwa wamba Mèyì awu; Nzambi uvwa uWumvwija. Amen.

177 Mòsà uvwa wamba ne: “Mukalenge ngudi mwambe nanku!” Ne Mukalenge pende uvwa wenza civwaYe mwambe aci. Aci ki civwa ciCivwija ne ncyà bushuwa.

178 Mpindyewu Yèyè kwamba ne: “Mpindyewu, Mòsà, ikala muumvwe. Bantu bûmvù mpindyewu. Wamonu’s, Ngaakuleeji wêwè, Ngaakushindiki wêwè.” Nzambi uvwa muDibwikile mu muprofeta ewu, bwa kwambila bantu Dîyì Dyende. Mòsà uvwa Nzambi udi ne mwoyi kudibo, Dîyì didi ne mwoyi dya Nzambi dimweneshiibwe. Ki bwa cinyi mpala wende mmubwikila. Nwamonu anyi?

179 Nanku nudi bamanye ne cintu cimwecimwe aci mu mwena Kilisto mulelela ncibwikila leelu ewu, kudi beena bupidya anyi? Badi bamona bakaji abu ne nsuki mile ne bikwabo, bamba ne cidi. . . “Tangilaayi mushindu wa cyena kale wawa.” Bakaji bavunga nsuki yabo cikata paanyima, bôbò bamba ne: “Badi ne ndundu wa mashinyi mutubuke, lukata lwa mashinyi lwa diseefù ku mutu kwaka.” Nwamonu’s, Cyònsò nCibwikila. Bôbò mbadi bampofu. “Kaa,” mudibo bamba, “mêmè’s ndi ne dipolome dya Ph.D., L. . .” Nansha wêwè ne cinyi, udi anu mupangi wa Dîyì. Cya bushuwa menemene. “Kaa, aci, aci’s cidi anu cintu kampanda cya cishaadile. Mêmè. . .” Anji angata dyambedi tuumaleesona twa tukese.

180 Kadi twambè bishi bwa bantu badi bamba ne mbabwikila mu Bwikadi bwa Nzambi, kadi bayiisha cilele kampanda cya ekeleeziya? Kaa, bya luse’s, Nzambi wanyi! Biikàle basakidila

ne buumushila, ne bikwabo byônsò, mu kubwejamu kwa byena-bwalu byabo bôbò ne meeji abo bôbò biine, kabiyi Dîyi dya Nzambi to, nwamonu's, ncibwikilu cya mushindu kaayi aci? Aci's cidi ne cibwikilu cya butendeleedi. Nzambi's ukaadi mumane kupanda aci cibwikilu mucishiye bwashi!

¹⁸¹ Bavwa bamba ne: “Cintu paaci ne mbaprofeta kacituku to. Cintu cya nanku kacituku to, mu matuku a ndekeelu aa, ne mbapostolo ne baprofeta. Cintu paaci ne ndyondopa dya kudi Nzambi kacituku to. Cintu paaci n'â ni mbeena lumònò, kacìcìtukù kabidi to. Cintu paaci n'â ni m'Maako 16 ciikàle cyûle kacitukù to. Cikondo cya bapostolo cìkaadi cijikè.” MbaCibwikile kumpala kwa bantu. Kadi Nzambi mmupatuke buludi ne Nyuma Mwimpè Wende wa Kapyà, kadi kupanda aci cintu kuumukila anu kuulu to ne kwish-... [Katupa kaa mukaba wa mêyi munda mutupu—Muf.] Nzambi mmupande cibwikilu aci.

¹⁸² Mòsà uvwa cibwikilu, Dîyi dya Nzambi didi ne mwoyi dibwikila paanyima paa mubidi wa buntu. Dikunji dya Kapyà divwa munda mwa Mòsà, mu bushuwa bwa bwalu, diikàle dyamba civwa ne cya kubwikidiibwa pashiishe paanyima pa biseba, nwamonu's.

¹⁸³ Mpindyewu, aci, Dîyi, Dîyi dyakatwadiibwa, pashiishe Dyakafundiibwa, pashiishe Dyakateekiibwa paanyima kadi diikàle anu dibwikila, bwalu Nzambi uvwa misangu yônsò anu mu Dîyi adi. Amen! Yèyè utu anu Dîyi, misangu yônsò. Ûvwa mu Dîyi adi. Ki bwa cinyi bivwa bikengela bwa Dîyi kwikaladi dibwikila.

¹⁸⁴ Kaa, mwaneetu wa balume, mwaneetu wa bakaji, nudi nuCyumvwa anyi? Tangilaayi! Kanwenaku numona anyi? Divwa dibwikila munda mwa bikondo byônsò ebi, bilondeshile cidi Nzambi mwambe, ne neDikangudiibwe mu matuku a ndekeelu, Bitampi Mwandamutekete abi ne bikoshiibwe, ne Cintu mu kaabujima necishaale patooke ku mèsù kwa bantu, bikaadi byenzeke misangu yônsò ayi abi. Dìbà dya Mukenji wa musanjeela wa mwandamutekete, bivwa bikengela bwa maalu masokoka ônsò a Nzambi amanyikile mu Eliya awu, dìbà dya ndekeelu edi; mushindu udi Kilisto mwediibwe pambelu paa ekeleeziya Wende, Mwànà wa Nzambi; mushindu udiYe mubuuludiibwe cyakabidi bu Mwànà wa muntu; mushindu udi Ekeleeziya ne cya kuteekiibwa mu bulongame, ne bintu byônsò bwa dituku dya ndekeelu, kakuciyi nî ntwitabaayi, nî ndingumba, kakuyi mpatà to anu Dîyi pa dyôdi diikàle ne mwoyi munda mwa muntu nkaaya. “Nèngàngatè umwe, ne nènshiyè umwe. Nèngàngatè *ewu* nunku, ne nènshiyè *wawa* naka.” Nwamonu anyi? Kudi anu... Kakwena nî nshinga, nî mmangumba, nî ndiswikiibwa anyi nî ncinyi cyônsò to; mmwoyi ne Nzambi, anu ne Yèyè nkaayende. Nwamonu anyi?

¹⁸⁵ Monaayi, dibwikila mu mubidi wa buntu. Mòsà mwikàle ne Dìyì adi, dyàmba civwa mwa kuteekiibwa pashiishe paanyima paa ciseba cya kasengelanshimba. Bwa ne . . . Ki mudìbi kabidi bwa Kilisto wetu Mòsà. Kilisto ki wetu Mòsà. Yèyè uvwa Nzambi mubwikila mu mubidi wa buntu, mubwikila mu buntu, mu musunya. Ncya bushuwa. Kabidi Yèyè udi umwèumwè awu makeelela, leelu, too ne kashidi. Úvwa mubwikila kudi biseba bya tusengelanshimba. Úvwa mubwikila. Kadi bwa ewu musangu Yèyè uvwa mubwikila mu Muntu. Nwamonu anyi? Mpindyewu monaayi, “umwèumwè awu makeelela, leelu, too ne kashidi,” mulaye Dìyì Dyende bwa *eci* cikondo. Yèyè udi anu Kilisto, Dìyì dilaya bwa cikondo eci, dibwikila mu mubidi wa buntu. Dìyì didi Nzambi.

¹⁸⁶ Dilaabiibwa mmuntu kampanda. Mwaku *Kilisto* udi umvwija “mulaaba maanyi,” nwamonu’s, “mulaaba maanyi awu.” Nenku, Mòsà uvwa Kilisto mu matuku ende yèyè, ùvwa mulaaba maanyi awu. Yelemiya uvwa Kilisto mu matuku ende yèyè, mwikàle ne citupa cya Dìyì bwa dituku adi.

¹⁸⁷ Kadi paakalwa Yesu, Wàkalwa bu Mulaaba maanyi-Mupikudi Awu; nenku aci civwa m’Mòsà ne byònsò bivwa munda mwa Mòsà abi, ne Dìyì dyònsò, ne Bunzambi bwònsò mu ciikadilu cya mubidi buvwa munda Mwende. Ki bwa cinyi cilàmbà cikudika cya mu ntempelu cyònsò cyakapandika, ne nkwasà wa ngàsà wakalwa mushaale mumweneke yònsò anu menemene, Yèyè ki uvwa Mulaaba maanyi awu.

¹⁸⁸ Monaayi mpindyewu, cibwikilu mu mubidi wa buntu, Dìyì dilaya bwa cikondo eci didi paadi ne cya kubwikidiibwa. Monaayi. Bidimba bya ekeleeziya binangi bya mpekaatu abi ne bangènzàmpèkààtù kabeena mwa kuCimona to bwa cibwikilu cya buntu aci.

¹⁸⁹ Ki bwa cinyi kabavwa mwa kuMumonaku to. “Mona’s, Yèyè’s mmuntu. Mmufumine penyi Yèyè mwine? Nkarta kaayi kaa buumambala kadiYe naaku? Ngwa mu ekeleeziya kaayi’s Yèyè mwine?” Ndi njinga kwakula pa cyòcì aci diloolo edi ne: “Ngwa mu ekeleeziya kaayi’s Yèyè mwine?” Nwamonu anyi? Pa nanku, nwamonu’s, mpindyewu: “Ngwa mu ekeleeziya kaayi’s Yèyè mwine, cisumbu kaayi—kaayi’s? Mmu cilongelu kaayi mudiYe mulonge? Mmulongele Yèyè mwine Twende tulaasa penyi? Ee, Muntu mwine ewu’s mbamulele, bilondeshile bitù bantu bàmba, mwa—mwanu mwela Bwende Yèyè ewu mu nyungulukilu emu, Muntu ewu’s mmulela kabiyi mu dibaka dinsantu to. Mona’s, Yèyè, cya bushuwa’s, Yèyè’s ngwa ndyabulu. Nwamonu’s, Yèyè’s—Yèyè’s ngwa dyabulu. Yèyè mmulela kabiyi mu dibaka dinsantu to, kabidi Yozefu’s wakasela pende nsongaakaji awu anu bwa ne nkwèpì kwalwabo kumwasa mabwe, bwalu ùvwa ngèndààmàsàndì. Kadi Muntu awu ujuuka ulwa apa bwa kutwambila twètù baakwidi aba cidì cikengela kwenza?”

¹⁹⁰ Kadi ki Nzambi uvwa usanganyibwa pààpa wawa, ubuulula Dîyì adi, wela lubila ne: “Nzambi Wanyi, WàNdekèdì bwa cinyi?” Misambu miine yivwabo bimba mu ntempelu ayi, yivwa Davidi mubènzèle kùkaavwa bidimu ayi, yitangila Kilisto. “Mifuba Yaanyi yònsò yikaadi miNtangile. Bâtùbulu byanza Byanyi ne makàsà Aanyi.” Nenku ki bôbò abu biimane mwaba awu, bimba yôyì ayi, kadi Muntu mwine mwena bwalu mwikàle ufwa pa nkuruse. Nenku paakamanabo kujikija ne . . .

¹⁹¹ PaakafwaYe, Nzambi wa mu Dyulu wakatuuluka panshi, anu mwakatuulukaYe pa Mukuna wa Sinaayi, ne Kapyà kaa Cijila, kadi kwosha cilàmbà cikudika cya mu ntempelu aci kuumukila kuulu too ne kwinshi, kucipanda bipese bibidi. Kadi civwabo mwa kwenza ncinyi? Kutuma anu mèsù pambelu batangidila pa dididiishi dya ntempelu adi, ku Kalvariyo, s’ki Nzambi wawa mushaale mumweneke patooke, Mulambu awu.

¹⁹² Kadi kî mbanji anu kuCimona to, nansha leelu ewu. Nzambi mu dituku dya ndekeelu edi mmupande bilele abi, mutwale Dîyì dya cikondo eci dishaale dimweneke patooke, kadi bôbò kabayi anu baDimanya to. Kabeena anu baDimanya to. Mbi—mbitambe kupwekela. Nwamonu’s, mbitambe anu kupwekela. Bidi kule be ne maalu a pa buloba.

¹⁹³ Mvwa muyiishe dituku dikwabo mu cikongo kampanda, pa: “Kwikala mupâle.” Dimwe dya ku adi panshi aa ndi muswe kwakula pa cyôci aci: “Kwikala mupâle.” Twêtù bônsò tudi bapâle bwa muntu kampanda, pa nanku—pa nanku nêngîikalè mupâle bwa Kilisto. Pôlò wakamba “muvwabo bamwangata bu mupâle.” Cya bushuwa, bikengela wikalè nanku. Nwamonu’s, bikengela bûlû bwa kukwatakaja bintu pamwe. Nwamonu anyi? Neya bushuwa.

¹⁹⁴ Pa nanku monaayi cibwikilu, mubidi wa buntu. To, mpindyewu, bantu banangi baa mpekaatu kabavwaku bafwanyine kumona aci to. Batendeleedi bavwa beeyemene bilele abu, kabavwaku bafwanyine kumona aci to, bwalu Yèyè uvwa muntu. Bwa cinyi? Mubidi wa buntu awu uvwa musoko ke Nzambi.

¹⁹⁵ Mpindyewu, bu ne Yèyè uvwa Dikunji dinene dya Kapyà dyàkapwekà, nwamonu’s, bu Dikunji dinene dya Kapyà dipweke ne dibaleeje civwaYe, ne Yèyè uvwa Dikunji dinene dya Kapyà edi, nunku’s mbiitabuuje aci; bu ne Yehowah uvwa muye wenda wendakana utwa eku utwa eku.

Kadi nudi bamone cyakenzaYe, bwa kumonaYe mwa kucinguluka bônsò beena meeji, beena lungenyi abu, Yèyè wakaDibuulula anu bu mwakalayaYe Mòsà amu, nwamonu’s: “Nêngààkwile naabo ku Muprofeta.” Ne Yèyè uvwa Mwànà wa muntu, Muprofeta. Ki bamwe baabo kuCijingululabo, biipacila ku cya pa lukama cimwe cya umwe pa lukama pa buloba, ki

baakaCiitabuuja; bakwabo bônsò kabaakiitabuuja to. Kadi, ki civwaYe, nansha nanku.

¹⁹⁶ Kadi's ki Nzambi wa Bukole nyawu uvwa usanganyibwa mwaba awu mumweneke patooke, Nkwasa wa Ngàsà awu! Wàkafwà pavwa bânà Bende Yèyè mwine bamba... Bânà Bende Yèyè mwine mwaba awu, bamba ne: "Katwena baswe kuMwakidila nansha! Atukatukile apa!" BaMutwila mate.

¹⁹⁷ Cifwanyikijilu, kale wawa, pavwa Davidi umuka mu ntempelu, mfumu mubengiibwe. Wènda ùpweka ne mùsèèsù, kadi kalumyana kakwabo kîpì, kakulumpe kaa bulema kenda kadikoka, kàvwà kakayi kamusweku kwônsò aku to, kumubiikilaku ne "cyena lubombo cya kale" anyi cintu kampanda, kumutwila anu mate mwîsù's. Ki mulami awu kutuula mwele wa mvita, wamba ne: "Bwa mêmè ndekele kabwa kaka ne mutu kunshingu; kiikàle katwila mfumu wanyi mêmè mate?"

¹⁹⁸ Davidi ne: "Mulekèle, Nzambi ngudi mumwambile nanku." Pàmwäpa Davidi kavwa mumanye cyakambaye aci to. Kuyaye wènda ùbànda mukuna, ùtàngila paanyima, ùdila mwadi.

¹⁹⁹ Bidimu nkama mwandamukulu kuumukila apu, Mwânà wa Davidi wàkabànda mukuna umweumwe awu, ùtàngila kwaka, ùdila Yelusalema, Mfumu mubengiibwe. KuMutwilabo mate mwîsù.

²⁰⁰ Kanwenaayiku numona anyi? Ncintu cimwecimwe aci. Nudi numona mudi Dîyi adi dyenda dipweka ditungunuke, dipweka dyenda ditungunuka leelu ewu anyi? Misangu yônsò dibengiibwe kudi ciibûngì, nwamonu's, kadi diitabuujiibwe kudi banyààbanyà.

²⁰¹ Mpindyewu, nwamonu's, kabavwa mwa kuDiitabuuja to. Beena Ngelika abu, kabavwa mwa kuMumona to, Úvwa mu ntempelu Wende wa buntu. "Mona's," muvwabo bamba, "dîna dya muntu ewu's n'Yesu; Yèyè's mmufumine ku Nazaleeta."

²⁰² Mpindyewu, bavwa ne dîna anu dimwepele kuntwaku mu miine matuku awu. Bu mudi, "John, Jim," bamba ne: "John wa ku Jeffersonville, Jim wa ku New Albany," anyi cintu cya mushindu awu, nudi numona's.

²⁰³ Yèyè kwamba ne: "Ewu n'Yesu wa ku Nazaleeta. Mbiitabuujiibwe kudi bônsò ne mamw'Èndè baakamwimicisha kudi musalaayi kampanda." Nwamonu anyi? Nenku cikondo aci ki muvwabo menemene biitabuuja nanku. Cya bushuwa! Nenku wàmba ne bavwa bamba, mpindyewu ne: "Nenku ewu n'Yesu wa ku Nazaleeta." Nudi numona anyi? "Nganyi's Yèyè?" Nwamonu's, kabavwa mwa kuumvwaku Aci to.

²⁰⁴ Kadi, mona's, Dîyi edi bwa dituku adi, pavwaYe uyiisha, wàkamba ne: "Kenketaayi Mifundu. Mu Yôyi mmunudi nwela meeji ne nudi ne Mwoyi wa Cyendeleele, kadi Yôyi's ki

yidi yifila bujaadiki bwa ne Mêmè ndi Nganyi. Panwikala kanuyi mwa kungiitabuuja Mêmè to; mpwayi Mêmè mwoyi, bu cibwikilu, yitabuujaayi Dîyì dîdì dipatuka adi. Ibidi mbujaadiki,” mwakambaYe, “Mêmè ndi ngaakula ne Taatù udi ungaakwila Mêmè.” Amen. Ncya bushuwa’s.

²⁰⁵ Nyewu ngaakula bwa Dîyì dya dituku edi, ne Taatù uDishindika. Mpindyewu bwenu nwênù aci mbujaadiki anyi? Mbwôbu, nwamonu’s. Mushindu awu ki udi ukengela bwa kuulaci.

²⁰⁶ Monaayaaku mu Kolinto Mwibîdî mpindyewu, ku... Kolinto Mwibîdî, nshapita mwi³, ku mvensa mwi⁶, ntempelu wa kale uvwa mulame Nzambi paanyima paa biseba bya kale, musokome beena Yuda. Pàâkapandikâ cilâmbâ cikudika cya kale aci, beena Yuda bacidi anu... .bafofomija ku ne Yêyè uvwa Nganyi, ne ku ne Yêyè uciidi Nganyi. Kadi pashiishe Mpenta kubuululaye ne Nzambi mulelela ne udi ne mwoyi awu uvwa Nganyi, pàâkapandiibwâ cilâmbâ cikudika aci bipese bibidi, kudi Nzambi, kuumukila kuulu. Cibwikilu aci cyakenza nanku bwa cinyi? Cyakenza nanku bwa cinyi?

²⁰⁷ Bwa cinyi nkulwe Mukenji wa mushindu awu leelu ewu bwa kwenza cidiWu mwenze eci? M’Mulwe bwa cinyi? Bwa cinyi?

²⁰⁸ Kuvwa muntu kampanda uvwa mwa kumbiikila, dituku dikwabo anu abidi adi panshi aa, ùjinga kukokangana naanyi pa bidi bitangila cikondo cya—cya ekeleeziya, ne: “Nzambi uvwa mu ekeleeziya Wende munsantu,” ne bintu bya mushindu awu. Ki mêmè kulwa kujandula ne ùvwa mmuyiishi mukaji kampanda, ki mêmè kumba kubilekela’s. Nwamonu’s, bu ne ùvwa mmuntu mulume nunku bivwaku mwa kwikala byakane, bivwaku mwa kwikala bishiilangane’s. Kadi, pa nanku, kadi bidi ne dikwacisha kaayi bwa kuya too ne mu ditunga dikwabo mwamwa, padibi bikengela mêmè kushiya disangisha apa bwa kucyenza, nudi numona anyi? Ki pa nanku mêmè kubalekela naka’s. Mpofo ulombola mpofo, s’badi—badi bapona bônso mu mukidi.

²⁰⁹ Pa nanku, pa nanku mpindyewu mu cikondo eci, padi cibwikilu cya kale cya cyena mangumba ne cya bilele cipandiibwe, cyumushiibwe pa Dîyì dya Nzambi, bwa Dimone mwa kumweneshiibwa! Nudi numona cîndî muswe kwamba aci anyi? Cilele cidi cyamba ne: “Bintu byônso abi bikaadi bimane kupita.” Lekelaayi Cibweleku ndambu. “Bintu abi bikaadi bimane kupita.” Kadi, mu dituku dya ndekeelu edi, cibwikilu cya bilele aci ncipandiibwe bipese bibidi, nenku s’ki Dikunji dya Kapyà dîdî diimane edi. Nwamonu anyi? S’ki Yêyè ewu, umwenesha Dîyì bwa dituku edi. Cibwikilu ncipandiibwe.

Mpindyewu, baa pa buloba, kabeena anu baDiitabuuja to. Nansha kwikâle cinyi, kabeena baDimonaku to. Kabeena baDimonaku to. Ki nDitumiibwe bwabo bôbô to.

210 Vulukaayi ne, kî nkudi Sodoma kwàkabuuludiibwà Mwânà wa Nzambi to; bavwa mbaamusanjeela babidi abu. Ncya bushuwa.

211 Kadi, eci, Nzambi Yêyè mwine mu mubidi wa buntu wakabuuludiibwa kudi Abraham, Musungula. Kadi tangilaayi cyakenzaYe bwa kuDibuulula. Nenu mpindyewu Abraham wakamanya, paakamanya Yêyè ewu civwa mu meeji a Sarah paanyima Pende apu, yêyè kwamba, kuMubiikila ne: “Elohim! Musadidi Webe. . .”

212 Tangilaayi mpindyewu, bwa cyôci kumwenshiibwa. Dîyi didi ne cibwikilu pa Dyôdi bidimu byônsò ebi, kumpala kwa bantu ne: “Kacyenaku mwa kwenzekaku to.”

213 Nudi bavuluke diyisha dîngààkayiishà mu dinda dîngààkuumukà mwab’ewu musangu wa kumpala, pa Goliyata ne Davidi adi anyi? Ngâkamba ne: “Tangilaayi anu mwedi wa kadyombo wawa, wâmba ne ‘matuku a bishima akaadi mamane kupita.’”

Tangilaayi mikaba ya mêyi ayi mudiyi milondangane, tangilaayi mukaba ne mukaba wônsò, mushindu udiCi cyenda cilwa citambe kutooka; panwikala ne maci a kuumvwa, nwamonu’s, ne mèsù a kumona.

Cinyi? Mêmè kwamba ne: “Ki bukwântèndeleele bunene budi bwimane pàâpa bwabwa, bwamba mu cikondo eci cya maalu a mamanya ne, aci kacyenaku mwa kwenzekaku to.” Kadi mêmè kwamba ne: “Nzambi. . .” Mu Bukênkè abu, kumpala mene kwa kukwaciibwaBu fôtô, pa kuumusha anu musangu umwepele awu; kabuvwaku bwanji kukwaciibwa fôtô musangu awu to. Kuvwa nku musulu kwaka; kabavwaku banji kuBukwata fôtô to. Nwamonu anyi? Mêmè kwamba ne: “Yêyè uvwa mungambile ne necyenzeke; Yêyè uvwa mwa kwenza dibiikila ne divwa mwa kutangalaka mu matunga ônsò.”

214 Nansha mene Docteur Davis, wâkamba ne: “Wêwè ewu, ne kalaasa kashaadile aku, mubwele anu mu kalaasa keetu kaa mwandamuteke aka, ukasambidila bamfumu ne bakookeshi, ne ubanga ditabuluja dya ditangalaka too ne mu matunga ônsò?”

Mêmè kwamba ne: “S’ki cidi Yêyè mwambe.”

215 Kadi’s ncyenzeke. Nwamonu anyi? Nwamonu’s, ncyenzeke. Ki mudi bwalu nanku, ne, Yêyè kêna dijinga ne dyumvwija nansha. S’ki Yêyè wadyênji awu. Nwamonu’s, Ukaadi mumane kucyenza’s, aci cidi cidyumvwija nkaayaaci, nwamonu’s, ubiikila Basungula Bende, nwamonu’s, mu—mu bipidi byônsò bya nsômbelu. Mpindyewu’s ncimwenshiibwe.

216 Mêmè kwamba ne Davidi wakiimana kwaka, kalumyana kakese, kancii, kanyîkanyî wa mûncyônci ne kaamwongo kakobame kônsò, ne ndundu wa nyuunyi mu cyanza. Nenu, mona’s, Shawula kumutangila, mfumu wa kasumbu kaa bambi’s,

kwambaye ne: “Mona’s, wêwè, kutu nansha mulongeshiibwe to!”
 Yêyè ne: “Anji indilabi tǔng ní ndiku mwa kukupa dipolome
 dya Ph.D. anyi ní ndya bishi.” Kumuvwadikaye bya mvita
 ebi, byôbì. . . Kujandulaye ne kabivwa bikumbana muntu wa
 Nzambi to.

217 Yêyè ne: “Nkopolaayi cintu eci.” Yêyè ne: “Ncyêna ne
 cîndì mumanye pa cyôci aci to.” Yêyè ne: “Ndekelaayi nye
 mu mushindu wûntù mêmè mumanye, wûmvwà mulwangane
 naawu ne nyama wa ntambwe, wûmvwà mulwangane naawu
 ne ours awu.” Ûvwakù muntu wa mwitu’s. Yêyè kwamba ne:
 “Ndekèlaayi nye mu mushindu ewu.”

218 Ki mukulumpe Goliyata ewu kwambaye ne: “Nukaadi
 nuntumina kabwà bwa kulwangana naanyi?” Yêyè ne:
 “Nênkusomèkè anu ku lusongo lwa difuma dyanyi edi kadi
 nkudike citalu cyebe kuulu kwaka bwa nyuunyi kucidyayi.”

219 Davidi kwamba ne: “Wêwè udi utwilangana naanyi bu
 mwena Peleshete, ne bivwalu bya mvita ne difuma, kadi
 mêmè nënsambakeenè neebe mu Dîna dya Mukalenge Nzambi
 wa Izaleela.” Tangilaayi muprofeta awu, Davidi, yêyè ne:
 “Leelu ewu mêmè nënkosè mutu webe kunshingu aku.” Amen!
 Kaa, ekelekele! ùvwa mumanye civwaye naaci, Ewu uvwaye
 mwitabuuje, ne ùvwa mutwishiibwe menemene ne Yêyè awu
 uvwa ne bukole bwa kulama civwaye muMwomekele. Nudi
 numona anyi? Ki kwenzekaci nansha bishi.

220 Kaadîyì kaa kale kaa ne, “Matuku a bishima akaadi mamane
 kupita” aku, bimanu abi mbyupudiibwe! Yehowah uciidi anu
 mwimane mumweneke patooke, ùmwènesha Dîyì Dyende, Yêyè
 udi mubuulula awu. Ncya bushuwa. Monaayi.

221 Ekeleeziya wa Bisamba bya bende udi pende mufofomija
 kumpala kwa cibwikilu aci, paanyima paa cimane kupandiibwa
 ne cileeye Nzambi, cibwikilu cya butendeleedi. Mushindu kaayi?
 Pa kubwikila cyakabidi Dîyì mu muntu. Ncyôci aci menemene
 cyàkapangà Izaleela kumona. Bu ne civwa m’Mwanjelo
 kampanda anyi cintu kampanda, nunku Izaleela mmuCitàbùùje.
 Kadi bu muvwaci kaciyi mwa kwikala Mwanjelo to, bivwa
 bikengela cìikalè muntu. Amen!

Nzambi kêna mwa kunyangakaja Dîyì Dyende to. Mu
 matuku a ndekeelu bidi bikengela cìikalè cyakabidi cintu
 cimwecimwe aci. Nwamonu anyi? Cyàkafofomijà Izaleela
 ncinyi? Yêyè Muntu awu. “Wêwè mwikàle Muntu kadi uDivwija
 Nzambi.” Ki cyakaMushipeelabo, nenku, leelu ewu, bwalu
 Mukenji mmulwile mu muntu kaciyi mu Banjelo to. Nwamonu
 anyi? Nzambi kêna mwa kushintulula mushindu Wende
 nansha, kushintulula Dîyì Dyende. Ûtu mwambe ne Yêyè katu
 mushintuluke to. Nwamonu anyi? Monaayi, mbilayiibwe! Kadi
 baa Bisamba bya bende mbafofomijiibwe leelu ewu anu muvwa

Izaleela, bwalu (cinyi?) bwa cibwikilu. Nzambi mubwikila mu muntu, cyakafofomija Izaleela.

Monaayi, citu anu cifofomije muntu. Muntu kampanda, neCimufomije; mukwabo yêyè, neCimubuwile Bulelela. NeCibwikile mèsù a umwe, ne necikangule mèsù a mukwabo.

²²² Tangilaayi, Yesu wakiimana e kwamba ne: “Ee, dînà dyebe didi—didi—didi n’Simona, ne dînà dya tatwèbè divwa n’Yona.”

Yêyè kwamba ne: “Mukalenge Nzambi!” Nwamonu anyi? Filipino . . .

Yêyè ne: “Wamanyì munyi?”

Yêyè ne: “Monaayi mwena Izaleela, mwena munda mudi kamuyi budimu!”

Ki yêyè ne: “Laabi, Udi mummanye dîbà kaayi?”

²²³ Yêyè ne: “Kumpala kwa Filipino kukubiikilaye, pauvwa mwinshi mwa mucu apu, Mwawa mukumone.”

²²⁴ Yêyè ne: “Laabi, Udi Mwânà wa Nzambi. Udi Mfumu wa Izaleela.”

²²⁵ Ee, mwaba awu uvwa mwimane, aba bavwa bamba, ne: “Yêyè m’Beelezebula.” Nwamonu anyi? CyakenzaCi ncinyi? Cikangula mèsù a ewu, cifofomija mukwabo. Baakwidi baakamba cinyi? “Mona’s, Muntu wawa m’Beelezebula!”

²²⁶ Mukaji mutekete awu yêyè wakamba ne: “Ndi mumanye ne Maasiya ulwalwa, udi ubiikidiibwa ne m’Mulaaba Maanyi awu. Udi umona’s, Mulaaba Maanyi awu nealwe. Katwena bapete bapofeta . . . Wêwè udi ne cya kwikala anu mupofeta. Kadi Mulaaba Maanyi nealwe. Tudi baMwindile. Aa mmatuku a ndekeelu bwa baa Bisamba bya bende . . . anyi bwa beena Yuda.” Yêyè ne: “Edi ndituku dya ndekeelu.” Nwamonu’s, ne beena Samaaleya ne beena Yuda bônso bavwa bindile Maasiya. Nwamonu anyi? Yêyè ne: “Cikondo cya kumwenekaYe ncyôci eci. Tudi bamanye ne, paalwaYe, Yêyè ki wënza bintu ebi. Yêyè ki watwambila maaluu aa.”

Yesu kwambaYe ne: “Ndi Yêyè awu.”

Mèsù ende kukangukawu, a baakwidi ôwò avwa mafomijibwe.

²²⁷ Ki citu Evanjeeliyo wenza misangu yônso ncyôci aci. Ûtu ukangula mèsù a bamwe, ubuwilwila bamwe Bulelela, eku Ûfomija bakwabo; ùdi ne dyumvwija pabidi. Bamwe badi mwa kwangata Mwânà awu e kutangilaMu buludi, kadi kufofoma; bakwabo badi mwa kuMwangata kadi kupatuka Nende, ki dishiilangana ndyôdi adi.

²²⁸ Anu mwakenzekabi mu cikondo ne cikondo cyônso, Bunzambi bubwikila mu mubidi wa buntu. Monaayi, Yêyè ngwâkenza. Bapofeta bavwa Bunzambi, bubwikila. Bavwa Diyì dya Nzambi (mmwômò anyi?) dibwikila mu mubidi wa

buntu. Pa nanku, kabaakamona nansha wetu Mòsà awu to, nwamonu's, Yesu.

²²⁹ Monaayi ne paanyima paa biseba bya kale bya tusengelanshimba mu ntempelu wa kale awu, pavwa Dìyì dibwikila, pavwa Dìyì dimweneshiibwe pa bipese bya mabwe.

²³⁰ Mpindyewu, nêntete bwa kujikija munda mwa tusunsa tutwe ku makumi abidi mpindyewu, mêmè ne mushindu, bwa kwimanyika pa dîbà dikumi ne dimwe ne tusunsa makumi asatu. Monaayi, bu nwênù mwa kumona, ngäpïcishi amwe mabeji mwab'ewu, nudi numona's, bwa kubenga kuya. . . bwa mêmè kubenga kukosa. . . kubènga kutàmba kubileepesha. Ndi mumanye ne nukaadi bumvwe luuya lukole, bacyoke.

²³¹ Paanyima paa ntempelu wa kale, mu cilàmbà cikudika amu, civwamu ncinyi paanyima apu? Yehowah uvwa cinyi? Civwa cisokoka ncinyi paanyima apu? Civwa cilàmbà cikudika cisokoka ncinyi? Kaa, aleluuya's we! Civwa cilàmbà cikudika cisokoka ncinyi? Civwa cisokoka Dìyì. Cilàmbà cikudika, biseba bya kale bya tusengelanshimba abi, bivwa bisokome, bivwa bisokoke Dìyì ku mèsù abo, a mubidi. Paanyima apu, kabidi, pavwa màmpâ a baakwidi. Paanyima apu, kabidi, pavwa Butumbi bwa Shekinah. Kadi byònsò abi bivwa bisokoka kudibo. Byònsò abi bivwa bisokoka. Butumbi bwònsò bwa Nzambi buvwa anu paanyima paa ciseba cya kale cya kasengelanshimba aci, ncyà bushuwa, byònsò biikàle bisokoka ku dîsù dya mubidi.

²³² Mbisokoka leelu ewu, kabidi. Badi babibiikila ne “musùmbà wa bansantu babunguluki baa mu malaba, bakolessi baa maalu,” kadi kí mbamanye ne cidi cisokoka paanyima apu ncinyi to. Ki cidibo kabayi bamanye ncyôci aci. Nwamonu anyi?

²³³ Pashiishe pààkalwà Nzambi, mu luse, kupanda cilàmbà cikudika aci bwa kumonabo, bavwa batambe kwikala bajìngila mu bilele byabo mu mushindu wa ne bôbò. . . cicivwa anu cisokoka kudibo, nansha mene too ne ku dituku ditudi edi.

²³⁴ Bya mwomumwe mpindyewu! Butumbi, Bukole bwa Nyuma Mwîmpè, Butumbi bwa Shekinah bùdì bùlwa pa mwena kwitabuuja abu, mpindyewu ndi nswa kwamba mwena kwitabuuja mulelela, budi bwenza bwa byenzedi bya Nzambi ne diitabuuja kubwelabi munda mwende abu, bwa kwitabuuja Dìyì dya Nzambi, byònsò abi mbisokoka ku mèsù kwabo. Badi bamba ne: “Bintu abi bikaadi bimane kupita.” Nudi numona's, bacidi anu ne mwoyi paanyima paa cibwikilu aci.

Kanucyena kabidi paanyima paa cibwikilu aci to, nwênù Bânà bakese, Nzambi ukaadi mumweneke patooke kunudi mu kaabujima.

²³⁵ Dituku dikwabo, Mwaneetu Fred Sothmann, Mwaneetu Tom Simpson. . . Ncyèna mumanye nî ukaadi mufike apa anyi kí

mmwanji kufika. Bààbûngì baa kutudi bavwa ku ekeleeziya kampanda wa ba-Baptistes, ki mwambi awu kwambaye cintu kampanda civwa cyumvwiike cilenga cya dikema. Twêtù bônso kwamba ne: “Amen!” Muntu ne muntu mu ekeleeziya amu kunyenguvula nshingu e kutangila paanyima. Nwamonu anyi? Nwamonu anyi? Twêtù mbavwa bapete kasunsukila kaa dyâmpà kavwa kafumine paanyima paa Butumbi bwa Shekinah apu, nudi bamanye’s, ne tuvwa ne disanka ndambu dya kukâpeta. Tuvwa bambe, mu ngaakwilu mukwabo ne: “Twasakidila, Mukalenge!” Nwamonu anyi? Nenku, paakenzabo nanku apu, bakwetu abu bavwa batambe kwikala babwikila mu mushindu wa ne baakaditwa anu mu diciseka. Kabavwa bamanye ne cyônso Aci civwa ncinyi to. Nwamonu anyi? Bacidi anu babwikila. Nenku, kudi bamwe munda ne bakwabo pambelu. Nenku ewu. . . Kadi Nzambi mmumweneke patooke bwetu twêtù, musokoka. Bya mwomumwe mpindyewu!

²³⁶ Pashiishe paakalwa Nzambi, mu luse Lwende, kupanda cilâmbâ cikudika apu, Wâkashââla mumweneke patooke. Kadi, bôbô bavwa batambe kwikala batukine mu bilele byabo abi, mu mushindu wa ne Yêyè ucivwa anu musokoka bwabo bôbô.

Bya mwomumwe mpindyewu! Butumbi bwônso abu, busokoka, mbusokoka bwetu twêtù mu Kilisto, Dîyì, Yêyè udi wetu Ntempelu awu.

²³⁷ Kaa, mpindyewu, nebikengele bwa ngondoleku ndambu mu cyôci eci. Numfwileku luse bwa disaluka dyanyi mu dinda emu, kadi, kaa, nkaadi—ndi mujinge kutwala cyôci eci kukaadi ntanta mule be, ndi. . . cidi anu kacya cyanswika munda mwanyi emu. Nwamonu anyi?

²³⁸ Monaayi, Butumbi bwônso bùdi mu Nzambi abu budi mu Dîyì. Mabenesha ônsò àdi mu Nzambi awu adi mu Dîyì. Mbisokoka, bwa mwena bupidya, kudi bilele. Nudi bumvwe cîndi muswe kwamba aci anyi? Kadi Byônso bidi mu Kilisto. Cyônso civwa Nzambi mwikâle, Yêyè *wakaDishiya munda mutupu*, “kenos,” ne wakabwela munda mwa Kilisto; ne twêtù, mu Kilisto, tudi paanyima paa cibwikilu.

²³⁹ “Ee, ndi munda mwa Kilisto,” mûdi wamba. Kadi pashiishe witabuuja ne kudi Nzambi yisatu anyi? Ubatiiza mu dînà dya “Taatu, Mwânà, ne Nyuma Mwîmpè” anyi? Witabuuja bilele byônso ebi ne bintu byônso byûdi witabuuja, bya bakulu ebi anyi? To, wêwè uci anu paanyima paa cibwikilu. Nwamonu anyi? Bwela munda mwa cibwikilu. Yêyè, Kilisto, udi Dîyì.

²⁴⁰ “Mushindu kaayi? Mêmè ncyêna ngiitabuuja dyondopa dya kudi Nzambi to. Ncyêna ngiitabuuja bishima ebi ne bintu bu nanku nansha.”

²⁴¹ Ee, udi umona’s, wêwè kwêna—wêwè kwêna munda, munda mwa cibwikilu to. Kwêna ne cyûdi mumanye pa Cyôci aci to. Wamonu anyi? Kilisto udi Dîyì! Ne patudi mu Dîyì, tudi

munda mwa Kilisto. Kadi mmunyi mûndi mwa kwikala munda mwa Kilisto, mwikàle mvila Kilisto? S’uvwa n’Yèyè wákamba ne: “Dîyì nansha dimwe kadisakidiibu anyi kadyumushiibu” awu. Mmunyi mûdi mwa kuumushila ne kusakidila, dîbà adi? Wamonu’s, bidi bileeja ne ncibwikilu kaayi cidi cikubwikila aci. Nwamonu anyi?

²⁴² Twètù munda Mwende! Dîbà adi twètù, biikàle munda Mwende, tucidi anu babwikila bwa balongi baa maalu a ntendeleelu ne balongeshi baa tulaasa tutumbuke baa pa buloba ebu. Nwamonu’s, bwetu Butumbi butudi naabu ne tusankila abu, tucidi anu babwikila bwa beena pambelu abu. Bôbò badi beela meeji ne tudi “bapàle, batomboke,” kabidi’s. Nwamonu anyi? Nwamonu anyi? Ncya bushuwa. Kadi twètù badi munda emu aba, munda mwa Kilisto, babatijiibwe munda Mwende, (Kolinto wa Kumpala 12), munda Mwende, tudi baabanyanganyi baa Butumbi ebu. Nwamonu anyi? Kadi kî mbàdi pambelu to; wèwè uciidi anu utangila munda, mwikàle uCivila. Nwamonu anyi?

²⁴³ Nenku mpindyewu tudi babiikidiibwe bwa kubwela munda Mwende, bwa kwikala baabanyanganyi baa cyònsò cidiYe aci. Tudi babiikidiibwe bwa kubwela munda Mwende, cidi cisokoka beena bupidya, kudi cibwikilu cya mubidi wa buntu. Nwamonu anyi? Mbamanye bwine Butumbi abu, batu baBubala, Budi mu Dîyì mwab’ewu, “Butumbi bwa Nzambi” ne bintu bya nanku awu, cidi anu mwaku cyanaana bwabo bôbò. Bwetu twètù, ndimweneshiibwa! Nwamonu anyi? Kacicyena kabidi mwaku to; mbulelela! Amen!

²⁴⁴ Nzambi wakamba ne: “Bukênkè bwikalèku,” aci civwa mmwaku. Kadi mpindyewu kukaadi bukênkè. Kî mmwaku to; mbukênkè. Nudi bumvwe cîndi muswe kwamba aci anyi?

²⁴⁵ Mpindyewu bwetu twètù kaciyena anu Dîyì difunda to, cidi mbulelela. Tudi munda Mwende. Mpindyewu tudi munkaci mwa kusanka. Mpindyewu tudi tuMubandila. Mpindyewu tudi tuMumona, Dîyì, mwikàle uDimwenesha. Ncisokoka, pambelu pààpa, bwalu (bwa cinyi?) nCibwikila mu mubidi wa buntu. Nwamonu anyi?

²⁴⁶ Kaa, badi bamba ne: “Musùmbà wa bantu baba, batu bayeku mu cilongelu cya penyi? Ntulaasa kaayi—kaayi tudibo balonge? Mpenyi, mmu cinyi—cinyi mudibo bafumine? Mbaa mu cisumbu kaayi—kaayi—kaayi?” Nwamonu anyi? Huh! Nwamonu’s, kabeena baCyumvwa to.

²⁴⁷ Muntu uvwa wambila muntu mukwabo, dituku dikwabo, ne: “Bikengela wikalè mwena dingumba kampanda bwa kwikala mwena Kilisto.”

²⁴⁸ Awu ne: “Mêmè’s ndi mwena Kilisto; ncitu nansha mwena dimwe dya ku ôwò awu to.” Uh-huh. Yèyè ne: “Nzambi nyawu mungumushe kansere aka,” ne, “mpindyewu udi welaku peebe meeji bishi bwa ciine aci?” Uvwa ngangabuka. Yèyè ne:

“Ndeejăku mangumba atu enza ciine aci.” Nwamonu anyi? Eyo. Nwamonu anyi? Cicidi anu cibwikila.

²⁴⁹ Twêtù tudi munda mwa Kilisto. Mpindyewu, anu bu musangu awu, beena kwitabuuja balelela bônso badi baMumona, Dîyì dya mulayi dya dituku edi, dimweneshiibwe patooke. Aci’s cidi mwaku munene pawikala mwa kuwumvwa. Nwamonu anyi? Nwamonu anyi? Beena kwitabuuja balelela bônso, bàdì mu Dîyì, badi bamona Nzambi patooke. Cibwikilu cikaadi cimana kupanda, nenku Nzambi mmwimane patooke kumpala kwenu, mumweneshiibwe. Nwamonu anyi? Nzambi, mumweneshiibwe, patooke.

²⁵⁰ Bwa kwenza ciine eci, bikengela cibwikilu cyetu cya kale cya bilele bya cyena mangumba cipandiibwe cyakabidi. Bwa kumona bushuwa ne Cidi ncinyi, bikengela upatuke munkaci mwa cintakanyi aci. Nwamonu anyi? Kwadyakucyenzaku to; nebatungunuke anu ne kwikala bakoka cibwikilu aci kumpala kwebe, musangu wônso ne: “Kaa, kakwena cya nsongò ku Ciine aci to.” Kadi’s n’Cyôci eci cifunda apa, ne n’Cyôci eci cimweneshiibwe, nudi numona’s. Nwamonu anyi?

²⁵¹ Mpindyewu, kadi bu muntu mwa kubenga kumona dîbà, wàmba ne: “Kaa, mwaba awu, ndi mumanye ne Nzambi wakamba ne: ‘Bukênkè bwikalèku,’ kadi cintu bu nanku kacituku to. Mêmè ndi mbwela mu nzubu wa mu buloba. Mêmè—mêmè ngábèngi bwa kucimona”? Mulumyana awu’s mmupâle. Ûdi ne cintu cipampalamuke mu yêyè amu.

²⁵² Kudi cintu cipampalamuke mu mulume anyi mukaji, udi ne mushindu wa kumona mulayi wa Nzambi, ne kuCimona cimweneshiibwe, kadi pashiishe kubenga kuCiiitabuuja anu bwalu dingumba didi dikoka cilàmbà cikudika dicipwekesha. Nwamonu’s, mubwikila!

²⁵³ Bwa kwenza ciine eci, bikengela bibwikilu byetu bya bilele bya cyena mangumba bipandiibwe, kudi Nyuma wa Nzambi wa Kapyà ne Mwele wa mvita, ùdì Dîyì Dyende. Dîyì Dyende ditu misangu yônso anu Mwele Wende wa mvita. Nwamonu anyi? Ne Yêyè wakangata Mwele Wende wa mvita dyôdi dituku adi, mûle tente ne Kapyà, ne wàkapanda cilàmbà cikudika aci kuumukila anu kuulu to ne kwinshì. Ûdi wënza cintu cimwecimwe aci ne Mwele wa mvita umweumwe awu leelu ewu! Kaciyi “twitabaayi wanyi, kakanda kaanyi kaa twitabaayi, kateshismu kaanyi—kaanyi” to. Kadi Mwele wa mvita wa Mukalenge, nwamonu’s, ùpanda cibwikilu aci too ne kwinshì, nenku umona Nzambi mwimane mumweneke patooke, mumweneshiibwe mu Dîyì Dyende. Cintu kaayi cya butumbi cidi cikengela kumona’s we! Nwamonu anyi? Eyo. Nyuma Mwîmpè ne Kapyà kàà Nzambi, Mwele Wende wa mvita, ùcipanda. Dîyì didi dipanda cibwikilu cya cyena mangumba.

254 Ee, bu wêwè mwa kwamba anu cyanaana ne, “Dîyì,” kadi Dîyì kadiyi dikwata mudimu? Ndikwacisha kaayi didi Mwele wa mvita mufwanyine kwikala naadi mwab’ewu, paudi wamba ne: “Kawena mwa kupanda”? Wamba ne: “Uh,” kadi kawuyi upanda?

255 Kadi paudi uteeka Mwele wa mvita wa Nzambi awu kuulu kwaka kadi kutangila mudiwu upanda, wôwô utu—wôwô utu ukwaciibwa kudi cyanza cilongolola ne cituma bwa kwenza nanku. Nwamonu’s, ùdi ùcipanda ùcishiya bwashi, kadi’s ki Yêyè awu. Ki wôwô awu uleeja Nzambi mumweneke patooke, Yehowah munene awu. Ki Dîyì Dyende adi dimweneshiibwe, citupa cidi cilaya bwa dituku adi. Nudi nuumvwa Aci anyi? Nwamonu anyi? Padi Mwele wa mvita, mulayi wa leelu, mu dituku edi, ùdi ne cya kwikalaku awu, nenku Nzambi wangata Mwele Wende wa mvita kadi kupanda cibwikilu cya cyena mangumba aci too ne kwinsi ucikoka ucyumusha, ne mwikalè uDimwenesha ne uleeja ne Yêyè udi mwaba awu, anu Dikunji dya Kapyà dimwedimwe adi. Monaayi, aci ki Dîyì dimweneshiibwe bwa milayi ya leelu.

256 Tudi tuCimona anu mwakamona Peetelo paakambaye ne: “Mukalenge, nkudi nganyi kutudi bafwanyine kuya, paanyima paa bamane kumona Eci?” Kutudi twètù aba bafwanyine kuya ki kwèpi? Tudi bafwanyine kuya kashaala beena ekeleeziya kaayi, patukaadi balediibwe mu Umwepele ewu apa? Nwamonu anyi? Ncinyi cinudi nwênù aba bafwanyine . . . Nudi bafwanyine kuya kashaala beena dingumba kaayi paanyima paa bamane kumanya Malelela aa, nwamonu’s, padiwu wôwô miine awu (dyônsò dya kudiwu) aCivila? Dyônsò dya kudiwu! Ncitu mwanji kupetaku nansha dimwepele diikalà mwa kwamba anyi kwenza cintu bwa kuCitwa nyama ku mikolo to. Cya bushuwa. Ncya bushuwa.

257 Ngâkabanga ngendu eyi mwab’ewu, mwaba uvwa ekeleeziya makumi anaayi ne yibidi mwaba umwepele mituule mfranga yayi; ndi mwenze anu nkufika, ncyakasangana nansha umwepele to. Yônsò wa ku yôyò ayi wamba ne: “Yêyè nyawu witabuuja mu dikubiibwa dya Cyendelele.” Aci’s civwa cishiya beena ne anu mikenji ku luseke. Mukwabo ne: “Yêyè nyawu ubatiiza mu Dîna dya Yesu.” Aci’s cidi cishiya mikwabo yônsò ku luseke, nwamonu’s. Nènku, mukwabo wa kudiyi ne: “Yêyè nyawu witabuuja dimiinu dya nyoka. Nyoka pende nyawu kayi ne dimiinu!” Aci’s civwa cishiya . . .

258 Bible mmwambe ne: “Nênteeke lukuna pankaci paa Dimiinu dya mukaji ne dimiinu dya nyoka.” Nwamonu anyi? Nwamonu mwaba awu anyi?

259 Aci, ci—cibwikilu aci, cikaadi cyumushiibwe pa Dîyì. Nwamonu anyi? Ncya bushuwa. Ncibuulwila bâna. Ncyu—ncyumushiibwe. Badi baCimona. Ne pashiishe nebiikalè, mwakambiibwabi musangu kampanda ne . . . Ncya bushuwa.

Nanku's nebùikalè, mwakambiibwabi musangu kampanda ne: "Paudi umona," padi cibwikilu eci cyumushiiibwe pa Dìyì, padi bilele byumushiiibwe pa Dìyì, bu mwakamba Yesu musangu kampanda ne: "Paudi muMmone Mémè, udi mumone Taatù." Nwamonu anyi? Nzambi ne Dìyì Dyende bidi umwe. Mpindyewu nuumvu anyi? Padi Dìyì diikàle dimweneshiiibwe, Cidi ncinyi? Nwamonu anyi?

²⁶⁰ Yesu wakamba ne: "Kenketaayi Mifundu, nudi nwela meji ne nudi ne M- . . . Nudi biitabuuje Nzambi, ngiitabuujaayi kabidi Mémè. Pàngiikalà Nciyi ngenza byenzedi bya Taatù Wanyi to, dîbà adi kanuNgiitabuuji to. Kadi pânGiikalà ngenza cya bushuwa byenzedi, Mémè ne Taatù Wanyi tudi Umwe. Panudi nuMmona Mémè, nudi bamone Taatù."

²⁶¹ Nanku panudi numona Dìyì dimweneshiiibwe, nudi numona Taatù, Nzambi, bwalu Dìyì ki Taatù. Dìyì didi Nzambi. Ne Dìyì, dimweneshiiibwe, n'Nzambi Yèyè mwine mwikàle wangata Dìyì Dyende ne uDimwenesha munkaci mwa beena kwitabuuja. Kakwena cidi mwa kuDivwiya ne mwoyi to anu beena kwitabuuja, anu beena kwitabuuja nkaayaabo. Kadyena . . . Kadyakwikala . . .

²⁶² Udi mwa kwangata blé e kumukuna mu—mu—buloba bwa mushindu mushiilangane, kaakutolokaku to. Kadi, cidi, bidi bikengela kwikalè bufuke kampanda mu buloba abu bwa kutolweshwa blé. Kadi piikalamu kamuyi—piikalamu kamuyi . . . piikalala bufuke mu buloba kabuyiku—kabuyiku, blé kayi mutolweshwa bwa kukumbanangana ne bufuke abu to, kaakutolokaku to. Pa nanku mwaba udi Dìyì dimata nansha mwikàle wa bishi, Dyôdi kadiyi dimate mu mwoyi wa mushindu mujaalame to . . .

²⁶³ Yesu ngwâkamba nanku awu. "Makwabo akamata ku mwelelu wa njila, mu buloba bwa mabwe, ne nyuunyi ya muulu yakalwa e kuàdya." Ki pashiishe kwambaYe ne: "Makwabo akamata mu mēbà ne mu mingonga, yôyi eyi kubànda e kuàfyekela dyakamwe," bilele, mangumba, dyabakana bwa maalu a pa buloba kuDifyekelayi. Kadi kwambaYe ne: "Makwabo akaya mu buloba bwîmpè ne akakwama lukama pa lukama," ne, "ki Bukalenge bwa Nzambi mbwôbò abu."

Ncintu anu cyôci cimwecimwe aci, nwamonu's, bakwabo kabaakwitabuujaku to nansha kakese.

²⁶⁴ Bamwe nebiitabuuje bwa citupa cîpì, bu bayiidi abu. BaakaMulonda, baabûngì baabo, makumi mwandamutekete baakaMulonda munda mwa bidimu, bwa kujandula; bu cidimu cimwe ne citupa nanku awu, anyi bidimu bibidi; anu bwa kujandula, too ne mwakalwabo kujandula kaacintu kampanda mu Yèyè, kamwe . . . bu muvwa mushindu kampanda uvwaYe ne bukole kampanda bwa kwenza bintu ebi, anyi mudi dikamà dya kâlulù, mwena majimbu wa mushindu kampanda, civwaYe

mufwanyine kwenza bwa kupatula biine bintu ebi, mushindu uvwaYe mwa kumanya bivwa mu myoyi ya bantu ne bivwabo beela meeji. Ki ndekeelu wa byônsò kujandulabo ne Ûkaavwa wàmba ne Yêyè “mmutuuluke mu Dyulu,” ne Yêyè “uvwa Dìyì Yêyè mwine.” Nunku paakamonabo nanku, aci cyakabapicila. Bòbò kwamba ne: “Muntu nansha umwe kèna mwa kuumvwa Eci to.” Ki kuumuka e kuMushiyabo. Ki mamiinu àkamata mu mèbà ngôwò awu.

²⁶⁵ Cidi citwaluja ku cintu cimweciwe aci, mu disangisha dyônsò, nudi ne beena kwitabuuja baa budingibudingi, beena bupidya, ne beena kwitabuuja. Aci citu mu disangisha ne disangisha dyônsò. Udi ubasanganamu dîbà dyônsò. Bamwe baa kudibo badi badingidija bu ne mbeena kwitabuuja, kadi ki mushindu wa mutambe bubi ngwôwò awu. Ne pashiishe badi ne aba badi beena bupidya anu beetu baa menemene aba; yêyè awu kaakunutacishaku to, udi umuka anu bilenga uya wenda ukupa mutu. Kadi aba badi biitabuuja bya budingibudingi, bamba ne mbeena kwitabuuja abu, mushindu ngwôwò awu, ke mushindu udi ukengela nwênù kutabaleela ngwôwò awu, mbeena kwitabuuja baa budingibudingi abu. Ne pashiishe kudi beena kwitabuuja bashuwashuwale. Nudi numona basatu abu anyi?

²⁶⁶ Kuvwa beena bupidya abu. Mmwenze Yêyè anu wamba ne: “Kudya Munyiinyi wa Mwânà wa muntu,” éyi, balumyana wa yaaya, bwalu bumba butuuka’s!

²⁶⁷ Bakwabo bavwa beena kwitabuuja baa budingibudingi. Baakashaala bòbò too, anu mwakashaala Yudaasa amu, too ne kundekeelu.

²⁶⁸ Kadi pashiishe beena kwitabuuja balelela, kabavwa mwa kuCyumvwija to, kadi baakaCiitabuuja, nansha bishi. Baakaya too ne kundekeelu.

²⁶⁹ Cibwikilu, cilele cya beena bupidya, cyumushiibwe, nudi numona Nzambi. Padi cibwikilu cya bilele cyumushiibwa, nudi mwa kumona ne Nzambi uci di anu Nzambi wa Dìyì Dyende. Uci di anu mushaale mukwate ku Dìyì Dyende. Yêyè udi—Yêyè udi Nzambi, Mwena Dìyì Dyende awu.

Aci ncisokoka paanyima paa bibwikilu bya makoba, bwa bakwabo. Eyowa’s, ncyá bushuwa. Bwa aba badi kabayi mwa kuya paanyima paa cibwikilu, Yêyè uci di anu paanyima paa bibwikilu bya makoba.

²⁷⁰ Monaayi. Dîbà adi, twêtù, dîbà adi tudi tulwa citupa Cyende, bu mudibi ne wêwè udi cibwikilu cidi ciMubwikila Yêyè. Wêwè udi citupa Cyende, padi anu Kilisto mwikàle munda mwebe, mushindu uvwa Kilisto mwikàle citupa cya Nzambi. Bwalu Nzambi uvwa munda Mwende, muMuvwije Nzambi. Nunku bu mudi Kilisto munda mwebe, ditekemena dya Butumbi, wêwè udi ulwa citupa cya Kilisto. “Ewu udi ungiitabuuja Mêmè, byenzi

bîndi Mêmè ngenza yêyè neàbyènzè pende.” Nwamonu anyi? Wêwè udi ulwa citupa cya Kilisto padi anu Kilisto mwikàle musokoka munda mwebe. Dîbà adi ncisokoka mwena bupidya, kadi wêwè udi mumanye ne Yêyè udi munda mwebe. Udi mwele Kilisto udi paanyima paa cibwikilu awu mu ntempelu, dikoba. Dîbà adi twètù, bwal- . . . Paanyima apu, bwa bwalu bwa cibwikilu eci, cibwikilu cyakabidi mu mubidi wa buntu, cidi cisokoka Nzambi (Dîyì) kudi mwena bupidya.

²⁷¹ Bu mwakafundiibwabi, nwamonu’s: “Mifunda, nudi mikanda mifundilangana,” mudi Bible mwambe. Mpindyewu, *mukanda mufundilangana* ncinyi? Cidi “dîyì difunda.” Nenu nwènù nudi cidi “cifunda” aci. Mu ngaakwilu mukwabo, udi mufwanyine kuCibala mushindu ewu: “Nwènù,” mudiCi cyambe, “nudi mikanda mifundilangana,” anyi ne, “nudi Dîyì, didi difundiibwe, dimweneshiibwe,” cintu nansha cimwe kaciyi mwa kusakidiibwaKu to. Kwèna mwa kwamba ne: “Ndi mukanda mufundilangana,” kadi mwikàle ne nsòmbelu wa mushindu mukwabo wa cintu kampanda pa kuumusha *Eci* cikaadi cimana kufunda to, bwalu cintu nansha cimwe kaciyena mwa kusakidiibwa anyi kuumushiibwa to.

²⁷² Bu mudi Docteur Lee Vayle munkaci mwa kufunda mukanda udi mwende luumu ewu, ndi muswe nuwumone pashiishe. Mwaneetu Vayle udi mwab’ewu, udi usanganyiibwa mwaba kampanda apa. Mvwa mumumone pambelu. Ngeela meeji ne kêna ne mushindu wa kubwela to. Kadi udi munkaci mwa kufunda mukanda kuntwaku, ne—ne wôwò awu ngwa nkemenu’s, wa Cikondo cya Laodikiya. Nenu ndi muswe bwa nwènù. . . Newupatuke ku mashinyi adi afunda mikanda matuku adi panshi aa. Pa nanku, tudi munkaci mwa kwenza diwubala dya ndekeelu mpindyewu. Nenu pacivwaye ufunda, tuvwa tuyikilanganaPu mwômô amu, nwamonu’s, pa bidi bitangila. . .

²⁷³ Bantu bônso batu misangu yônso anu balwa kûndi, bamba ne: “Mwaneetu Branham, mikungulu mwandamutekete myena dîyì divwa dikungule ayi, ne Yêyè kwamba ne: ‘KuCifundu to, wamonu’s, kadi uCikange,’” ne, “aci ki ciikalà mikungulu mwandamutekete yabuuludiibwa mu matuku a ndekeelu, wamonu’s, mikungulu mwandamutekete miine yikalà mwa kutwambila ayi anyi?” Mpindyewu, aci kaciyena cimweka cimpè menemene anyi? Nwamonu anyi? Kadi ikala mutangile cyûdi wamba paudi wamba nanku.

Yêyè wakamba ne: “Wâmanya kwikadi wâlwa kuCifunda.” Nwamonu anyi? Mikungulu mwandamutekete eyi yidi yàkula mèyi aayi, nwamonu’s, kadi Yêyè kwamba ne: “Kufundu aci to, wamonu’s, kadi bidi bikengela Citwibwe citampi mu Mukanda too ne ku matuku a ndekeelu.”

274 Mpindyewu muntu kampanda, bààbùngì mbangambile, beena teoloji mbangambile ne: “Mwaneetu Branham, bu Mukalenge Nzambi...” Bòbò ne: “Bu—bu... Ne dilabula dyebe, didi Mukalenge mukupè bwa cisamba Cyende edi,” wamba ciine eci ne didipwekesha dyònsò’s, ne, “wèwè’s udi mufwanyine kwikala mwanishila bwa kufunda wèwè mwine—mwine Bible kampanda, Dìyì dyebe wèwè, piikalabi ne Nzambi mmumweneshe.”

275 Mémè kwamba ne: “Aci ncifwanyine kwikala cilelela.” Nwamonu’s, ùvwa ujinga kumpetelapu’s. Nwamonu anyi? Mémè kwamba ne: “Kadi udi umona’s, ncyèna mufwanyine kwenzaku aci to.”

Yèyè ne: “Kuyi mufwanyine kucyenza bwa cinyi? S’udi ne ngiikadilu yònsò yidi yikengediibwa.”

276 Mémè ne: “Kadi, tangila, dìyì nansha dimwe kadyena mwa kusakidiibwa anyi kuumushiibwa to.” Nwamonu anyi?

277 Ki yèyè ne: “Ee, dībà adi, mikungulu mwandamutekete ayi, udi umona’s,” ne, “mikungulu mwandamutekete yidi yituuta makubakuba ayi kī mifwanyine, aci kacyakwikala Dibuulula kampanda dyapeeshabo muntu kampanda anyi?”

278 Mémè ne: “To, mukalenge, aci ncifwanyine kwikala disakidilaKu dya cintu kampanda anyi dyumushilaKu dya Cintu kampanda.”

279 Byònsò mbibuulula mwômò Amu, ne Bitampi Mwandamutekete mbikangule dibuulula dya civwa Cyôci aci. Ki civwaci. Nwamonu’s, cicidi anu mu Dìyì. Nudi numona’s, kwèna mwa kupatuka pambelu paa Dìyì adi to. Kacyakushiya Dìyì to. Ne Nyuma wa Nzambi kaakushiyaku Dìyì adi to. Yèyè neashaale anu ne Dìyì; ufofomija bamwe, kadi mwikàle utabaja mèsù a bakwabo. Ki cyenzaYe misangu yònsò ncyôci aci.

280 “Nudi mikanda mifundilangana, mibala kudi bantu bònsò.” Anyi ne, nudi... Ndi mémè nkudimuna Aci, nkudimuna mu mushindu ewu, nwamonu’s, nCikudimuna anu cyanaana ne: “Nudi mikanda mifundilangana yidi mifundiibwe,” bwalu kwèna mwa kusakidilaKu kantu nansha kamwe to, “mibala kudi bantu bònsò; Dìyì dya Nzambi dimweneshiibwe,” mu ngaakwilu mukwabo.

Nenku Peetelo ne Yone, bwa kucileeja, pààkabàndàbo kuntu kwaka, bantu baakamona ne bavwa bapangi ne kabayi balonge to, kabavwa ne kalaasa kalonga to, kadi baakamona ne bavwa ne Yesu. Nwamonu anyi? Bavwa bapangi ne kabayi balonge to, kadi bavwa mikanda mifundilangana, nwamonu’s, kubalabo ne bavwa ne Yesu. Bwalu, Yesu uvwa uDimweneshila mu bòbò, Kilisto mwikàle mubwikila mu mibidi yabo; mumweneshiibwe, muvwijiibwe ne mwoyi.

281 Bu pavwaYe munda mwa Mòsà apu. Pavwa Dîyî munda mwa Mòsà, ùvwa Nzambi mu mubidi. PavwaDi munda mwa Yesu, Divwa Nzambi mu mubidi. Nwamonu anyi? Cintu cimwepele cyakenzaYe civwa anu kushintulula kwa cibwikilu Cyende cya kwîsù, kî n'Dîyî Dyende to, kî ngiikadilu Wende to. Yêyè udi umwèumwè awu makeelela, leelu, too ne kashidi. Yêyè wakashintulula anu mmwenekelu Wende cyanaana. Wàkashintuluka kuumuka ku Noa kuya ku Mòsà; Wàkashintuluka kuumuka ku Mòsà kuya ku Davidi; kuumuka ku Davidi, ku Yozefu; anu nanku too ne mwakalwaYe kubwela mu kaabujima kaa Bunzambi mu ciikadilu cya mubidi. Nwamonu anyi?

282 Cicidi anu Nzambi umwèumwè awu! Amen. Amen. Ndi ntekemena ne aci cidì cinupeta's. Nwamonu anyi? N'Nzambi umwèumwè awu, kadi Ùdì ùvwàla anu cibwikilu cikwabo. Nwamonu's, Ùdì ùvwàla cibwikilu cikwabo.

283 Wàkacyèenza mu balongolodi, kuvwala cibwikilu kampanda, kuvwala cibwikilu kampanda. Too, ndekeelu wa byònsò, ne mwavuCì kupicila mu cikondo cya ba-Luthériens, kupicila mu cikondo cikwabo, pashiishe ndekeelu wa byònsò Cipatuka cikabwela mu Cijima. Anu pabwîpî menemene ne kufikaCì, muprofeta udi ujuuka cyakabidi. Cidici cyenza, cidì cidyanjila kuleeja Dîyî mu cimfwanyi, cileeja cikaavwaku mwab'ewu, cibuwulula cikaadi cyenzeke, civwabo bashiile mu njila, bwa Ekeleeziya ikalè kayi ne...kayi ùpanga dyumvwa to. Pashiishe padi cyòcì eci cijimina, pashiishe, bu mwakamba Yone ne: "Mémè ndi ne cya kupweka, Yêyè udi ne cya kubànda," dîbà adi byònsò-mu-byònsò bidi bilwa mu Yêyè. Yêyè umwenshiibwa mu kaabujima, kupicila ku Luther, Wesley, ne cikondo cya beena Mpenta, twenda tulwa, twenda tulwa, too padiYe umwenshiibwa mu kaabujima, nudi numona's, ùpweka, anu dimwenshiibwa pa dyòdì, Nzambi udivungulula: NuMumonaayi (Mpindyewu, monaayi.) muujiibwe mu milayi Yende bwa *edi* dituku, bu muvwa *bòbò* abu naadi.

284 Mpindyewu Mòsà uvwa Dîyî mu dituku adi, bwalu Dîyî dyakamupeebwa yêyè bwa dituku adi; Mòsà. Yozefu uvwa Dîyî mu matuku awu, mwikàle uleeja cimfwanyi cya Kilisto anu menemene. Nwamonu's, yònsò wa kudibo uvwa Dîyî.

285 Kadi paakalwa Yesu, Yêyè ki uvwa Dîyî mu kaabujima kaaDi, bwalu ndongamu yònsò nkòng wa bupikudi uvwa muteekiibwe mu Yêyè. Ndongamu yònsò nkòng wa bupikudi kavwa muteekiibwe mu Mòsà to, kavwa muteekiibwe mu Yozefu to, kavwa muteekiibwe mu Eliya to. Nwamonu's, bòbò abu bavwa anu citupa cya Dîyî, biikàle bafunkuna Dyòdì adi. Nwamonu anyi? Mpindyewu monaayi, lamaayi meeji enu; ki Cyòcì cilwalwà eci, bu mùnyakwamba. Nwamonu's, ndongamu yònsò nkòng kavwa mu bòbò abu to. Bòbò bavwa bafunkuna Dyòdì adi.

286 Ki bwa cinyi, paanyima Pende Yèyè, Kaabujima, twètù katwena mwa kufunkuna cintu kampanda cikwabo to. Cidi ciMufunkuna Yèyè paanyima, Dìyì. *Eci* ki Dibүүлuла dijima; cintu nansha cimwe kacyna mwa kusakidiibwa anyi kuumushiibwa ku Dyòdi to. Ki Dibүүлuла dijima *ndyòdi adi*. Byònsò abi, mundidimbi wa Yèyè ùvwà ne cya kulwa; kadi paakalwaYe, Yèyè ki uvwa Mupwangane awu. Ebelu 1: “Nzambi mu bikondo bya kale wakaakwila ne baataatù ku baprofeta,” Nzambi wakaakwila ku bibwikilu, baprofeta, “kadi mu matuku a ndekeelu aa kudi Mwan’Ende, Yesu Kilisto.” Ki bwalu mbwòbù abu’s. Mubuulula kwaka ku Kalvariyo, Mwànà wa Nzambi awu, mubuulula.

287 Monaayi, “muvwijiiibwe ne mwoyi.” Nenku, leelu ewu, padi Dìyì dimweneshiibwe mu mabungu a buntu, bibwikilu, cidi kakuyi mpatà to Dìyì dyùle mu dituku adi, diikàle dyalukila ku Nzambi. Biikàle babatiijiiibwe munda Mwende, bilondeshile Kolinto wa Kumpala 12, tudi tulwa bafwanyikijiiibwe Nende. Amen.

288 Ngǎmbì ne ntusunsa makumi asatu, kadi ndiku mwa kupeta katanci kakwabo anyi? [Disangisha didi dyamba ne: “Amen.”—Muf.] Nwamonu anyi? Tangilaayi, ncyena anu mwa kupicisha eci mwòmò emu to. Monaayi, bafwanyikijiiibwe Nende!

289 Mpindyewu monaayi. Mbanganyi badi beena mwabo baa Amerike mwab’ewu? Elaayi byanza muulu. Eyo, udi mwena mwabo wa Amerike, pa nanku udi mufwanyikijiiibwe ne ditunga edi. Cyònsò cidi ditunga edi aci, ki cyùdì ne cya kwikala. Ncyà bushuwa anyi? Wèwè udi butumbi bwende bwònsò ne udi bundu bwende bwònsò. Udi mufwanyikijiiibwe nende. Wèwè udi mwena Amerike, pa nanku udi mwangàte Amerike. Aleluuyah!

290 Mémè mvwa ne George Washington paakasabukaye musulu wa Delaware. Ndi mufwanyikijiiibwe nende. Ncyà bushuwa. Mvwa ne Abraham Lincoln pàakaakulàye ku Gettysburg. Mvwa mwimanepu. Mvwa ne basalaayi ku Guam, nwènù balumyana, panwàkabàndishà dibendela adi. Mvwapu. Mémè ndi mwena Amerike; ndi mufwanyikijiiibwe nende. Amen. Mpindyewu, bwa kwikala mwena Amerike, bundu bwònsò budiye mwambule mu mvita ya Ditombokela ditunga abu, ndi mubwàmbùle, bwalu ndi mwena Amerike. Ncyà bushuwa.

291 Nenku mémè bu mwena Kilisto, ndi mufwanyikijiiibwe Nende. Amen! Mvwa ne Noa paakabwelaye mu bwàtù apu. Mvwa ne Mòsà paakatukaye mu Ejipitu. Amen! Mvwa Eliya pa mukuna wa Kaamèèlè. Eyowa’s, mukalenge! Butumbi kudi Nzambi’s we! Mvwa nende paakenzaye cyòci aci apu. Bushuwa mémè mvwa Nende, mémè kudifwanyikija mu lufu Lwende kwaka ku Kalvariyo pàngààkafwà ku maalu a pa buloba, ku mémè mwine ne ku bilele byònsò. Mvwa mufwanyikijiiibwe

Nende. Mvwa mufwanyikijiibwe Nende mu dinda dya Paasaka dyakabiikaYe ku bafwe adi. Mvwa mufwanyikijiibwe Nende mu Dituku dya Mpenta adi, paakapweka Nyuma Mwîmpè bu cipeepele cikole cya civuma. Mvwa mufwanyikijiibwe Nende. Cyônsò civwaYe aci ki cîndì, cyônsò cîndì mêmè eci ki civwaYe; amen, biikàle bafwe mu Yèyè tudi bafwanyikijiibwe Nende. CidiYe ki cîndì mêmè. Amen!

²⁹² Cidi ditunga edi aci ki cîndì. Ndi ndyumvwa maleela bwa kwikala cyôci aci. Ndi mudilongolole bwa kwambula bundu bwadi. Ndi mudilongolole bwa kwambula bundu bwa kwikala mwena Amerike. Ncya bushuwa. Kadi ndi ciine aci misangu yibidi bwa Yesu Kilisto! Cyônsò civwaYekù aci ki cîndì. Ntu muswe kwikala mufwanyikijiibwe Nende.

²⁹³ Bapostolo abu, musangu wakaalukilabo awu, bavwa beela meeji ne... bavwa babasekeseke, babatwatwatwe mênà a mishindu yônsò ne bikwabo, bôbò bavwa beela meeji ne civwa nduumu lunene bwa kwambula bundu bwa Dînà Dyende.

²⁹⁴ Ndi ne disanka leelu ewu dya kwikala umwe wabo, mwikàle mufwanyikijiibwe ne Dîyì, didì diikàle Kilisto. Bafwanyikijiibwe Nende! Babatiijiibwe munda Mwende, tudi tulwa bafwanyikijiibwe; bafwanyikijiibwe mu cimfwanyi Cyende, bafwanyikijiibwe ne Dîyì Dyende, didì diikàle Yèyè. Piikalabi ne ndi munda mwa Kilisto, ndi Dîyì Dyende; bwalu Yèyè udi Dîyì, ne cidiYe aci ki cîndì. Amen! Nudi nuCyumvwa anyi? Eyo.

²⁹⁵ Dîyì dimweneshiibwe, anyi dibuuludiibwe mu Dibuulula didîmu adi, dîbà adi aci cidi cimvwija cinyi? Piikalabi ne Yèyè udi Butumbi bwa Shekinah abu, mêmè's ndi citupa cya Bwôbò abu. Amen! Kaa! Amen! Ncya bushuwa. Dîyì Dyôdì diine dibuulula, didi didibuulula Dyôdì diine.

Anji elaayibi peenu meeji! Maalu masokoka a Nzambi matumanyisha mu dituku edi, kudi Musanjeela umwèumwè wa ku Dyulu wâkamanyishiibwa kudibo mu matuku awu awu; monaayi, Dikunji dya Kapya dimwedimwe dyâkatùmà Môsà adi; Dikunji dya Kapya dimwedimwe divwa pa Môsà dyâkafundà Bible adi; Dikunji dya Kapya dimwedimwe dyâkatuutakeenà naadi Pôlò mu njila wa ku Damaseke adi.

²⁹⁶ Ki Pôlò kufundaye Dipungila Dipyadipya. Vulukaayi ne, Maataayi, Maako, Luuka, ne Yone, bôbò baakafunda anu byakamonabo abi; kadi Pôlò uvwa ne Dibuulula. Yèyè awu ki wâkaCipâtula patooke, bwalu wâkatuutakeena ne Dikunji dya Kapya, yèyè mwine. Kadi elaayi meeji, dimwedimwe adi . . .

²⁹⁷ Kwaka naka, Yozefu, bwônsò bwabo baakafunda bivwa munkaci mwa kwenzeka, muntu yônsò wâkafundà kale mu dituku adi awu. Kadi paakamata Môsà mu cyalu, uvwa ne Dibuulula. Yèyè wakatuutakeena ne Dikunji dya Kapya, nenku Môsà wakapeta Dibuulula dya mushindu uvwa Genese.

Ki kufundaye mikanda yinaayi ya kumpala ya Bible, Mòsà awu ngwàkayifùnda. Aci ncyà bushuwa anyi? Bwalu yêye wakatuutakeena ne Nzambi mu mmwenekelu wa Dikunji dya Kapyà, mubwikila mu Dikunji dya Kapyà.

²⁹⁸ Paakatuutakeena Nende Pòlò mu njila...Bayiidi bôbò baakafunda anu byakaMumonabo Wenza abi, kadi Mòsà yêye uvwa ne Dibuulula; kupwekaye mu Ejipitu munda mwa bidimu bisatu e kulongaye, ki kumonaye ne Nzambi wa Dipungila Dikulukulu awu uvwa n'Yesu wa Dipyadipya, Dibuulula's! "Ncyàkashikukila cikeena-kumona cya mu Dyulu to." Ncyà bushuwa. Cya bushuwa!

²⁹⁹ Kadi anji elaayibi meeji pa Cyôci aci! Dikunji dya Kapyà dyàkalwà pa bantu bàakafùndà Bible abu adi, ndyôdi Dikunji dya Kapyà dimwedimwe adi mwab'ewu, leelu ewu, diikàle dyumvwija Bible. Amen! Mushindu mwine utudi tuMusakidila bwa ciine aci's we! Dimwedimwe adi! Ndisambiibwa kaayi! Ndifwanyikijiibwa kaayi! Ndi nsanka bikole bwa kwikala mufwanyikijiibwe mu ciine aci, mu mushindu wa mpanga too ne cya kwenza's! Mbîmpè mêmè kwikala mufwanyikijiibwe mu Cyôci aci pamutu paa kwikala mufwanyikijiibwe ne bônso ba-Baptistes, ba-Méthodistes, ba-Presbytériens, ba-Luthériens, ne bakwabo bônso abu. Mufwanyikijiibwe mu Dìyì adi mudi Butumbi bwa Shekinah ne Dibuulula bisanganyiibwa!

³⁰⁰ Dikunji dya Kapyà diikàle dimweneka ne mèsù munkaci mwetu, dijaadika ne Mukenji ngwa cya bushuwa, bu mwakenzaYe pa Mukuna wa Sinaayi. Vulukaayi ne, kumpala kwa mukenji wa cya bushuwa kupatukawu, Mòsà wakayiisha ne wàkabàlombola too ne pambelu paa Ejipitu; kadi kwòkò aku, kumpala kwa mikenji myena diinà kwediibwayi (kwa Bitampi kutwadiibwabi), Nzambi wàkatùuluka kumpala kwa cisamba ne wàkajaadika ne Mòsà uvwa mutumiibwe kudiYe, (ncyà bushuwa anyi?) mu Dikunji dya Kapyà dyàkambà Mòsà ne uvwa mumona mu kaacipuka ne dyakule nende adi.

³⁰¹ Kaa, mu matuku a ndekeelu aa, pa kumona Dikunji dya Kapyà dimwedimwe adi anu munkaci mwetu menemene, dyamba Dìyì dimwedimwe adi; kaciyi anu aci to, kadi diikàle diDyumvwija mu kuDimwenesha, ne kuDijaadika ne, Didi Bulelela.

Pa nanku, bantu kabeena ne mushindu nansha umwe bwa kubengabo kwitabuuya nansha, amba anu bôbò baswe kwenza nanku ku bukole's. Nenku, díbà adi: "Ewu udi wenza mpekaatu ku bukole paanyima paa mumane kwikala ne dimanya dya Bulelela, kakwena kushaala kabidi mulambu wa mpekaatu to."

³⁰² Monaayi, Dikunji dya Kapyà dimwedimwe dyakatumiibwa kudi Mòsà ne kudi Pòlò, dyakafunda Bible adi, mpindyewu nditumiibwe bwa kuMubuulula. Ngàsà wa Nzambi, Nzambi udi kayi ushintuluka awu, mwikàle uuja milayi ya Maataayi 28

ne: “Monaayi, Ndi neenu misangu yônsò”; uuja Yone Munsantu 14.12 ne: “Byenzedi bindi Mèmè ngenza, ne nwênù peenu”; uuja Luuka Munsantu 17.28-29 ne: “Mu matuku a ndekeelu Mwânà wa muntu neabuuludiibwe,” nwamonu’s, nwamonu’s; Maalaki 4 ne: “Monaayi, Ndi nnutumina Eliya muprofeta, wikala mwa kwalujulula Ditàbuuja dya bantu ku Dìyì dya ku cibangidilu.” Nwamonu anyi? Mushindu udi eci...Nwamonu anyi? Kaa, ekelekele!

³⁰³ Wàkafwà, mbwa Yêyè kuDibuulula kutudi. Mpindyewu tufwayi ku twètù biine, bwa kuMubuulwila bakwabo. Tufwayi ku bilele ne bikwabo, bwa kuMubuulwila mukwabo. Tufwayi ku mangumba, bwa kuMubuulwila bakwabo.

³⁰⁴ Monaayi, ntempelu wa kale awu uvwa ne Butumbi bwa Shekinah munda mwende, ne Bukênkè bwa Shekinah pamutu paa Dìyì apu. Dìyì n’Dimiinu; Divwa dipatwila anu beena kwitabuuja nkaayaabu mâmpà a baakwidi. Mashi kabidi avwa pa cipungidi apu; ne Mashi mmâyì, mâyì àdì afila mwoyi kudi lutete, blé, dimiinu, didi diikàle Dìyì.

³⁰⁵ Bu mwakamba Yesu ne: “Anu mwàkabàndishà Mòsà nyoka wa cyamu cya kabanda,” ki kwambaYe kabidi ne: “Nzambi wakatamba kunanga baa pa buloba mu mushindu wa ne Yêyè wakabapa Mwan’Ende umwepele mulela; bwa ewu yônsò wâMwitabuuja kafu to.” Mòsà wakatuuta lubwebwe mu cipeela, kwa kusungila cisamba civwa cyamba kubutuka, anyi bwa kutwala mâyì. Nzambi wakatuuta Yesu, bwa kupatula Nyuma munda Mwende, bwa cisamba civwa cyamba kubutuka. Mashi akapatuka munda Mwende, mbwena kwamba ne: “Mâyì a disukula naawu ku Dìyì.” Mumwe ne, Mâyì adi atwadila Dimiinu Mwoyi. Nenku akatwala Butumbi bwa Shekinah; kukenkeshabu pa Dìyì, aci kutwalaci mâmpà a baakwidi. Kadi mâmpà a baakwidi avwa anu bwa cisamba cisungula. Uh-huh. Ncya bushuwa anyi?

³⁰⁶ Nenku kubwela kwa mu cibwikilu, kuya dyamwamwa dya cibwikilu, kubwela mu Bwikadi Bwende, mwine mùdì Dìyì disanganyibwa amu (kì ntwitabaayi to), Dìyì; mwômò amu pa kumona kwa Butumbi bwa Shekinah, Shekinah awu, Bukole, Nyuma Mwimpè mwikàle ukenkesha pa Dìyì, upàtula mulayi, bidi bileeja ne wêwè udi paanyima paa cibwikilu. Amen!

Ngäpìci bibwikilu bipanda mùdì Butumbi
kabüyikù búpwa to, (Uh!)

Aleluuyah, aleluuyah;
Ndi ne mwoyi mu Bwikadi bwa Mfumu.

Ngäpìci bibwikilu bipanda mùdì Butumbi
kabüyikù búpwa to,

Ndi ne mwoyi mu Bwikadi bwa Mfumu.

³⁰⁷ Ciseba cya kale cya kasengelanshimba, mangumba awu, mmuupudiibwe. Ndi mubipandà e kupicilamù, kubwela mu

Butumbi bwa Shekinah, ne ndi mmona Dìyì. Ndi mmona Dikunji dya Kapya ditwa eku ne eku. Ndi mmona Dìyì dimweneshiibwe. CyakambaYe ne Neënzè mu matuku a ndekeelu aa, nyewu ncimona cyenda cikola. Ndi mmona bânà munkaci mwa kudya Dyâmpà dya Shekinah adi difumina ku diboba dya Dìyì adi, bàdì bàDìitabuujà abu. Amen! Edi ndìbà kaayi dya butumbi ditudi ne mwoyi's we! Nudi numona's, Shekinah uvwa pa Dìyì; ne mwinshi amu muvwa Dyâmpà. Ne muvwa Mashi, mamyamina, ciine cidi ciÀpa mâyi. Nyuma ngudi ufila Mwoyi kudi Dìyì. Ne. . .

Mbanganyi bakaadiku babale, bateeleje mukaba wa mêyì pa *Dilumbulwisha?* Eyowa's. Bâabûngi baa kunudi bakaadi bawuteeleje. Nudi numona mwaba awu, bikengela. . .

Dìyì adi didi ne cya kukola. Bwa kukola, bidi bikengela Dyôdì kwikala mu buloba bwa mushindu mwimpè. Nwamonu anyi? Nenku Nzambi udi wenza mulayi, ne wôwò udi ulenga mwoyi awu, kawena mwa kupangilaku to.

³⁰⁸ Noa wakindila munda mwa bidimu lukama ne makumi abidi. Abraham wakindila bidimu makumi abidi ne bitaanu, mwindile mwânà. Nzambi nguvwa mwambe nanku, ne aci civwa cikose bwalu. Nwamonu anyi? Ncinyi aci? Dìyì divwa mwaba awu biikâlè badyela mâyi ku diitabuuja, ku diDìitabuuja, aci cyakatwala bipeta. Cyakatwala mwânà wa balume; cyakatwala mvula; cyakatwala mvula wa Noa; cyakatwala virgo wâkiimita awu.

³⁰⁹ Muprofeta kampana wakamba ne: “Virgo neimite difu.” Kakuyi mpatà to nsongaakaji yônsò wakaya kalongolola twende tulâmbà twa mwânà. Ee, muprofeta Yeshaayi ewu uvwa mujaadikiibwe ne mmuprofeta, mushindika kudi Nzambi. Kadi Mukalenge kwamba ne: “Virgo neimite difu. Mêmè nêmbâpè cimanyinu citambe mfukilu, cimanyinu cinene; virgo neimite difu.”

³¹⁰ Mwaba awu, bantu bônsò abu, beena kwitabuuja abu, anu munudi nwênù bônsò emu. Ki kuumvwabo muprofeta awu wamba nanku, nsongaakaji yônsò. . .Muntu yônsò kwambaye ne: “Awu neikalè anu wanyi mwânà wa bakaji. Eyowa's, mukalenge.” Muntu yônsò kuya kasumba tunshesheete ne mikaaya ya mwânà ne byônsò, udilongolola, bwalu uvwa mumanye ne yêyè ki wîkala mwa kumulela. Lukongo alu kupitalu, ki kudyambidilabo ne: “Muprofeta mujaadikiibwe awu, mushindika kudi Nzambi, mmunyi mudiye mufwanyine kwamba cintu cya mafi? Cidi ne cya kwikala anu nanku!”

³¹¹ Mpaakamana kupita bidimu nkama mwandamukulu, ki paakalelaye mwine mwânà awu. “Maulu ne buloba nebijimine, kadi Dìyì Dyanyi kadyakujimina to.”

³¹² “Nenku nebyenzeke mu matuku a ndekeelu,” mudi Nzambi wamba. Nwamonu's, s'ki twètù aba, Bu—Bukênkè pa Dìyì. Anu mudi bukênkè bwa dîbà bushintulula dimiinu dyumuka ku

butumbi diya ku butumbi amu, twètù peetu tudi balwe—tudi tulwa peetu batambe kufwanangana Nende patudi tushaala ne mwoyi mu Bwikadi Bwende; bafwanangane Nende, biikàle bakumbanangane ne cimfwanyi Cyende cibeneshiibwe patudi twenda twenda Nende apu.

³¹³ Tangilaayi numone cidi dîbà dyaenza. Udi ukuna dimiinu, cidi cyenzeka ncinyi? Dimiinu adi didi dibola. Munda mwa dimiinu adi mudi mwoyi. Mwoyi udi upatuka ne utwala cikolakola. Mpindyewu, aci kacyna cifwanangane ne cya ntwadijilu to.

Ki Luther nyêyè awu. Civwa ncikolakola. Eyo.

Ki cikolakola aci kutungunuka, ne katanci aka, kutwalaci mwepu. Nwamonu's, aci ki civwa ditabuluja dya Wesley; kacyi cifwanangane ne cikwabo aci to.

Ki pashiishe kulwaku ditabuluja dya beena Mpenta, nwamonu's, kutwaladi dibatiiza dya Nyuma Mwîmpè. Eyo.

Cyakenzeka ncinyi? Tukaadi tupeta bwowa butoloke pa mwepu. Budi bubanga kumweka bibi. *Eci cintu, cyacya cintu*, kacyi cifwanangane ne Diyì to. Kacyi cifwanangane ne bikwabo bya ku Cyôci abi to. Kacyi cifwanangane ne Lutete lwa ku cibangidilu lwàkayà mu buloba alu to.

³¹⁴ Kadi Nzambi uci anuku bwa kwenza cyôci aci—cyôci aci anu dicyenza. Monaayi, cidi cyenza cinyi? Ndekeelu wa byônsò cidi cyalukila cyakabidi ku Dimiinu dya ku cibangidilu adi. PaakalwaYe mu mmwenekelu wa Martin Luther; paakalwaYe mu mmwenekelu wa John Wesley; paakalwaYe mu mmwenekelu wa beena Mpenta; bidi bikengela bwa Yêyè kuDibuulula cyakabidi bu Dimiinu dimwedimwe dyàkayà mu buloba adi, Mwânà wa muntu. WàkaDibuulula bu Mwânà wa Nzambi, mu cikondo cya cikolakola ne bikwabo, kadi mu cikondo cya ndekeelu eci bikengela aDibuulule cyakabidi bu Mwânà wa muntu. Nudi nucyumvwa anyi? Eyo, anu bu ku cibangidilu, mufwimba!

³¹⁵ Nenku cikolakola aci cidi cikola cilwa cinyi? Cidi cyenda cikola dîbà dyônsò. Kaacikolakola kakese aku kadi kakola, kadi kakeena anu kafwanangane ne lutete lwa ku cibangidilu alu to. Anu muvwa mukenji wa Luther kawuyi nanku to; to, pashiishe kulwaku mikenji mi—mikwabo, Finney, Sankey, Knox, Calvin, anu nanku, nansha umwe wa ku yôyi ayi. Yivwa mene anu mukenji's, kadi civwabi, kayivwa mipete Dibuulula dijima dyaCi to bwalu dîbà kadivwa dikumbane to. Kwêna mwa kuteeka mwepu pa ditala kumpala kwa dîbà dyawu dya kulwawu to. Nwamonu anyi? Ne pashiishe, ndekeelu wa byônsò, kudi kwalukila cyakabidi Dimiinu dya ku cibangidilu divwa diye mu buloba adi.

³¹⁶ Nwamonu's, Nzambi udi ulonda bufuki anu menemene. Nwamonu's, Yêyè wakalediibwa mwânà wa mukooko, ki

bwa cinyi Wakalediibwa mu cidiilu cya nyama. Bânà baa mikooko kabatu balediibwa mu malaalu to. Nwamonu's, Yèyè wakalombodiibwa too ne ku Kalvariyo. Mwânà wa mukooko, mikooko yitu yilombodiibwa. Ncya bushuwa. Mbuji nyitu yiyilombola too ne ku cishipeelu, nudi bamanye aci, nzubu wa cishipeelu. Mbuji ngutu uyilombola, kadi yôyì bidi bikengela bwa kulombodiibwayi. Huh! Ncya bushuwa. Pa nanku Yèyè wakalombodiibwa too ne ku cishipeelu, nwamonu's, bwalu Úvwa Mwânà wa mukooko.

³¹⁷ Bintu byònsò bivwa biMujaadika mu bufuki. Ki bwa cinyi Wākalediibwa mu ngondo mwisâtù anyi mu ngondo mwinâyi, kî mmu ngondo wa dikumi ne mwibîdî to; Yèyè kavwaku mwa kulediibwa mu ngondo awu to, bwalu kudi nêjè mètres asambombo mu mikuna ayi mu cikondo aci cya cidimu. Kavwa nzambi-dîbà to, kadi Úvwa Mwânà wa Nzambi. Nwamonu anyi? Nzambi-dîbà wa beena Loomo mmu matuku makumi abidi ne ataanu a ngondo wa dikumi ne mwibîdî, pàdî dîbà dipicila mu myaba yadi mwômò amu ne bôbô biikàle benza manaya a dicyonkomojangana naawu a beena Loomo awu, biikàle babiikila aci ne mmufikilu wa dilediibwa dya nzambi-dîbà, kadi bavwija aci bu Mwânà wa Nzambi. To, to. Yèyè nguvwa Mwânà wa Nzambi. Wende mufikilu wa dilediibwa uvwa pamwe ne bikwabo bya mu bufuki. Menemene.

Mpindyewu monaayi kabidi mpindyewu patudi twenda tutungunuka apa, tudi ne dîbà dikese ditushaadile.

³¹⁸ Mpindyewu too ne ku cidi cipwangane. Paanyima paa cikolakola cimane kudyenza; paanyima paa munyamvudi mumane kudyenza; paanyima paa lutete lumane kufika ku cikumbuji; pashiishe bikengela cikafike ku bupwangane, cyalukile ku lutete pa lwôlò kabidi.

Nenku, nwavulukaayi ne, lutete ludi ne cya kutolweshiibwa. Nwamonu anyi? Kaluyi nanku to, kalwakwikala ne mwoyi to. Nwamonu anyi? Nansha umwe wa ku bàvwa pambelu pa mikenji ayi kàakufikakù ku Mwoyi to. Bikengela atolweshiibwe ku Cyôcì aci. Kadi, vulukaayi ne, Mwoyi umweumwe uvwa mu cikolakola awu ngudi mu lutete. Ûdi anu wenda udibobesha mwikàle wàlukila, nwamonu's. Yèyè mmu Dibuulule, (cinyi?) Mwânà wa muntu, lutete luvwa luye mu buloba alu. Nuumvu Mukenji anyi?

Beena Ngelika baaka Mwambila ne: "Tudi baswe kumona Yesu."

³¹⁹ Yèyè ne: "Lutete lwa ditala lwôlò kaluyi lumate mu buloba." Nwamonu anyi? Eyo.

³²⁰ Mpindyewu Yèyè waka Dibuulula bu nganyi musangu wakalonda? Mu mmwenekelu mushiilangane; cikolakola ne munyamvudi, ne bikwabo, ne mabeji ônsò ne byònsò bikwabo abi. Yèyè waka Dibuulula pashiishe, (cinyi?) Nyuma umweumwe awu, kadi mu mmwenekelu mushiilangane. Nwamonu anyi?

Kadi ndekeelu wa ditala adi udi cinyi? Didi dyalukila ku lutete lwa ku cibangidilu. Neya bushuwa anyi?

³²¹ Nenku mudimu Wende wa bwambi udi ulwa, kuumukila ku bôbô balongolodi abu, kwalukila cyakabidi ku Diyì dya ku cibangidilu. Diyì didi dilwa kudi muprofeta. Nenku Yèyè wakacilaya, mu Maalaki 4 ne: “Ne bwa kwalujulula Diitabuuja dya bantu ku lutete lwa ku cibangidilu.” Cyàkayà mu buloba aci ncyôci cimwecimwe cidì apa eci. Lutete ndubàndilemù too ne apa. Ndupatuke bu Mwànà wa Nzambi, mpindyewu Ludi luDibuulula apa bu Mwànà wa muntu, ne pashiishe Ludi luDibuulula bu Mwànà wa Davidi pa Nkwasa wa butumbi. Nwamonu’s, Bânà basatu abu, anu menemene. Kaa, ekelekele, cyakabidi bu cya ku cibangidilu!

³²² Mpindyewu too ne ku mudimu wa bwambi mupwangane wa Yèyè mwine; kacyi muntu kampanda to, kacyi dingumba kampanda to, bu mwakakwatabo mudimu mu cikondo aci kuntu kwaka, nwamonu’s; kadi Yèyè mwine mumweneshiibwe, uDimwenesha ku mulayi, uvwija Luuka Munsantu 17.28, Maalaki 4, ne bikwabo, Ebelu 13.8, anu mu yôyi menemene. Pa dîbà adi, bivwa bikengela kwikalabi dîbà kaayi? S’ndîbà didi Dimiinu dya bumfumu dya Abraham diikàle dindile Mwànà mulaya. Ne bifwanyikijilu byônsò bidi ne cya kwikala byûle. Ne Nzambi Yèyè mwine wakamweneka mu mmwenekelu wa muntu, kudi dimiinu dya mubidi dya Abraham, kumpala kwa kabutu, ne Yesu mmwambe ne necîkalè cintu cimwecimwe aci bwa Dimiinu dya bumfumu edi kumpala kwa Mwànà kupinganaYe.

³²³ Monaayi cibwikilu cya kale civwa cisokoke Butumbi aci. Biseba bya kale bya tusengelanshimba abi, kakuvwa bwîmpè bwa kwîsù bwa kucijingabo to; nansha mubidi Wende paawu. Ki bwa cinyi bantu bavwa bamba ne: “KaaMuntu kakulumpe kaa katupa mushindu wawa?” Pàmwâpa mwikàle ne bidimu makumi asatu, ne mvyà, ne mwedi Wende mwikàle ne mvyà, kayi wa batangila banangidila to. Bible mmwambe ne: “Kakwena bwîmpè bwa kwîsù bwa twètù kuMujinga to.” Kavwa ne mmwenekelu wa Mfumu to, ciseba cya kale cya kasengelanshimba aci, kadi, kaa, bwa civwa munda aci’s!

³²⁴ Nenku kaamusumbà kakese kaa “bansantu babunguluki baa mu malaba” basòmbe pamwe mu nzubu wa luuya lukoke mushindu ewu, mudibo bababiikila’s, kakuyi bwîmpè bwa kwîsù bwa nsongo bwa kujingabo, kadi bwa cidì munda aci’s! Ndi mutwishiibwe ne ncibwikila bwa myoyi yàbûngì, nudi numona’s. Nudi numona anyi? Eyo.

³²⁵ Lwà pambelupambelu apu Civwa cintu cyanaana, kadi byônsò bivwa mmunda. Paudi anu ubwela munda mwaCi, dîbà adi mpaudi uCimona. Udi ubwelamu bishi; mmu kulabulangana kwa ku cyanza, anyi mmu kudivwija kwa wa mwômò amu? To. Mmu kulediibwaMu. Kufwa, kulekela ciseba cyebe cya kale cya

kasengelanshimba aci, wamonu's, wêwè mwine wa kale awu, bwa kubwela mu mupyamupya. Nwamonu anyi? Kulekela ciseba cya kale cya kasengelanshimba aci.

³²⁶ Bukênkè bwa Shekinah kabwena... Teelejaayi, nwênù bambi! Bambi, ndi muswe bwa nwênù kuteleja Eci nunku. Paudi anu usanganyibwa munda... Mpindyewu ndi muswe kuya ne bwalu ebu mwikàle mutuuje menemene, bwa nwênù kwikala batwishibwe ne nudi baCyũmvwè. Paudi anu usanganyibwa munda mwa cibwikilu, mwinshi mwa Butumbi bwa Shekinah, Bukênkè bwa Shekinah kabwena bwangata Dìyì dya Nzambi kadi kubuulula Yesu bu "mwena lubuku" to, to, mùdì mangumba enza leelu ewu emu, "lubuku, munsantu mubunguluki wa mu malaba, Beezezebula." Butumbi bwa Shekinah kabwena buMubuulula bu aci nansha.

³²⁷ Kadi Butumbi bwa Shekinah budi bubobesha Dimiinu ditù dilayiibwe bwa dîbà adi, dya Dìyì, bwikàle buMuleeja bu mucikàle Mbata wa mu Cibanda. Budi bupatula Dimiinu adi, Mbata wa mu Cibanda, Dyâmpà dya Mwoyi, Alpha ne Omega, umwèumwè awu makeelela, leelu, too ne kashidi. Yèyè ki citupa cyabanyina beena kwitabuuja. Butumbi bwa Shekinah budi bubuulula, bubuulwila mwena kwitabuuja ne, Yèyè udi umwèumwè awu makeelela, leelu, too ne kashidi.

³²⁸ Kî nne: "Matuku, Yèyè ukaadi mumane kupita, ne Ûkaadi mumane kufwa ne byònsò abi bikaadi bijike" to. Pa nanku wèwè mulunda, pawikala witabuuja aci, pawikala witabuuja aci, kacya kutukù mwanji kupetangana ne Butumbi bwa Shekinah to. Mmunyi mudi Butumbi bwa Shekinah bufwanyineku kuMubuulula mu bapersona basatu? Nwamonu anyi? Mmunyi mudi Butumbi bwa Shekinah bufwanyineku kuMubuulula bu mwikàle mubatiijiibwe, bantu's, mu dînà dya "Taatu, Mwànà, ne Nyuma Mwîmpè," padibi ne kacya kakutu kwanji kwikala muntu mu Bible mubatiijiibweku mushindu awu? Mmunyi mudi Butumbi bwa Shekinah bufwanyine kuMwelela mikalu ne mmushikidile ku bapostolo, padiYe umwèumwè awu makeelela, leelu, too ne kashidi? Nwamonu anyi?

³²⁹ Butumbi bwa Shekinah budi buMumwenesha. Budi bunupatwila Dìyì dya mulayi, buludi kumpala kwenu. Ki bwa cinyi bivwa bikengela Yèyè kubwikila mpala wa Mòsà, mbwalu munda Mwende muvwa Dìyì. Wàkabwikila Yesu, bu kaaMuntu kakese kadipwekeshe, bwa kubapangisha bwa kumonabo Yehowah. Ne Yèyè mmuDi bwikile leelu ewu, mu mabungu a buloba, ne Shekinah. Pambelu padi ne mmwenekelu wa musumbà wa bantsantu babunguluki baa mu malaba, biseba bya kale bya tusengelanshimba, kadi munda mudi musokoka Butumbi bwa Shekinah.

Nenku Budi bubobesha Dyâmpà dya baakwidi ditudi tucyonkomokela edi, ne ditudi tukosolwela mu ditunga

mu mashinyi, nkama ne nkama ya kilomeeta, nwamonu's. N'Cyakudya cya beena kwitabuuja. Cidi anu bwa mwena kwitabuuja. Vulukaayi ne, Dyâmpà dya baakwidi divwa anu bwa mwena kwitabuuja nkaayende, nwamonu's, Dimiinu dya Dyâmpà dya baakwidi. Monaayi. Budi bwenza cinyi? Butumbi bwa Shekinah abu, pa Dyâmpà dya baakwidi, buvwa buDilama ku dinyanguka.

³³⁰ Nwavulukaayi ne, manà àkafùmà mu Dyulu awu, akateekiibwa mu Butumbi bwa Shekinah, kuumukila ku lukongo lumwe too ne ku lukwabo. Pambelu, avwa abwela misanda munda mwawu amu, bufuku, atapila twishi. Ncya bushuwa anyi?

³³¹ Pambelu paa Butumbi bwa Shekinah abu: "Matuku a bishima akaadi mamane kupita. Nwamonu's, byònsò abi bidi anu dikolesha dya maalu." Kadi munda . . .

³³² Tangilaayi, mbapete ndambu wa mamiinu a cilòngò cya ndonda dîbà mu cisasa kampana mu Ejipitu avwa mateekiibwemu mu matuku a Yozefu, kukaadi bidimu binunu binaayi, biipacila abi, kukaavwabi. Yozefu nguvwa muàtèeke mu cisasa amu. Bòbò kuàkùna. Kupetululawu mwoyi. Bwa cinyi? Avwa ne mwoyi.

³³³ Butumbi bwa Shekinah ebu leelu ncinyi? Bwa kubwela dyamwamwa dya cibwikilu, bwa kumona Udi Nzambi udi mwimane kumpala kwenu, bwa kumona Udi Nzambi udi mwimane mwab'ewu kumpala kwetu, Dikunji dya—dya Kapya. Mmubwikila mu mubidi wa buntu. Kadi Shek'nah udi wenza, ùvwa wenza cinyi? Dimiinu dya Dyâmpà dya baakwidi, Dîyì didi dikengela twètù kwikala ne mwoyi ku dyòdì mu dituku edi, ku milayi eyi, Butumbi bwa Shekinah budi bubobesha Dyâmpà dya baakwidi adi, bwenza ne Dyenzeke, buDivwiija Dyâmpà bwa mwena kwitabuuja; yìvwa miteekiibwa mu mabeji a Bible, bidimu ne ku bidimu, Dîyì bwa cikondo eci.

³³⁴ Bwa mangumba, Cidi dibwe dya cilendwishi. Bwa mangumba, badi balendukilaPu. Munda mwa bidimu, Luther, Wesley, Martin Luther, ne bònsò abu, Sankey, Finney, John Smith, Knox, bònsò baakalendukilaPu.

³³⁵ Kadi cidii cikèngelà kwenza ncinyi mu matuku a ndekeelu? "*Kubuulula*" mbwena kwamba cinyi? "Kupatula!" Maalaki 4 udi ne cya kwenza cinyi? Kukudimuna bantu kubuumusha ku cilendwishi aci, kuupula bilele, ne kubuulula Dyâmpà ku Butumbi bwa Shekinah. Tangilaayi numone mudiDi dibobesha ne dipatula menemene anu cyakambaDi ne neDyènzè aci, kaa, ekelekele, Dyâmpà dya baakwidi bwa cikondo eci. Bwa dingumba kaayi, cilendwishi, "musumbà wa bakolessi baa maalu." Kadi, twètù bàdì biitabuuja aba!

³³⁶ Kadi mpindyewu bu mudi Bwakabuulwibwa 10 mulaye: "Maalu masokoka ònsò a Nzambi, àvwa masokoka mu mabeji

munda mwa bidimu abi awu, neabobeshiibwe, apatudiibwa mu cikondo cya Mukenji wa mwanjelo wa mwandamutekete.” Ncya bushuwa anyi?

CidiYe mwambe ncinyi, kukaadi cidimu ne ngondo yisambombo, pawîpî ne bidimu bibidi mene mpindyewu? “Patuka nda ku Tucson; wikalè ku nord wa Tucson, dikubakuba dinene,” ne bivwà ne cya kwenzeka, “Bitampi nebikangudiibwe,” Bitampi biine bidi bibuululà maalu aa abi. Mémè kwalukila anu muvwaYe mwambe amu.

Ncinyi ciine aci? Bidi bileeja ne kaCyena mwa kwikala muntu to. Cidi cikumbana anu menemene, anu buludi mudibi mwa kwikala, musangu wònsò. Ncinyi aci? Ncyanza cya Nzambi, nwamonu’s, kumpala kwetu. Nenu bwalu cidi mu kasumbu kakese, cibwikila mu mubidi wa buntu, ncibwikila bwa bantu baa pambelu. Mmusokoka bantu baa pambelu. Yèyè udi munkaci mwa kuDibuulula kudi bânà bàdì baswe kuyiila. Nwamonu anyi? Ncya bushuwa.

³³⁷ Lusumwinu lwònsò, nwamonu’s, lwònsò mu Bible, cifwanyikijilu cyònsò cya mu Bible, mbimweneshiibwe apa mene kumpala kwetu. Nzambi umwèumwè awu, mu Dikunji dya Kapyà, diine dyàkafundà Bible adi, ne mu Dipungila Dikulukulu ne mu Dipyadipya, udi apa mene munkaci mwa kuCimwenesha, uleeja anu menemene ne civwa ncinyi, umvwija, ne bwa kushindika ne ki dyumvwija ndyòdì adi.

³³⁸ “Twètù ki badi ne dyumvwija adi!” Kadi tucimònàku cyenzeka’s. Nwamonu’s, ki cidi ne bwalu ncyòci aci, tucimonebi cimweneshiibwa.

³³⁹ Cimwènèshìibwe! Yesu wakamba ne: “Piikalabi ne Ncyèna ngenza byenzedi bya Taatù Wanyi to, kanuNgiitabuuji to.” Nwamonu’s, bikengela cijaadikiibwe.

³⁴⁰ Kadi mpindyewu—mpindyewu, kacyi cijaadikiibwe bu Yesu to, baakaMujingila mu—mukusu ku mutu kadi kuMutuuta mu mutu, bamba ne: “Ní Udi Muprofeta, utwámblèbi wàKutuutù awu.” “Nenu ní Udi Mwânà wa Nzambi, enzabi bwa ebi byandamuke mampà.” Nwamonu’s, ki dyabulu nyèyè awu. “Ní Udi Mwânà wa Nzambi, tuuluka ku nkuruse ak- . . .”

³⁴¹ Ndi muswe mémè kwamba ne, Dibuulula didiYe ne cya kwenza adi, ki Dyòdì adi. Kadi mpindyewu, bu mudi Bwakabuulwibwa 10 mubuuludiibwe, maalu masokoka a Nzambi mmamweneshiibwe, mamanyike, muvwa Mukanda wa Bitampi Mwandamutekete mulaye.

Enzaayi mpindyewu bwa diitabuuja dyenu mu Yèyè Udi Dìyì. . . Bwalu, mu Bwakabuulwibwa 10 mbambe ne. . .

³⁴² Anyi, Bwakabuulwibwa 19’s we, eyo. Mvwa mucifunde mwab’ewu, Bwakabuulwibwa 10, bwa kuyaku; kadi kî n’10 to, n’19. PaalwaYe, Yèyè neabiikidiibwe ne, “Dìyì dya Nzambi,”

mubànde pa kabalu katooke, ne bayiidi baa mu Dyulu nebiikalè paanyima Pende.

³⁴³ Pandaayi cibwikilu cya cyena mangumba cya tulaasa tulonga aci! Pandaayi cibwikilu cya cyena mangumba cya bilele aci! Pandaayi bibwikilu bìdì bìMusokokà kunudi abi! Pandaayi bibwikilu bya maditambishi abi, nwênù bakaji. Nudi—nudi bânà baa bakaji baa Mfumu; enzaayi maalù mu mushindu awu, ikalaayi ne nsòmbelu wa mushindu awu. Pandaayi cibwikilu cyônsò, nansha byôbì ne mapolome a Ph.D. ne LL.D. adi amba cinyi. Cyôci ciikàle cibengangane ne Bible awu, pandaayi cibwikilu aci nuye dyamwamwa!

Bwalu, tukaadi bapite baye dyamwamwa dya cibwikilu cipanda. Tukaadi luseke lwa dyamwamwa mpindiyewu, luseke lwa dyamwamwa. Nenku neumone ne, wêwè anu mwenze nanku, mupandè bilele bya kale abi ne bikwabo, ne mufike kudiYe, neuMumone mwimane, Mucimunyi wa Bukole, Dîyì dya mulayi bwa cikondo eci, dimweneshiibwe. Neumone Nzambi wa Bukole mubuulula, uMumona anu munkaci mwetu mwab'ewu mene, mubuulula, Nzambi wa Bukole, kayi mucimuna kudi bilele to.

³⁴⁴ Baakateeta bwa kuMusokoka paanyima apu; bôbò kucyenza, munda mwa bidimu, kadi cikondo cya mulayi kuseemenaci. Nzambi kujuula Mòsà musangu kampanda, ki kupeeshaye bânà budishikaminyi ku bintu abi. Ne Yêyè uciidi anu. . . Yêyè kèna mwa kucimunyiibwaku to. “Maulu ne buloba nebijimine, kadi Dîyì Dyanyi kadyakujiminaku to.” Yêyè udi umwèumwè awu makeelela, leelu, too ne kashidi.

³⁴⁵ Bôbò badi bamba ne: “Kabyena mwa kwenzeka to.” Kadi's byakenzeka. Pashiishe, paakenzekabi, ki bôbò kwamba ne: “Mbya dyabulu.”

³⁴⁶ Kadi aci kaciyena cishintulula Dîyì dya Nzambi to, nansha kakese. Didi dishaala anu “Nzambi,” bwa mwena kwitabuujà, “Mucimunyi wa Bukole; umwèumwè awu makeelela, leelu, too ne kashidi,” ku ngiikadilu Wende, ku Dîyì Dyende, Ebelu13.8.

³⁴⁷ Nkaadi njikija, ngamba eci nunku, bwalu kukaadi kushaale tusunsa tutaanu bwa dîbà dikumi ne ibidi, ndi ngamba anu eci nunku. Ncidi ne mabeji matwe ku dikumi, dikumi ne abidi. Nèngàngatè mûngà musangu, pàmwâpa diloolo edi.

³⁴⁸ Monaayi, monaayi eci. Baakenza disumbishilangana dya bintu musangu kampanda, nenku bavwa ne cindaala cya kale. Nukaadi bumvumvwe bwalu ebu misangu ne misangu. Cindaala cya kale; ki musumbishidyanganyi wa bintu kwambaye ne: “Nudi nucimpeeshila mushinga kaayi?” Bidi mwa kwenzeka ne mpange kubyamba muvwabi, bilondeshile kasala kafunda aku. Ncya kukaadi bidimu byâbûngì, byâbûngì menemene, kadi nyewu cimvwile mu meeji. Ki kwambulabo cindaala cya kale aci, kacyi nansha ne mmwenekelu wa nsongo to; cimweka cibi cya dikema, kantu ne kantu. Yêyè kavwa mene mwa kupeta

nansha muntu wa umuteelelaku mushinga bwàci to. Ndekeelu wa byònsò, ngeela meeji baakamwela mushinga wa ndola umwe, anyi cintu bu nanku awu.

³⁴⁹ Kadi kuvwa muntu mwimane mwaba awu uvwa yêyè kayi wela meeji ne civwa mwa kusumbishiibwa ku awu mushinga to, ke kuya kucyangataye. Kucikwataye mu byanza byende, ke kwangataye kalonda kaa dikoono naaku pa nshinga ne yêyè kucilaaba mafuta, kadi kwimbaye muyengà. Kadi mmwenza anu wimba nanku anyi, bònsò kuditwa mu myadi. Kacya baabalela kabavwaku banji kuumvwa mujiki wa mushindu awu to.

Ki musumbishidyanganyi awu kwambaye ne: “Nudi nungeela yinga?”

³⁵⁰ “Binunu bibidi!” “Binunu bitaanu!” “Binunu dikumi!” Nwamonu anyi? Civwa ncinyi aci? Cyanza cya mumanyi ncyàkabuululà cìvwà cibwikila mu cisanji cya kale aci.

³⁵¹ Bya mwomumwe mpidyewu! Mukanda wa kale ewu, Ùkaadi musunsuke, mbaWùsekèsèke, bawòshè mu mudilu, bawèlùlwile. Kadi cikondo ncyeci cyàkùmbanyi cidibo benze disumbishilangana dya bintu dya cyena mangumba, Nsangilu wa Maekeleeziya wa Buloba bujima. Badi baWusumbisha cyenze bu cintu cya kaciyi ne mwenaci to. Kulwalwa disumbishilangana dya bintu dya cyena mangumba.

³⁵² Kadi, nwavulukaayi ne, kudi cintu kampanda mu Mukanda wa kale awu citu cilaye ne dîngà dituku nekulwe cyanza cidyanjila kulongolola, cidyanjila kuteeka mu mudimu, ciikalà mwa kuWambula kadi kwenza ne Dîyi dya Mukanda ewu, mu mwoyi mudyànjila kulongolola, ku mudimu udibo badyènzèle, necibuulule milayi yidiMu ayi. Mbifwanyine kumweka, kaa, bu musumbà wa kale wa bantsantu babunguluki baa mu malaba, anyi cintu kampanda cikwabo; kadi bidi bikengela anu cyanza cya Mumanyi, Dîyi pa Wówò awu, bwa kubuulula Dîyi adi, kadi cilwa kutamba ne munsantu mubunguluki wa mu malaba's. Cikaadi cilwe nanku kudi muntu yònsò wa kutudi, kî mmwòmò anyi, balunda baanyi? Kacyena mushiki wa dikoleshi dya maalu to. Mbilondeshile Mwena cyanza cidi ne kalonda kaa dikoono naaku nshinga ya cindaala aku.

Tusambilaayi.

³⁵³ Taatù wetu wa mu Dyulu, ku diitabuuja, cyôci eci leelu ewu, nyewu mmona Mumanyi wa Mukanda wa kale awu, udibo bashintakaje ne bilele. MbaWushintakaje ne mangumba. Bòbò baakateeta kwenda naaWu mushinga. Mpindyewu nyewu bakaadi baWushintakaja ne—ne Nsangilu wa Buloba bujima wa bantu, wa maekeleeziya, wa ci-communiste, wa dibenga kwitaba diikalaku dya Nzambi. Ki disumbishilangana dya bintu adi kutungunukadi eku, Mukalenge.

³⁵⁴ Nzambi, anji seemènäku! Mbushuwa ne, Wèwè neusemene. Tùtùminäku muprofeta awu, Mukalenge, udi ukwata kalonda kaa dikoona naaku pa nshinga awu, udi ukwata Dìyì edi ne ujaadika ne Yesu Kilisto udi umwèumwè awu makeelela, leelu, too ne kashidi. Bààbùngì, Mukalenge, nebasumbishe myoyi yabo, nebiimanshe bilele byabo bya kale, nebapande bibwikilu abi. MbaCiswe, Mukalenge. Nebafile cintu kana cyònsò, cintu kana cyònsò, anu bwa babape Yesu.

³⁵⁵ Mukalenge, ngeela meeji ne Wèwè ukàadi mubàjaadikileCì mpindyewu. Badi bàfùmìna ku myaba yònsò. Badi bàtùùla mfranga ya byakudya byabo. Badi benza cintu cyònsò, bwa kuteeta kulwa mu masangisha, bwa kwenzabo ne mwabo mwònsò, bwalu mbapete Busanga bwa mushinga mukole abu. Bikwabo bintu mbikese menemene. Bàbènèshäku, Taatù.

³⁵⁶ Pa cyambilu apa, mu dinda emu, Mukalenge, mpaapa pasanganyiibwa mishwala. Pàmwäpa nebikengele bwa yimwe ya ku yòyì yumuke leelu ewu, kumpala kwa mudimu wa dyondopa diloolo edi. Éyì Nzambi wa Cyendelele, pwekeshaku mèsù panshi. Ndi mumanye ne Wèwè udi mwab'ewu, Udi mubwikila. Nenku nyewu ntuma tuubibwikilu tukese etu, Mukalenge, tudi tubiikidiibwa ne “mishwala,” ne “tulùlù” tukese, ne “tunshesheete” tukese bwa bânà bakese. Nenku ndi ntutuma bu tuubimanyinu tukese twa bibwikilu, twa ne Dìyì Dyebe ndiyiishibwepu mu dinda emu, kabidi, mèmè bu mwena kwitabuuja, ndi ntutentekela byanza, mubidi wanyi, biikàle bileeja ne ndi nCiitabuuja. Nenku, ku diitabuuja, muntu ne muntu mu citanda eci nyewu wenza cintu cimwecimwe aci, Mukalenge. Swaku bwa babeedi basangale.

³⁵⁷ Wèwè udi mwa kulaaba cyanza pa—pa Dìyì kuumukila apa, Mukalenge, bu mwàkenzà mwimbi wa kale wa cindaala pa cindaala amu, enzaku nanku, Mukalenge. Enzaku bwa kwimbaci muyengà mulelela, kalonda kaa dikoona naaku pa nshinga kiikàle mu cyanza cya Mumanyi awu, dîbà adi twètù netuMumone mwimane mumweneke patooke.

³⁵⁸ Mushindu mwine uvwa bantu abu ne cya kwikala beele meeji mu diine dituku adi, pavwabo kabayi baswe bwa kufila kantu nansha kamwe, pàvwàbo kabayi bafile kantu nansha kamwe bwa cindaala aci. Kabavwa baciswe to. Kabavwa baswe kwikala naaci mu nzubu mwabo to. Kadi mbenze anu bacitwa cyanza kudi ewu uvwa mwa kwikala mucimanye bilenga, dîbà adi kusumbishabo byònsò bivwabo naabi, bwa kucipetabo. Bakaavwa bakokangana ne balwangana mvita bwa cyòci aci. Dîbà dikaavwa dimane kupita piine apu.

³⁵⁹ Ki mwenzekabi kumpala eku peediibwa Mpungi wa Mukalenge, dîbà kadyakwikalaku kabidi to. Aba biikalabo bajeèbùlèjèèbùle ne beelùlwile abu, bavwa biimàne mwaba awu kumpala kwa cibwikilu cipanda ne baakamona Dìyì dya

Nzambi dimweneshiibwe abu (*bakwabo* nebèlè mbila bwa kuDipeta, kadi, bu muWakamba ne: “Dìbà nedìikalè dimane kupita piine apu”), baakabwela mu Didya dya Dibanji; kadi *bòbò* baakashaala pambelu padi myadi, ditwa dya mikemu, ne disumakaja dya mènù.

³⁶⁰ Kwacishaku muntu ne muntu bwa kwitabuuja, mu dinda emu, Taatù; baye dyamwamwa dya cibwikilu cyònsò cya budisu, cibwikilu cyònsò cya bupidya, ne bamone Mucimunyi wa Bukole mubuulula kumpala kwa beena kwitabuuja. Bwalu: “Monaayi, Ndi neenu misangu yònsò, mene too ne ku ndekeelu wa buloba. Mu katanci kakese emu baa buloba kabaakuMmona kabidi to, kadi nwènù nenuMmone.” Dileejäku Wèwè mwine munkaci mwetu, Mukalenge, bu mûkaadi Wèwè wenzenza. Shaalaku anu mushindu awu too ne patwamweneka ne mèsù kumpala Kwebe, piikalà *en morphe* mushintuluke ne Wèwè mulwe cyakabidi Mwànà wa muntu, ne Mwànà wa Davidi. Enzaku nanku, Mukalenge, mu Dìnà dya Yesu Kilisto.

Patucidi ne mitu yetu miinyika apa, bònsò mu disambila.

³⁶¹ Ndi ndikonka leelu ewu ní kudi bantu mwaba ewu badi. . . munda emu anyi pambelu. Kakwena mushindu wa kwenza dibiikila dya ku cyoshelu mwab’ewu to, bwalu kapeena mwaba to. Kadi ndi ndikonka, ne meeji matooke ònsò, udiku witabuuja ne eci m’Bulelela anyi? Udiku witabuuja ne mu dituku ditudi ne mwoyi edi, ne cimvundu cinene cyònsò eci ne cikondo cya maalu a mamanya muvwabi mu matuku a Noa, mu matuku a Mòsà, mu matuku a Kilisto, ne Nzambi, Taatù munene wetu bònsò badi balediibwe munda Mwende awu, mmwimane munkaci mwetu leelu ewu anyi?

³⁶² Dikunji dya Kapyà dídì dimweneke ne mèsù didì dijaadikiibwe ku maalu a mamanya edi, kukaadi bidimu byàbûngì, pàncivwa mwànà mukese, dyakaakula naanyi kuntu kwaka e kungambiladi ne nènsonbelè mwaba ewu mene, ne bìvwà mwa kwenzeka. Mémè mumanè kunwambile bwalu abu, ne pashiishe Dyòdì. . . Dituku dikwabo ku musulu, kumpala kwa mudimu wa bwambi kubangawu, ditabuluja dya kumpala, Yèyè kumweneka mu maulu kwaka, kuDimanyishaYe ne kufilaYe mudimu muntuma naawu awu. Bidimu byònsò ebi mvwa musokoke bwalu abu mu mwoyi wanyi, mu bwikile Kilisto, Dikunji dya Kapyà dimwedimwe adi diikàle dyumvwija Dìyì, bu mwakalayiibwabi. Tudi mu matuku a ndekeelu, anu ku Dilwa dya Mukalenge menemene. Nenku pawikala wèwè udisangana pambelu paa cibwikilu aci, bwalu ndufu wèwè usanganyiibwa pambelu, ku diitabuuja, mu dinda emu, udiku mwa kwamba ne: “Ku dikwacisha dya Nzambi. Ne ku dikwacisha Dyebe, Mukalenge, ndi muswe kubwela kuya dyamwamwa dya cibwikilu aci. Ndi muswe mbwele mwaba wùdì Wèwè, bwa kumona Dìyì dya Nzambi mu kaabujima?”

363 Kuteeciku bwa kwikala Mòsà to. Kuteeciku bwa kwikala Aalona to. Kudidingiku to. Ikala wêwè anu muntu údi awu, cibi ikala mwena Kilisto.

364 Nudiku mwa kuswa, ne mitu yenu miinyika, bwa kwela byanza byenu muulu kudi Nzambi, ne kwamba ne: “Mukalenge Nzambi, nkwaçishèku bwa mbwele munda mwa cibwikilu”? Nzambi akubeneshe. Nzambi akubeneshe. Aci, anji tangilaayi anu byanza!

365 Pambelu pààpa, vulukaayi ne, mbifwanyine kwenzeka ne nciyiku mwa kumona cyanza cyebe to. Kabyena—kabyena ne mushinga menemene bwa mêmè kucimona to, twamb’eku twamb’eku; bidi ne mushinga, bwa Nzambi. Cibì, bwanyi mêmè, bidi anu bimfikisha ku dimona ne—ne Dimiinu ndimate mwaba kampanda, ne, kadi Nzambi ngudi umona mwoyi wa bushuwa.

366 Piikalaku bakwabo bavwa kabayi beele byanza byabo muulu, biikàle bajinga kubyela muulu mpindyewu, elaayi byanza byenu muulu bwa nnuvuluke mu disambila. Elaayi byanza byenu muulu. Nzambi akubeneshe. Abi mbîmpè. Nzambi akubeneshe.

367 Taatù, nyewu tulomba leelu ewu, Mukalenge, bwa aba badi kabayi banji kubwela kuya dyamwamwa dya cibwikilu abu. Mbiimanyine pambelu pààpa bu muvwa Izaleela; badi munkaci mwa kutangila. Mbiitabuuje, kadi kacya kabatuku banji kubwela mu Eci to, bwa kumona Bukênkè bunene bwa Shekinah abu, ne bwa mubidi ne bwa nyuma, mu mushindu wa ne disù dya cyamu cya fôtô nditungunuke ne kukwata fôtô; kudi mbingu yibidi cyanaana, mbaCikwate cyakabidi fôtô. Nyewu Udibuulula Wêwè mwine, Mukalenge, Nzambi wa Bukole mubuulwila mwena kwitabuuja; mucikàle anu mubwikila bwa mwena bupidya, kadi mubuulula bwa mwena kwitabuuja.

Swaku bwa babwele baye dyamwamwa, leelu ewu, Mukalenge, bamone bulenga Bwende bunene ne Butumbi. Swaku bwa myoyi yabo yishintuluke kumpala mene kwa twêtù kwalukila mu ekeleeziya ewu diloolo edi. Swaku bwa bônso kuujiibwabo tente ne Nyuma Mwîmpè, Bwikadi Bwebe. Swaku bwa Mumanyi wa cintu awu angate diitabuuja didibo naadi adi, adipicishe pa Dîyi; swaku bwa muyengà walukile ne: “Wêwè ukaavwa mumana kulongolola, kumpala kwa difuka dya dyulu ne buloba, bwa kwitabuuja Eci. Itabuujaaku, mwanaanyi Wanyi, usungidiibwe.”

368 Taatù, Nzambi, tudi tubafila mu byanza Byebe mpindyewu, biikàle bamanye ne kakwena cintu nansha cimwe kabidi citudi mwa kwenza to. Byônso bidi kùdi Wêwè mpindyewu, Taatù. Nyewu nkupeeshabu Wêwè. Mu Dîna dya Yesu Kilisto, Mwan’Ebe. Amen.

Ndi muMunange, ndi . . .
 Bwalu . . . wakannanga kumpala
 Ne wakampetela lupandu
 Pa mucu wa Kalvariyo.

369 Nudi baMunange anyi?

Mukemeshanganyi, mukemeshanganyi, ki cidi
 Yesu kûndi,
 Mubedyanganyi, Mfumu wa Ditalala, Nzambi
 wa Bukole n'Yêyè;
 Ûdi ùnsùngila, ùndama ku mpekaatu yònsò ne
 ku bundu,
 Mukemeshanganyi ki Mupikudi wanyi, Dîna
 Dyende ditumbe!

Kale mvwa mujimine, mpindyewu ngaapeteki,
 muumuke ku dipiila,
 Yesu udi ufila budishikaminyi ne lupandu mu
 kaabujima;
 Ùnsùngila, ùndama ku mpekaatu yònsò ne ku
 bundu,
 Mukemeshanganyi ki Mupikudi wanyi, Dîna
 Dyende ditumbe!

Kaa, mukemeshanganyi, mukemeshanganyi, ki
 cidi Yesu kûndi,
 Mubedyanganyi, Mfumu wa Ditalala, Nzambi
 wa Bukole n'Yêyè;
 Kaa, ùnsùngila, ùndama ku mpekaatu yònsò ne
 ku bundu,
 Mukemeshanganyi ki Mupikudi wanyi, Dîna
 Dyende ditumbe!

370 Mbanganyi badi baMumona mwimane, Mucimunyi wa
 Bukole, Diyì divwijiibwe mubidi, mubuulula kumpala kwetu;
 Alpha, Omega; Ewu Uvwaku, Udiku, ne Wâlwa; Muji ne
 Mutoloku wa Davidi; uvwa Mwânà wa muntu, Mwânà wa
 Nzambi, Mwânà wa muntu, ne wíkala Mwânà wa Davidi awu?
 Nudi nuCiitabuujja ne mwoyi wenu wònsò anyi? Ûdibuulula
 Yêyè mwine mu cikondo cyònsò, mutwadiibwe kudi mwena
 kwitabuujja, ùDìbwikila mu mubidi wa buntu musokome kudi
 mwena bupidyà. Yêyè mmusokoka paanyima paa cibwikilu.
 Nzambi asweku apande cibwikilu cyònsò, bwa tuMumone bu
 mudiYe!

Yesu udi ukosa lukanu lwònsò,
 Yesu udi ukosa lukanu lwònsò,
 Kaa, Yesu udi ukosa lukanu lwònsò,
 PadiYe ukupeesha budishikaminyi!

Dyamwamwa dya Yadene,
 Mu madimi malenga a Edena
 Mùdi Muci wa Mwoyi wela bilòngò,
 Ke mudi diikisha bwanyi mèmè.

Yesu udi ukosa . . .

Kanwenaayiku baswe kusabuka Yadene mpindyewu anyi?
 Mukùngùlù kî mmulepeku bikùmbàne mu cipeela anyi?
 Tusabuke tuyaaayi dyamwamwa mu milayi!

Yesu udi ukosa lukanu lwònsò,
 Yesu udi ukosa lukanu lwònsò,
 Kaa, padiYe ukupeesha budishikaminyi!

371 Twèlààyi cyanza muulu mpindyewu.

Kashidi ne kashidi, mèmè nèmMutùmbìshè,
 Kashidi ne kashidi, mèmè nèmMutùmbìshè,
 Kashidi ne kashidi, mèmè nèmMutùmbìshè,
 Bwalu Yèyè udi umpeesha budishikaminyi!

372 Amen! Aci kaciyena cinufikishaku ku didyumvwa bilenga anyi? Kaa, mushindu mwine udibi bilenga bilayà! Mushindu mwine udibi bilenga bilayè's we, kî mmudiYe anyi, dîbà adi? Tulabulanganaayi ku cyanza muntu ne mukwende mpindyewu, biikàle twamba ne:

Yesu udi ukosa lukanu lwònsò,
 Yesu udi ukosa lukanu lwònsò,
 Kaa, Yesu udi ukosa lukanu lwònsò, (Nzambi akubeneshe, mwaneetu.)
 Kaa, ne Yèyè udi ukupeesha budishikaminyi!
 Kashidi ne kashidi, mèmè nèmMutùmbìshè,
 (Nzambi wa Bukole!)
 Ka- . . .

“Umwèumwè awu makeelela, leelu, too ne kashidi,”
 mmushintulule anu mmwenekelu Wende cyanaana.

. . . nèmMutùmbìshè,
 Kashidi ne kashidi, mèmè nèmMutùmbìshè,
 Bwalu Yèyè udi (munguumushe twitabaayi yònsò) mmumpe . . . (bwa kwitabuujà Dîyì Dyende).

373 Kaa, kanwenaku mwa kuumvwa Cindaala cya Mumanyi awu cyenda cyendakana mu Dîyì edi mwònsò anyi? Yèyè udi umwèumwè awu makeelela, leelu!

Kashidi ne kashidi, mèmè nèmMutùmbìshè,
 Kashidi ne kashidi, mèmè nèmMutùmbìshè,
 Ka- . . . (Yèyè, Dîyì!) . . . shidi ne kashidi, mèmè nèmMutùmbìshè, (Wàkenza cinyi?)
 Bwalu Yèyè (paanyima paa ridô) udi umpeesha budishikaminyi!

374 Butumbi bwikalè kudi Nzambi! Ndi muMunange. Kanwenaayiku baMunange anyi? Eci kí ncyá mu Dyulu anyi? Mémè ntu munange byambibiibwa bya Dìyì abi, nwamonu's, anu Nyuma Mwímpè mu mushindu wa kalolo, wa didipwekesha awu. Ntu—ntu munange anu Aci. Kaa, anji elaayiku peenu meeji!

Dyamwamwa dya Yadene, (Ndi ngenda nkusemena mpindyewu.)
 Mu ditalala... (Kamùyi lufu to!) dya Edena, . . . (Ncinyi cîngààsanganàmu?)
 Mùdi Muci wa . . . (ùvwà mu budimi bwa Edena awu) wela bilòngò,
 Mudi diikisha bwanyi mémè.

375 Udi muswe kuya anyi? Yèyè udi ukosa lukanu lwònsò.

Yesu udi ukosa (cilele cyònsò) lukanu lwònsò,
 Yesu udi ukosa lukanu lwònsò (mangumba ònsò, twitabaayi yònsò),
 . . . ukosa lukanu lwònsò,
 Kaa, padiYe ukupeesha budishikaminyi!

376 Butumbi bwikalè kudi Nzambi! Ntu mémè anu muMunange. Kabyena bikemesha to pàakambà Yeshaayi ne: “Yèyè m’Mubedyanganyi, Mfumu wa Ditalala, Nzambi wa Bukole, Taatù wa Kashidi, Mukemeshanganyi!”

Mukemeshanganyi, mukemeshanganyi, ki cidi Yesu kùndi,
 Mubedyanganyi, Mfumu wa ditalala, Nzambi wa Bukole n’Yèyè;
 Kaa, ùnsùngila, ùndama ku mpekaatu yònsò ne ku bundu,
 Mukemeshanganyi, Mupikudi wanyi, Dîná Dyende ditumbe!

377 Kaa, ekelekele! Aci's cidi cinyungisha mwoyi wanyi. Mushindu mwine udiYe mulenga's we! Nyawu nnwambila's, kakwena ndekeelu bwa Eci nansha. Eci, mémè ndi mubwele mu Cyôci eci kukaadi bidimu makumi asatu ne bisatu, mwikàle ndyumvwa mushindu ewu. Nenku bu Yèyè mwa kunenga, dîngà dituku mémè nêmbwikilè mèsù, nênyè mu mushindu umweumwe ewu. Amen!

Mukemeshanganyi, mukemeshanganyi, ki cidi Yesu kùndi,
 Yèyè m’Mubedyanganyi, wanyi Mfumu wa Ditalala, Nzambi wa Bukole n’Yèyè;
 Ùdi ùnsùngila, Ùdi ùndama ku mpekaatu yònsò ne ku bundu,
 Mukemeshanganyi, Mupikudi wanyi, Dîná Dyende ditumbe!

378 Mémè's ndi mufwanyine kushaala apa dituku dijimà, anu mu Cyôci aci. Pôlò wakamba ne: "Mémè ngimba, nêngimbè mu Nyuma." Uh-huh. "Mémè nyiisha, nényiishè mu Nyuma. Mémè ngenda, nêngëndè mu Nyuma. Mémè nyiikila, nényiikilè mu Nyuma." Bintu byônsò byenjiibwe ku Dîyi ne ku Nyuma. Eyowa's, mukalenge. Amen! Byônsò m'Bulelela bwa Nzambi.

379 Ndi mMumona, Nzambi wa Bukole, mubuulula. Ndi mMumona ukoka twitabaayi ne mangumba, ubyeela anu kwaka; ukoka beena—beena mpatà ubeela anu kwaka, ndongamu ya bulongeshanganyi, ne byônsò; wenda uya kumpala, wimana mwaba awu. Nudi nwela meeji ne twitabaayi mmifwanyine kuMucimuna anyi? Nudi nwela meeji ne mangumba mmafwanyine kuMucimuna anyi? Nudi nwela meeji ne Nsangilu wa Buloba bujima udi mwa kuMucimuna anyi? Yêyè wakacimuna byônsò, kukosa lukanu lwônsò, kupanda iferno kadi kumushiya bwashi; mukose citampi, mubwele mu Mwaba mutambe cijila; muDibuulule kutudi, mwikàle Dîyi, umwèumwè awu makeelela, leelu, too ne kashidi. Amen. Ndi muMunange.

380 Mpindyewu, too ne patwasangila mu mapingaja emu, tudi baswe kwenza cintu cimwepele, ncyà ne:

Angata Dînà dya Yesu wëndè naadi,
Wèwè mwànà wa kanyinganyinga ne dikenga;
Nedikupe disanka ne busambi,
Kaa, nda naadi kwônsò kûyaayà.

Dînà dya mushinga, Éyi dya bupole be!
Ditekemena dya buloba ne disanka dya Dyulu;
Dînà dya mushinga, (Eyowa's, nkaadi naayi,
kwônsò aku.) Éyi dya bupole be!
Ditekemena dya buloba ne... (...?....)

381 Sataana yêyè mudidinge anu mukuteete, ne kwêna mutangile ku cintu cya bushuwa to, mufunkwine Dîyi bu mwàkenzà Yesu amu. Wamonu anyi? Wamonu anyi? Amen!

Twinamina Dînà dya Yesu,
Tupona mikookwela ku makàsà Ende,
Mfumu wa bamfumu mu Dyulu netuMwase
cifulu cya butumbi,
Paajika lwendu lwetu.

Dînà dya mushinga, Dînà dya mushinga!
Ditekemena dya buloba ne disanka dya Dyulu;
Dînà dya mushinga, Éyi dya bupole be!
Ditekemena dya buloba ne disanka dya Dyulu.

382 Billy nealwe, pabwîpì ne dîbà isambombo jaajaaja, neabanyine badi baswe kubwela mu mulongo wa babeedi twarta twa disambila. Ndi ngeela meeji ne bikengela twètù kucyenza. Tukaavwa baswe kubenga kutwàbànya, kadi, bu

mudiku musumbà wa bantu, bikengela anu twètù kwenza nanku, nudi numona's.

³⁸³ Mpindyewu nuMuvulukaayi! Ikalaayi misangu yònsò Nende mu meeji, mu myoyi yenu. Kwònsò kúyaayà, udi umona's, ikala anu ne Yesu mu meeji.

Angata Dìná dya Yesu (Teelejaayi mpindyewu.)
wëndè naadi,

Bu ngabu bwa kudikanda ku buteyi bwònsò;
(Cìdi cyènzekà ncinyi?)


Pààkunyùngulukilà mateeta, (Udi ne cya
kwenza cinyi?)

Nungana anu Dìná dya Cijila adi mu
disambila.

Dìná dya mushinga, (Dìná dya mushinga!) Éyì
dya bupole be!

Ditekemena dya buloba ne disanka dya Dyulu;
Dìná dya mushinga, Éyì dya bupole be!

Ditekemena dya buloba ne disanka dya Dyulu.

³⁸⁴ Twinyikaayaaku mitu yetu mpindyewu. Nèndombè mpaasata ne udiku mwa kulwa bwa kutangalaja bateeleji. Mwaneetu Neville, Nzambi akubeneshe, Mwaneetu Neville. 

DIBUULUDIIBWA DYÀ NZAMBÌ LUA64-0614M

(The Unveiling Of God)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 14 a ngondo mwisambombo, cidimu cya 1964, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org